

2137

2020 №1

# აშქალანი 1.2020





ISSN 2346-8416

# აქტუალნი

აღმოსავლური ჟურნალი

გამოდის წელიწადში ორჯერ

1

ივნისი

თბილისი

2020



„არმატანი – შორით მოსულსაგან მოღებული  
მის თემის ძღვენი“ (საბა).



ჟურნალი დაარსებულია 2016 წელს  
მაგალი თოდუას  
მიერ

რედაქტორი  
მზია ბურჯანაძე

სწავლული მდივანი  
ნანა ჯანაშია



სტუმრების განყოფილება  
საქართველოს  
რეპუბლიკა

დამკაბადონებელი  
ნანა ყანდაშვილი

მომკაზმველი  
ირაკლი უშვერიძე

იბეგიძე ილიკუციძე  
თბილისი



## ექვნიკა ნოდარ ჯანაშიას ნათელ ხსოვნას

### რედაქციისგან

გამოჩენილ ქართველ თურქოლოგს, თბილისის სახელმწიფო უნივერსიტეტის თურქოლოგიის კათედრის გამგეს 1973-2004 წლებში, ნოდარ ჯანაშიას, 2020 წლის 1 იანვარს დაბადებიდან 95 წელი შეუსრულდა.

ნოდარ ჯანაშია სამეცნიერო და პედაგოგიურ მოღვაწეობასთან ერთად აქტიურ მთარგმნელობით საქმიანობასაც ეწეოდა. იგი თარგმნიდა როგორც თურქული, ასევე, აზერბაიჯანული, უზბეკური და ფრანგული ენებიდან, ძირითადად, თანამედროვე მხატვრულ პროზას.

ამ თარგმანების უმრავლესობა გასულ საუკუნეში გამოქვეყნდა სხვადასხვა პერიოდულ გამოცემაში ან დაიბეჭდა ცალკე წიგნად. რამდენადაც მათი გამოსვლიდან საკმაოდ დიდმა დრომ განვლო და დღეს ეს წიგნები, პრაქტიკულად, ხელმიუწვდომელია, რედაქციამ მკითხველისთვის საინტერესოდ მიიჩნია ზოგიერთი თარგმანის ხელახლა გამოქვეყნება.

შევნიშნავთ, რომ ჟურნალის წინამდებარე გამოშვებაში შესული რამდენიმე ნაწარმოები მთარგმნელის სიცოცხლეში არ დაბეჭდილა და ისინი პირველად ქვეყნდება.

ყოველი თხზულების დასაწყისში, სქოლიოს სახით, რედაქციის მიერ აღნიშნულია, თუ როდის და სად დაიბეჭდა აღნიშნული თარგმანი. დანარჩენი კომენტარები ეკუთვნის პირადად მთარგმნელს. რედაქციამ საჭიროდ მიიჩნია, თარგმანები, თავისი კომენტარებითურთ, დაებეჭდა უცვლელად – იმავე სახით, რა სახითაც ისინი თავად მთარგმნელმა მოამზადა.

\*\*\*

ჩვენი ჟურნალის წინამდებარე ნომერში გთავაზობთ ბატონი ნოდარის თარგმანებს თურქული და აზერბაიჯანული ენებიდან.

\*\*\*

ვფიქრობთ, თანამედროვე საზოგადოებისთვის ინტერესმოკლებული არ უნდა იყოს ბატონი ნოდარის კიდევ ერთი შემოქმედებითი ნიჭის გამოვლინება. ბატონი ნოდარი დაჯილდოებული იყო ესთეტიკური აღქმის განსაკუთრებული უნარით, რაც ბუნებისგან ბოძებული სილამაზის შემოქმედებითად გარდაქმნისა თუ ჩამოქნის ოსტატობაში ვლინდებოდა. ნოდარ ჯანაშიას სიცოცხლეში ხის ტოტებიდან და ფესვებიდან „ამოზრდილი“ მისეული ფიგურები არაერთი გამოფენის ექსპონატებად ქცეულან და ავტორისთვის მრავალი ჯილდოც მოუტანიათ.

ჟურნალის ბოლო გვერდები ბატონი ნოდარის მიერ შექმნილი ხის ფიგურების ფოტოგამოფენას ეთმობა.

2020





ქართული  
ენების ცენტრი





აზერბაიჯანული ლიტერატურა



ენვერ მამედხანლი  
(1913-1990)

წითელი კოკრები<sup>1</sup>

(ციკლიდან „თავრიზული მოთხრობები“)

მოხუცი ფირუზა მზის ჩასვლისას ბრუნდებოდა სახლში. ზოგჯერ, როცა ბაზარში ბევრი სამუშაო იყო ხოლმე, იგი მთელი დღე თავდალუნული ტვირთს ეზიდებოდა, ხან კიდევ უსაქმოდ იდგა ვეებერთელა სანყოფებთან, სამუშაოზე ოცნებობდა და იმის მოლოდინში იყო, რომ ვინმე დაუდახებდა. ასეთ დღეებში ის ჩაცუცქედებოდა იქვე და კედელზე მიყრდნობილი საცოდავად თვლემდა.

ძალზე მოხუცებულია ფირუზა. ალბათ, ამიტომაც სტკივა მას ძვლები? ან იქნებ ხანგრძლივი ცხოვრების მანძილზე გადაზიდული დიდძალი ტვირთია, მას რომ მხრებს უმძიმებს.

ყოველი დღე მძიმე ტვირთად აწვა ფირუზას და კიდევ უფრო კაკვავდა წელში... სხეულთან ერთად მისი ცხოვრებაც და შეგნებაც ისრისებოდა ამ აუტანელი ტვირთის ქვეშ.

რამდენი ზანდუკი, ავეჯი და ხალიჩა უზიდავს მას ამ დიდსა და მდიდარ ქალაქში, სავსე სანყოფების რამდენი მძიმე ბოლჩა უტარებია მოხუცის ზურგს და თითქოს ყოველი მათგანის სიმძიმის ნაწილი სამუდამოდ შერჩენია ფირუზას ცხოვრებას.

ბოლო დროს იგი მზის ჩასვლისთანავე მიატოვებდა ხოლმე ბაზარს და სადღაც მიიჩქაროდა. ამ დროს საქმეც რომ გამოსჩენოდა, ყურს არ ათხოვებდა. უსაქმოდ გატარებულ დღეებშიც ისე იყო დაღლილი, რომ მტვრიან ქუჩაზე გაჭირვებით მიათრევდა თავის ჩრდილს.

იგი მიაშურებდა ქალაქის განაპი-

რას მდებარე ერთ ხალიჩების საქსოვ ფაბრიკას, იქ შეჩერდებოდა, მიეყრდნობოდა დიდი ხნის გამხმარ ჩინარს და ქარხნის ჭიშკარს შეჰყურებდა. მოხუცს ფიქრი იტაცებდა, მაგრამ, განა ისვენებდა ან მშვიდდებოდა აქ ფირუზა? არა, აქ იგი სხვა, უფრო მძიმე ტვირთს ელოდებოდა...

უეცარმა ხმაურმა მოსწყვიტა მოხუცი ოცნებათა სამყაროს. მისი თვალები გაფაციცებით ეძებდა ვიღაცას ქარხნის ფართოდ გაღებული ჭიშკრიდან ჯგუფ-ჯგუფად გამომავალ ბავშვთა შორის. და აი, ისიც, ორ გოგონას რომ მოჰყავს ხელით, მისი შვილიშვილი სურეიე, გამხდარი და ფერმკრთალი შვიდი-რვა წლის გოგონა.

სურეიემ, ჯერ კიდევ ახალფეხადგმულმა ბავშვმა, ბნელსა და ნესტიან მიწურში დაკარგა სიარულის უნარი და კუტად დარჩა. სანყალ მოხუცს ამ კუტი შვილიშვილის მეტი არავინ გააჩნდა ქვეყანაზე. ვაჟი, რომელიც შორს ქირაზე იყო წასული, უგზო-უკვლოდ დაიკარგა და არავინ იცოდა, ცამ უყო პირი თუ დედამინამ. რძალი კი ადრე გარდაეცვალა, ჯერ კიდევ, როცა სურეიე დედის ძუძუს წოვდა. და უნდო წუთისოფელს პირისპირ შერჩნენ ქანცგამოლეული მოხუცი და კუტი გოგონა.

ფირუზა მიუახლოვდა ბავშვებს, ფრთხილად შეისვა შვილიშვილი ზურგზე და თავდალუნული ჩუმად გაუდგა გზას. ყოველთვის, როცა კი მოხუცი ზურგზე შეისვამდა ამ ბუმბულივით მსუბუქ სან-

<sup>1</sup> პირველი სხივი, III, უნივერსიტეტის გამომცემლობა, 1952.



ყალ გოგონას, მას ეგონა, თითქოს მთელი თავისი მძიმე და ტანჯული ცხოვრება ეკიდა ზურგზე. სურეიე იყო მისი ხვედრი, მისი ცხოვრების ტვირთი, რომლის სიმძიმისგან მოხუცის მთელი ტანი იზნიქებოდა.

– ბაბუა, შენ, ალბათ, დღეს ძალიან დაილაღე?

– არა, შვილო, მე დღეს არაფერი გამიკეთებია.

გოგონა მაშინვე მიხვდა ყველაფერს: თუ ასეა, მაშინ ბაბუას დღესაც ცარიელი ექნება ჯიბე. პურის დუქანთან რომ გაიარეს, მან მაინც გააჩერა ბაბუა.

– მოიცა, ბაბუა, პური ვიყიდოთ.

მოხუცი შეჩერდა. გამყიდველმა რამდენიმე ნამცხვარი გაუნოდა მოხრილ ფირუზას. სურეიემ კი თავსაფრის ყურში გაკრული თავისი დღევანდელი გასამრჯელო – ორი კრანი<sup>1</sup> ამოიღო და გამყიდველს მისცა. მოხუცს ოფლმა დაასხა. მას დღესაც პატარა შვილიშვილის ფულით ნაყიდი პური უნდა ეჭამა...

სალამოს ნახევრად ბნელ და ნესტიან მინურში ბაბუა და შვილიშვილი უსხდნენ მინაზე დაგებულ ჭილოფს, რომელსაც ჩითის გახუნებული სუფრა ეფარა. სუფრაზე ელაგა რამდენიმე ნამცხვარი და ერთი ნაჭერი ყველი. ეს მათი ჩვეულებრივი ვახშამი იყო. სამაგიეროდ, ამ ბნელ მინურში ღარიბ სუფრასთან მიმჯდარი მოხუცი ყოველ ღამე უყვებოდა თავის პატარა სურეიეს მრავალ ზღაპარს. სურეიე სულგანაბული უსმენდა ბაბუას ნაამბობს და ჭრელად აფერადებულ თვალწარმტაც სამყაროში გრძნობდა თავს. მაშინ ფრთას ისხამდა მისი გულის სიღრმიდან უბრალო და ნათელი ოცნება და ზღაპრული სასახლეებისაკენ მიაქანებდა. ხოლო ძილში მთელი ღამე საარაკო სიზმრებს ხედავდა.

<sup>1</sup> კრანი ანუ რიალი – ირანული ფულია, ოც კაპიკს უდრის.

სურეიეს ჯერ კიდევ არ ჰქონდა წარმოდგენა ბედნიერების შესახებ. ყოველთვის ესიზმრებოდა ახალგაზრდა, ლამაზი ქალი, რომელიც ნათელი ოთახის ღია კარში იდგა და მას უხმობდა. სურეიე მას საყვარელი დედის ხატებად თვლიდა.

დიღ-დიღობით ტკბილ და ნათელ სიზმრებს ბაბუას ძახილი უფანტავდა. მოხუცი აწყვეტინებდა დიღის ტკბილ ძილს, შეისვამდა ზურგზე და ქარხანაში მიჰყავდა. თვითონ კი ბაზარს მიაშურებდა, რათა თავის საქმეს სწეოდა.

წელიწადზე მეტი იყო, რაც სურეიე ამ ქარხანაში მუშაობდა. ყოველ დილით, მზის ამოსვლისას, ქარხანა სხვადასხვა ასაკის ბავშვებით ივსებოდა. აქ ერთი-ორი ოსტატისა და ქარხნის მოხუცი მხატვრის გარდა ნახავდით მხოლოდ პატარა ბავშვებს, მიმსხდართ ორ რიგად ჩამწკრივებულ ვეება საქსოვ დაზგებთან. ყოველ დაზგას ორი, სამი ან მეტი ბავშვი უჯდა. ისინი დილიდან საღამომდე ქსოვდნენ.

უფროსი გოგონები ყოველ დილით დასვამდნენ სურეიეს დაზგასთან მიდგმულ ტახტზე, შემდეგ თვითონაც მოუსხდებოდნენ მას ორივე მხრიდან და მაშინვე იწყებდნენ მუშაობას. მათი თითები ელვის სისწრაფით მოძრაობდნენ ჭრელ ძაფებს შორის.

ბავშვები ხმისამოუღებლად იწყებდნენ მუშაობას. ცოტა ხნის შემდეგ კი ყოველი მათგანი ღიღინებდა სიმღერას ამ ერთფეროვანი და მომქანცველი შრომის შესამსუბუქებლად. მათი ღიღინი წარმოშობდა რაღაც გაურკვეველ ბუტბუტს და თანდათან ყურდებოდა მაშინ, როცა ვინმე წკრიალა ხმით მოჰყვებოდა სიმღერას.

სურეიე კი დუმდა. მას არც ხმა ჰქონდა და არც სიმღერა იცოდა... თაფლისფერ თვალებს არ აშორებდა გადა-



ჭიმული ძაფების ქსელს და ცდილობდა, მთელი თავისი ყურადღება, ხელოვნება და მონდომება მასში ჩაექსოვა. ქსელზე მის მიერ ამოქსოვილი კოკრები მთელს ქარხანაში იყო ცნობილი და მოხუც მხატვარსაც წითელკოკრებიანი ქარგები პატარა სურეიესთვის უნდოდა.

სურეიეც თავისი ალერსსა და დაყვავებას მოკლებული სულის მღელვარებას ამ კოკრებში აქსოვდა. ამიტომ მის მიერ ამოქსოვილი კოკრები ისე ცოცხლად და სხივიანად გამოიყურებოდა, რომ კაცს ეგონებოდა, საკმარისია, მზის სხივი მოხვდეს და ისინი მაშინვე გაიფურჩქნებაო.

მაგრამ სურეიე ველარ ასწრებდა დამტკბარიყო თავისი ნახელავით. როგორც კი შეკრავდნენ უკანასკნელ კვანძს, ხალიჩა მაშინვე მიჰქონდათ და სურეიეს აღარ ეწერა მისი ხილვა. ასე რომ, თავისი დანაკარგის ხელახლა შექმნა უხდებოდა. იგი მიუჯდებოდა ოსტატების მიერ საქსოვად ხელახლა მომართულ დაზგას და ქსოვდა კოკრებს მოხუცი მხატვრის ახალი ქარგის მიხედვით.

\*\*\*

იმ წლის შემოდგომას, რომელიც პირისახეჩამომტირალ პატარძალს მოგაგონებდათ, ცივი და ქარიანი ზამთარი მოჰყვა.

მოხუცი ფირუზას ნესტიან მიწურში კი ჯერაც არ დანთებულყო ცეცხლი. შეშა არ გააჩნდათ; ნავთი იმდენიც არ ჰქონდათ, რომ ერთი დამტვრეული ლამპა აენთოთ.

მოხუცი ხედავდა, რომ სურეიე ლამლამობით კანკალებდა სიცვიისაგან და მის თვალს ძილი არ ეკარებოდა.

დღეს მან დილის ბინდბუნდში მიიყვანა სურეიე ქარხანაში, დასვა დაკეტილ ჭიშკართან, ხოლო თვითონ ბაზარს მიაშურა. ამ დილით მას ერთ დიდ საწყობში

უნდა ეზიდა ტვირთი. ფირუზას არ უნდოდა, ხელიდან გაეშვა ასეთი ხელსაყრელი შემთხვევა და ცდილობდა, ყველაზე ადრე შესდგომოდა მუშაობას. რადაც უნდა დასჯდომოდა, მას დღეს ერთი შეკვრა შეშის ფული მაინც უნდა ეშოვა.

ტვირთის ზიდვა ადრინად დაიწყო. მოხუცი ფირუზა, ხანდაზმულობის მიუხედავად, მარჯვედ და ენერგიულად მუშაობდა. შუადღისას მას უკვე ორმოცდაათი ბოღჩა ჰქონდა გადაზიდული. ახალგაზრდა და ღონიერი მტვირთავები შურის თვალთ უცქერდნენ მას. და აი, მოხუცმა ფირუზამ კიდევ წამოიკიდა ზურგზე დიდი ბოღჩა და საწყობის ჩაბნელებულ და დაქანებულ კიბეს ჩაჰყვა. სამი საფეხურის ჩავლადა მოასწრო, რომ უეცრად თვალთ დაუბნელდა... კიბის აგურები შეირყნენ ფეხქვეშ. მოხუცმა ხელები გაშალა, რომ რაიმესთვის წაეტანებინა, მაგრამ იგრძნო, ძალა ეცლებოდა. ტვირთი უფრო დამძიმდა. ფირუზამ წონასწორობა დაკარგა. სწრაფად სტაცა ხელი მკერდზე შეკრულ თოკის კვანძს, რომ ტვირთისგან თავი გაეთავისუფლებინა, მაგრამ ველარ მოასწრო. ფეხებმა უღალატა და, როგორც მთიდან დაგორებული ქვა, ისე თავდაყირა გადაეშვა უძირო საწყობის შავ ხახაში. ხმის ამოღებაც ვერ მოასწრო, ისე გაიშხლართა ძირს დაგებულ აგურებზე. თავდამხობილი იწვა ცივ და ოღროჩოღრო იატაკზე; კიბეზე დაგორებული ვეება ბოღჩა, თითქოს გამოედევნაო, მთელი თავისი სიმძიმით დაეცა იატაკზე გაშხლართულ ფირუზას.

ქვევით, საწყობში მომუშავენი მაშინვე მისცვივდნენ საწყალს და დიდის გაჭირვებით გამოათრიეს ბოღჩის ქვეშიდან, მაგრამ უკვე გვიან იყო. მოხუცი მტვირთავის სიცოცხლეს ბოღჩის დაცემამ ბოლო მოუღო.



\*\*\*

როცა ბავშვები ქარხნიდან გამოვიდნენ, სადამო იყო, თოვდა. ისინი სახლებისკენ მიიჩქაროდნენ. ბევრ მათგანს ფეხთ არ ეცვა. ახალდათოვლილ ქუჩას ფეხშიშველი ბავშვების ნაფეხურები აჩნდებოდა.

მეგობრებმა სურეიე, ჩვეულებისამებრ, ხელით გამოიყვანეს ჭიშკრამდე, მაგრამ ამჯერად მოხუცი ფირუზა არ შემოჰგებებია მათ. სურეიემ გაკვირვებით გახედა ქუჩას. ეს პირველი შემთხვევა იყო, რომ ქარხნიდან გამოსულ სურეიეს ბაბუა არ ელოდებოდა. სურეიეს მეგობრებმაც მიიხედ-მოიხედეს.

– რატომ არ მოვიდა ბაბუა ფირუზა? – გაიკვირვეს და ერთმანეთს გადახედეს.

– მოვა, მოვა, მოვიცადოთ ცოტა ხანს.

მათ ლოდინი დაიწყეს, სხვა ბავშვები წავიდ-წამოვიდნენ. სურეიე ლელავდა და წამდაუნუმ გაჰყურებდა ბინდით მოსილ ქუჩას. ბნელში თეთრად ლაპლაპებდა თოვლი. ფანტელები ჩუმად ეშვებოდა მიწაზე.

– მოდი, ჩვენ თვითონ წაგიყვანთ სახლში, – თქვა ერთმა გოგონამ, – როგორც ჩანს, ბაბუა ფირუზას არ სცალია.

სურეიემ უარის ნიშნად თავი გააქნია.

– არა, – თქვა მან, – ბაბუა, საცაა, მოვა. თქვენ წადით, თორემ გვიანაა და მერე შეგეშინდებათ.

უკვე ბნელოდა და გოგონებს მართლაც შეეშინდათ. კიდევ ცოტა ხანს დაიცადეს და მალე ისინიც წავიდნენ.

სურეიე მარტოდმარტო დარჩა ზამთრის თოვლიან ღამეში. ქუჩის ბოლოში სინათლე აინთო. ბაბუა ფირუზა არსად ჩანდა.

თოვლი თანდათან მატულობდა. იგი ვერცხლისფრად ელავდა ღამის სიბ-

ნელეში.

ერთი საათის შემდეგ სურეიეს ორმა უცნობმა ჩაუარა. ერთ მათგანს კედლის ძირას მიმჯდარი გოგონა მათხოვარი ეგონა და მას შავი ფული ჩაუგდო კალთაში.

სურეიე შეკრთა. უეცარი მონყალე-ბა პირველი იყო მისთვის და ამან გული მარტოობის საშინელი განცდით აუვსო. მან თითქოს ახლა იგრძნო პირველად, თუ რას ნიშნავდა ამქვეყნად მარტოობა, ობლობა. ტირილი რომ არ წასკდომოდა, ტუჩს კბილები დააჭირა და გაიფიქრა: “არა, არა, მე ბაბუა მყავს, არა ვარ ობოლი და მარტოხელა!”

ისედაც უსიცოცხლო ქალაქი ახლა, ზამთრის ღამეში, თითქოს დაცარიელებულიაო, ისე იყო გაჩუმებული. აქ კი, ქალაქის განაპირა ქუჩაში, ზამთრის პირველ თოვლიან ღამეს კაცი არსად ჭაჭანებდა.

შიშსა და მღელვარებასთან ერთად სანყალ გოგონას სიცივეც აკანკალებდა, მაგრამ სულით მაინც არ ეცემოდა. ღამე ნელა მიიპარებოდა. გოგონა უკმაყოფილებით ივსებოდა ბაბუას მიმართ. მალე ჩუმი ქვითინიც მორთო.

უკვე კარგა ხანი გასულიყო. ბაბუა ფირუზა კი მაინც არ ჩანდა. გოგონამ ძახილი მორთო. ის ჯერ ბაბუას უხმობდა. ხმის გამცემი რომ არავინ გამოჩნდა, სურეიემ ტირილი დაიწყო. შველას ითხოვდა, მაგრამ არავინ იყო მისი გამკითხავი, არავის ესმოდა მისი ძახილი.

უკვე ტუჩებიც აღარ ემორჩილებოდა. ის მიხვდა, რომ ეს თოვლიანი ღამე მარტოდმარტო უნდა გაეტარებინა ქუჩაში და რაიმე თავშესაფრის საძებნელად ჭიშკრისაკენ გაფოფხდა.

\*\*\*

ღილით, როცა მზის პირველმა სხივებმა სქელი თოვლით მოფენილი ქუჩა



აპრიალეს, სურეიე თითქმის უგონოდ ინვა ქიშკარსა და კედელს შუა კუთხეში. ჩითის თავსაფარი მხრებზე ჩამოვარდნოდა. მზის სხივი ზედ დაჰნათოდა მის ფერმკრთალსა და ტანჯულ სახეს.

დღეს პირველად მოხვდა მის სახეს დილის მზის ალმაცერი სხივები. მხოლოდ ერთხელ და ისიც ნუხელ არ წოლილა ის თავის ნესტიან მიწურში. მან პირველად იხილა თავისი თავი დილის მზით განათებულ თვალუნვდენელ სივრცეში. ალბათ, ამ ოქროსფერი სხივების მიზეზით იყო, რომ იგი ხედავდა უცნაურ და მშვენიერ სიზმარს: ფართო ჰორიზონტზე ამოვიდა დიდი და ოქროსფერი მზე. მისი სხივები სწვდებოდა ყველას და ყველაფერს, იგი მსჭვალავდა ქვასა და კედელს, ანათებდა ყველა ბნელ კუთხესა და მიწურს. პატარა სურეიე აღფრთოვანებით უცქეროდა მზეს და იღიმებოდა. ახლა მისი ნესტიანი და ბნელი მიწურიც ამ მზის სხივებით იყო განათებული, ლოგინსა და კედლებს მის მიერ მოქსოვილი წითელკოკრებიანი ხალიჩები ამშვენებდა. სურეიე მზის სხივებითა და ქრელი ფერებით გასხივოსნებულ სამყაროში გრძნობდა თავს. იგი ბავშვური თავმონონებით ათვალეირებდა თავის მოქსოვილ ხალიჩებს. უცბად სურეიემ მოულოდნელი სიხარულისგან დააჭყიტა თვალები: ხალიჩაზე ამოქსოვილი კოკრები მზეზე გაიფურჩინა და წითელ ვარდებად იქცა. იგი გაბრწყინებული სახით მივარდა გაფურჩინილ კოკრებს, მაგრამ მოსაწყვეტად ვერ გაიმეტა და ნაზად გადაუსვა ხელი.

უეცრად ვილაცამ ხელი სტაცა სურეიეს და სადღაც ეზიდებოდა. სურეიე გაუძალიანდა, მაგრამ ეს ხელი ძლიერი აღმოჩნდა, მოსწყვიტა გოგონა ზღაპრულ სამყაროს და ცივი და ბნელი ქვეყნისაკენ გაიტაცა.

სურეიეს გამოელვიძა, თვალები გა-

ახილა და დაინახა მოხუცი მხატვარი, რომელსაც მისთვის ხელი ჩაევლო. გარშემო სამუშაოდ მოსული ბავშვები იდგნენ და უხმოდ შეჰყურებდნენ მას. მაგრამ სურეიეს ჩამქრალი თვალები ვერავის სცნობდა; ის გაშტერებით მისჩერებოდა ერთ წერტილს.

მოხუცმა მხატვარმა იგი ხელში აიყვანა და თავის ოთახში ტახტზე დაანვინა. ვილაცას დაავალა მაყალი მოეტანათ, თვითონ კი სურეიეს ხელში მოჰკიდა ხელი.

– როგორა ხარ, ჩემო გოგონავ?

სურეიე არ პასუხობდა. ვილაცამ ჩაიც მოიტანა. სურეიეს არ დაუღევი. მაყალი მოიტანეს და ახლოს მიუდგეს გოგონას. სითბო სახეზე მოეფინა; სურეიემ თვალები მოხუჭა და ნაილულულა:

– სად იყავი, ბაბუა... ერთი შეხედე, როგორი მზე ამოვიდა. ეს სულ ჩემი ხალიჩებია, ეს კოკრებიც ჩემია. შეხე, შეხე, როგორ იფურჩინებიან ისინი მზის სინათლეზე; შენ კი სადა ხარ, ბაბუა?

მოხუცმა მხატვარმა სურეიეს შუბლზე დაადო ხელი. იგი სიცხით ინვოდა. მოხუცმა ვილაც ბავშვი ექიმთან გაგზავნა. ერთი საათის შემდეგ ქუჩიდან ცხენის ფეხის ხმა მოისმა. მოხუცი მხატვარი კარში შეეგება ექიმს და სურეიეს საწოლთან მიიყვანა.

ექიმმა ბავშვს დახედა, შემდეგ მოხუც მხატვარს მიუბრუნდა და უთხრა:

– გვიანაა, უკვე გვიანაა...

მხატვარი შეკრთა და უკან დაიხია; თვალები ცრემლებით აევსო, მობრუნდა და ფანჯარას მიუახლოვდა. პატარა ოთახის შუშებჩამტვრეული ფანჯრის იქით მის თვალწინ გადაიშალა მთელი ფაბრიკა. იქ დაზგებთან მიმსხდარიყვნენ გაყურებული ბავშვები. დღეს არცერთი მათგანი არ მღეროდა. ისინი თავდახრილნი და წარბშეკრულნი მუშაობდნენ.



მოხუცმა მხატვარმა ნაღვლიანად გადახედა მათ და სურეიეს სიტყვები გაახსენდა. უეცრად მას ეს ბავშვები ფერმკრთალ კოკრებად მოეჩვენა, რომელთაც მზის სხივები სწყუროდათ. მან ღრმად ამოიოხრა:

– არა, ასე არ შეიძლება გაგრძელ-

დეს, დადგება ის დღეც... ამოვა მზე, გაიფურჩქნებიან კოკრები...

მოხუცი მიბრუნდა, დადგა სურეიეს თავთან და მწარედ ჩაფიქრდა: „შენ კი, შენ, სანყალო სურეიე, წილად გხვდა მხოლოდ გენახა მშვენიერი სიზმარი მომავალი ცხოვრებისა“.

### მთავარ გამზირზე<sup>1</sup>

(ციკლიდან „თავრიზული მოთხრობები“)

ქალაქში მხოლოდ მთავარი გამზირი იყო განათებული და ხალხმრავალი. საღამოობით გასხივოსნებული კინოთეატრები ქრელი აფიშებით თავისკენ იზიდავდა ხალხს. ამ ქუჩაზე გამოდიოდა მაღაზიების, კაფეების და რესტორნების ფართოდ გაღებული კარები. ისინი მდიდარი მუშტრების მოლოდინში იყვნენ. გამზირიდან სხვადასხვა მხარეს მიქროდა ლამაზი ავტომობილები. აქ ცემდა ქალაქის გული. ეს იყო მისი არტერია.

სწორედ აქ ბაძავდა აღმოსავლური ქალაქი ევროპას. საღამოობით გამზირი ხალხით ივსებოდა. ქალაქის სხვადასხვა კუთხიდან მოსულნი აქ სეირნობდნენ, დროს ატარებდნენ კაფესა და რესტორნებში. მათხოვრების ერთი ჯგუფიც, რომელიც დღისით ქალაქის სხვა უბნებში ხეტიალობდა, საღამოს გამზირისკენ იქცევდა პირს. სიბნელეში სამონყალოდ ხელგაშვერილნი რაღაცას წუნუნებდნენ თავისთვის. ესენი იყვნენ, უმთავრესად, უპატრონო ბავშვები და გახუნებული ჩითის ჩადრებიანი მარტოხელა ქალები. ზამთრის ცივ ღამეში ეს ადგილი საშინელ სანახაობას წარმოადგენდა. გაუთავებელი ქვითინი ისმოდა აქ ამ დროს.

აგერ, ქალი სიცივისაგან გალურჯე-

ბული ხელებით. ქანცგამოლეულს მუხლებში ჩაურგავს თავი და ქვითინებს:

– სამი დღეა, ბავშვები მშიერი მიყვრია სახლში!

ცოტა მოშორებით ხმამაღლა მოთქვამს პატარა გოგონა:

– ვინვი, ღმერთო, ვინვი!

და მართლაც, სუსხავს მას ზამთრის ყინვა ამ ბნელ ღამეში. უფრო წინ მოჩანს სინათლისაკენ გაშვერილი ხელი, იგი კანკალებს. ისმის ტირილი და ხმამიხრწნილი დაჟინებითი თხოვნა:

– ბატონო, თქვენს ფეხებს ვენაცვალე, ბატონო...

მაგრამ ეს ჩქარი ნაბიჯით მიმავალი უცხოა მისთვის. მას ფეხზე აცვია თბილი წინდები, ფეხსაცმელი და კალოშები. ამ მტირალ და მოწუნუნე ხმებს არ ძალუძთ მისი შეჩერება.

გამზირს საღამოობით მარტო კვნესა-წუნუნი როდი ავსებს. კაფე-რესტორნების ღია კარებიდან გამოსული მუსიკისა და სიმღერის ხმა ერევა ადამიანთა მოთქმა-კვნესაში. და ამ მუსიკის ქვეშ ერთმანეთს გადახვეული ცეკვავს სიხარული და სასონარკვეთილება, ნაღველი და მხიარულება, კმაყოფილება და შიმშილი.

<sup>1</sup> პირველი სხივი, IV, უნივერსიტეტის გამომცემლობა, თბილისი, 1954.



მე იმ უპატრონოს თვალებით ვცნობდი. იგი გამოირჩეოდა ქუჩის სხვა ბიჭებისაგან. ლურჯი თვალებით ჯიქურ იცოდა შემოხედვა. პირსაც კი არ გააღებდა, ენასაც არ მოაბრუნებდა სათხოვრად. იგი უცნაური ღიმილით შემოგცქეროდათ თვალებში. ბევრის მთქმელი იყო ეს დუმილი.

შეხვედრისას იგი შეჩერდებოდა და უხმოდ გამომიშვერდა ხელს სამონყალოდ.

სანახაობამ, რომლის მომსწრეც მე შევიქენ ერთ ცივ ღამეს, ძალიან გამაცვიფრა. ცარიელ ქუჩაზე მოხეტიალე ძაღვებს შორის ამ ბავშვს მოვკარი თვალი. როცა გვერდით ჩავუარე, დავინახე, რომ იგი ამტვრევდა იღლიაში ამოღებულ პურს და გარს შემოსეულ ძაღვებს აჭმევდა - ქალაქის მოხეტიალე ძაღვებს უნაწილებდა ის დღის განმავლობაში ნაშოვნ ლუკმას. მე გამიკვირდა, მაგრამ არაფერი მიკითხავს მისთვის; ვიფიქრე, უპატრონოა და, ალბათ, მასავით უპატრონო ძაღვებთან თუ მეგობრობს-მეთქი.

ზამთრის ერთ ღამეს მე კიდევ ვნახე იგი მოხეტიალე ძაღვების ხროვასთან. ისინი წინ მიდიოდნენ, მე უკან მივდევდი მათ. სიცივე იყო, ქუჩებში ქარბუქი დაძრწოდა. ბიჭი კი ფეხშიშველი იყო და გამალებული მიაბიჯებდა. დროდადრო უკან მოიხედავდა და ჩამორჩე-

ნილ ძაღვებს უხმობდა. ის-ის იყო, მათ წამოვენიე, რომ ბიჭი რომელიღაც სავაჭრო ამხანაგობის შენობაში შევიდა და ძაღვებიც თან შეიყოლია.

ცნობისმოყვარეობამ შემიპყრო. მაინტერესებდა, სად მიჰყავდა ეს ძაღვები. თუ ღამის გასათევად შევიდა, ეს ძაღვები რისთვისღა შეჰყვნენ? ამ ფიქრით გართულმა გზა განვაგრძე. რამდენიმე ხნის შემდეგ უკან მომიხდა დაბრუნება. როდესაც ამ შენობის წინ ჩამოვიარე, თვალი მოვკარი ორ ძაღვს, რომლებიც სირბილით შეცვივდნენ კარში. მაშინვე ბავშვი გამახსენდა. ცნობისმოყვარეობამ მძლია. შიგ შევედი. მკრთალად განათებულ დერეფანში ჯერ ვერაფერი შევამჩნიე. უცბად მომესმა რაღაც შარბურბი, რომელიც კიბის ქვეშიდან მოდიოდა. იქითკენ წავედი და გადავიხედე. კიბის ქვედა მოედანი ერთმანეთს მიხუტებულ ქუჩის მოხეტიალე ძაღვებს გაეფსოთ. ეძინათ. მათ შორის კი მოკრუნჩხული და ძონძებში გახვეული ბავშვი იწვა. ეს ის უპატრონო ბიჭი იყო. იგი ძაღვებს ჩაჰკროდა და ტკბილად ეძინა. ამის მნახველი ახლავს მივხვდი ყველაფერს. მივხვდი, თუ რატომ აჭმევდა ის ძაღვებს გაჭირვებით ნაშოვნ ლუკმას. მისთვის სითბო იყო საჭირო და ძაღვები პურის ფასად ათბობდნენ მას ზამთრის ცივ ღამეში.

2946







საქართველოს  
ისტორია

სტრუქტურა

თურქული ლიტერატურა



ომერ სეიფედინი  
(1884-1920)

სასწაული<sup>1</sup>

ნახევარი საათი გავიდა, რაც ხანძარი მძვინვარებდა, მაგრამ იმ უბნის მკვიდრთ სჯეროდან, რომ ცეცხლი ორ სახლს არ გასცდებოდა და მალე ჩაქრებოდა. იქვე წმინდანის სავანე იყო და, აბა, სხვანაირად როგორ იქნებოდა. ამ წმინდა შენობას ხომ არ მოედებოდა ცეცხლი? სამხრეთის ძლიერი ქარი ქროდა. მეზობელი სახლების სახურავებსა და წმინდანის სავანეს აღმოდებულ ფიცრის ნამტვრევებს აყრიდა. ნამტვრევები ცეცხლის ნაპერწკლებს აფრქვევდა აქეთ-იქით. პოლიციელებს ალყა შემოერთყათ ირგვლივ და გადარჩენილ ნივთებს სდარაჯობდნენ, ვინმემ ხელს არ გააყოლოსო.

ჩიროზ ახმედმა თვალი მოავლო იქაურობას. ის ძველი, გამოცდილი ქურდი იყო. მისთვის ხანძარი ხელის მოთბობას ნიშნავდა, მაგრამ ეს უბანი ძალიან ღარიბი იყო. ახმედმა მშვენივრად იცოდა, რომ ამ აღმოდებულ ქობმახებში საბან-ლოგინის გარდა არაფერი მოიძევებოდა. ქურდებს კი წესად აქვთ ისეთი საქონლის მიგნება, რომელსაც ფასი დიდი ადევს და წონა – ნაკლები.

– დასწყევლოს ალაჰმა, ამ ხანძარს სახეირო პირი არ უჩანს, – წარმოთქვა ახმედმა და თავი გაიქნია.

სავანის წინ ხალხს მოეყარა თავი.

– როგორც კი აქამდე მოატანს, ჩაქრება, – ამბობდნენ ხალხში.

ჩიროზ ახმედი მწვანედ შეღებილი წმინდა შენობის ფანჯრისკენ გაძვრა და მბჟუტავი კანდელით განათებულ აკ-

ლდამას მიაცქერდა. თავთან ორი დიდი შანდალი იდგა. აქეთ-იქით ხალიჩები ეფინა. მერხებზე დიდი წმინდა წიგნები – ყურანები ესვენა.

ახმედმა ხელდახელ იანგარიშა მუქთად ნაშოვნი საქონლის ფასი.

– შანდლები – ათ-ათ ლირად, ოცი ლირა... ხალიჩები – ხუთ-ხუთად, ათი... წიგნები, ნამდვილად ხელნაწერია, ოცი ლირაც ესენი, სულ – ორმოცდაათი, – ჩაილაპარაკა თავისთვის და მწვანე კარისკენ წავიდა.

თავისი ძვალტყავა მხრებით კარი მოსინჯა. შემდეგ ბოქლომს გადახედა და ნელ-ნელა მიაწვა კარს.

ხალხი ხანძრის ცქერით იყო გართული. ჩიროზ ახმედი დიდი ძალის პატრონი იყო, ისეთი არაჩვეულებრივი ფარული ძალისა, როგორც მხოლოდ ქურდებს აქვთ – წრთობისა და ვარჯიშის გარეშე. კარი ნელა აჭრიალდა, ბოლოს ერთი დაიჩხაკუნა და გაიღო.

შიგ შესვლისთანავე ჩიროზ ახმედმა კანდელები ჩააქრო. სავანიდან გასატან ნივთებს ფასი კარგი ჰქონდა, მაგრამ წონაში არცთუ ისე მსუბუქი აღმოჩნდა. ჩიროზი ქურდობის გეგმის დაწყობას შეუდგა, მაგრამ სანამ ბოლომდე მოიფიქრებდა, წვრილმანი საქმე მოაგვარა: შანდლებიდან სანთლები ამოიღო და ძირს დაყარა. წელიდან ტრიპოლური სარტყელი შემოიხსნა და მერხიდან გადმოღებული წიგნები შიგ გაახვია. შემდეგ ცოტა ხანს შედგა, ცხვირი მოიფხანა, ფრთხილად აკრიფა ხალიჩები და აკ-

<sup>1</sup> თურქული მოთხრობები, საბჭოთა მწერალი, 1958.



ლდამას გადააფარა ისე, როგორც ცხენს ქეჯიმს გადააფარებენ ხოლმე. ახლა კარში გაძრომა იყო საჭირო, მაგრამ გარეთ რომ ხალხს მოეყარა თავი? ახმედი აკლდამას მიეყრდნო და ჩაფიქრდა. არც ოქრომკედით მოქარგული გადასაფარებელი იყო იქ დასატოვებელი. უეცრად აკლდამა ადგილიდან დაიძრა. ახმედმა თავი ძლივს შეიკავა. წმინდანი ხომ არ აღდგაო, გაიფიქრა მან, წელში გაიმართა, აკლდამას დახედა და გაიღიმა.

– ფუი, შენ, დაჭედილი არ ყოფილა, – წარმოთქვა ახმედმა, დაიხარა და აკლდამა მალლა ასწია, რათა მის ქვეშ შეეხედა. იგი ძალიან მსუბუქი აღმოჩნდა. თხელი ფიცრისგან იყო შეკრული და ზემოდან მწვანე მაუდი ეფარა. ამასობაში თავის დაღწევის გეგმაც მოიფიქრა.

წიგნები და შანდლები ახმედმა ილიაში ამოიღო, თვითონ აკლდამის ქვეშ შეძვრა და წელ-წელა დაიძრა ადგილიდან. კართან შეჩერდა, ხელი გამოყო და კარი გააღო. მარცხნივ პროსპექტი იყო, აქ შეეძლოთ ხელი ეტაცათ მისთვის. მარჯვნივ უკაცრიელი ქუჩა იყო მრავა-

ლი ნანგრევით, ოღონდ ხანძარი სწორედ იქით იწევდა. აკლდამის ქვეშ შეყუჟულ ახმედს დიდხანს აღარ უფიქრია. იგი ბრახუნით გასცდა კარს.

ხმაურზე ხალხმა პირი იბრუნა და განცვიფრებული დარჩა. ადგილიდან არავინ დაძრულა – წმინდანი აღმდგარიყო და მიდიოდა. ტუმბოებმა მუშაობა შეწყვიტა, მეხანძრეებმა შიშისგან ხელი უშვეს ცულებს, კაუჭიან ჯოხებსა და შლანგებს. აკლდამა პირდაპირ ცეცხლისაკენ მიიწევდა. ათრთოლებული ხალხი ორად გაიპო და გზა დაუთმო. აკლდამამ შიშის მომგვრელი, მედიდური რხევით ჩაიარა მათ შორის და სიბნელეში გაუჩინარდა. ორი სახლი, რომელიც სავანის გვერდით იდგა, დაწვას გადაურჩა.

ხანძარს გადარჩენილი უწმინდანო სავანე უბანში წინანდებურად წმინდა ადგილად ითვლებოდა, ოღონდ მლოცველები ძველებურად ამ ცარიელი შენობისკენ აღარ იქცევდნენ ხოლმე პირს. ახლა ისინი ყიბლის მხარეს იცქირებოდნენ ხოლმე და თან ამბობდნენ:

– ხანძრის ღამეს ჩვენი თვალისჩინი აქეთ წავიდა.

### ქრთამი<sup>1</sup>

ბაზრის მოედანზე ვეება ჩინარებს შრიალი გაჰქონდათ. მიწაზე დაფენილი მათი ქრელი ჩრდილები აქეთ-იქით ქანობდა. ძლიერი ქარი ქროდა. ქარმა ქალღებები არ გამიფანტოსო, ადვოკატმა ჰაჯი ნამიქ ეფენდიმ თავისი ტალავრის მსგავსი მწვანე პატარა დუქნის ფანჯრები ჩამოუშვა, ღია კარის დასაკეტად რომ

მივიდა, თვალი მოჰკრა დაბალი ტანის, ჩამრგვალებულ გლესს, რომელსაც მხარზე ხურჯინი გადაეკიდა, ხელი პალნიანი ცხენის აღვირისთვის ჩაევლო და მისკენ მოდიოდა.

– გამარჯობა, ალი ხოჯა! ამ უდროო დროს აქ რა გინდა? ბაზრობამდე ხომ კიდევ ორი დღეა.

<sup>1</sup> თურქული მოთხრობები, საბჭოთა მწერალი, 1958.



გლებმა კიდევ უფრო მოჭუტა ორი შავი წერტილივით წვრილი თვალი:

– გაგიმარჯოს, ნამიქ ეფენდი! უბედურებას გადავეყარე, საჩივარი მაქვს, – თქვა მან და თავი გაიქნია.

– ეე! მოდი ერთი, მოვილაპარაკოთ.

– მოვილაპარაკოთ.

– აბა, მიაბზე, რა განუხებს.

– შენ თუ არა, მაშ, ვილას უნდა მოვახსენო.

მან ცხენი გრძელ სკამს მიაბა, დუქანში შევიდა, დაბალ, ჭილოფდაფენილ სკამზე ჩამოჯდა; სკამი კაკლის ხის საწერი მაგიდის მარჯვნივ იდგა. ნამიქ ეფენდიმ სათუთუნე გაუნოდა. სტუმარმა პაპიროსი გაახვია და თავისი ამბის თხრობა დაიწყო.

სოფლის მამასახლისის, ჰუისუზ ოღლუს, მიწაზე ალი ხოჯამ ერთ დროს სახლი დადგა. ახლა კი ის მამასახლისი ამ სახლის ხელში ჩაგდებას აპირებდა. განა მიწაც იმისი არ არის, ვისაც სახლი ეკუთვნის?

ნამიქ ეფენდიმ წვერი მოიფხანა და სათვალის ზემოდან გადმოიხედა.

– შენ მართალი არა ხარ, ალი ხოჯა!

– მართალი არა ვარ?

– დიახ.

– არა, მე მართალი ვარ. როცა ვაშენებდი, რატომ მაშინ არ ამოიღო ხმა?

– არ სურდა და ამიტომ არაფერი უთქვამს.

– მე ვიცი, რომ მართალი ვარ, ნამიქ ეფენდი, და საჩივარზე ხელს არ ავიღებ.

– წააგებ.

– წავაგო, არა უშავს რა, ოღონდ საჩივარს მაინც არ მოვეშვები.

ნამიქ ეფენდი საეჭვო საქმეებს ხელს არა ჰკიდებდა ხოლმე და ალი ხოჯას დამცველობაზეც უარი უნდოდა ეთქვა, მაგრამ სოფელ ბოზუიუქის მცხოვ-

რები ოცდაათი წელია, მისი კლიენტები არიან. ისე აქვთ დასწავლილი მისი დუქნის გზა, როგორც სახედარს – ბოსლისა და უკვე წესადაც უდევთ, თუკი რამე საქმე დაურჩათ მთავრობასთან, ყოველთვის მას მიმართავენ ხოლმე. მერე კიდევ, მთელი ზამთრის სარჩოც იქიდან მოსდის.

– კარგი, – წარმოთქვა მან ბოლოს, – ავიღებ მაგ შენს საქმეს, ოღონდ, თუ წავაგეთ, ნუ დამემდურები.

– არ დაგემდურები, მაგრამ რატომ უნდა წავაგოთ?

– იმიტომ, რომ შენ მტყუანი ხარ.

– მოსამართელს რომ ერთი კარგი ყოჩი მივგვარო?

– რა?!

– მაშინაც წავაგებთ საქმეს?

– მაშინ კი უეჭველად წააგებ.

– რატომ?

– ახალი მოსამართლე, შენ რომ გგონია, ისეთი კაცი არ არის.

ალი ხოჯა ვერ მიმხვდარიყო, რატომ ღელავდა ვექილი. მან დიდხანს უსმინა ახალი მოსამართლის ქება-დიდებას.

ის კაცი ქრთამისა და საჩუქრების დაუძინებელი მტერი ყოფილა. ცამდე მართალმა მომჩივანმაც რომ შესთავაზოს ქრთამი, მაშინვე დამნაშავედ გამოიყვანს.

– ალაჰმა ნუ მოაკლოს ამ ქვეყანას ასეთი მართალი ადამიანები, – თქვა ალი ხოჯამ.

– ამინ, ამინ, – დაუდასტურა ნამიქ ეფენდი.

მთელი ერთი საათი საჩივარ-სამართალზე ისაუბრეს. შეთანხმდნენ, რომ ნამიქ ეფენდი იკისრებდა დაცვას, მაგრამ თვით ადვოკატს მოგების იმედი არა ჰქონდა. ამ საქმეს ხათრის გულისთვის ჰკიდებდა ხელს. საჩივრის უსაფუძვლობა იმდენად აშკარა იყო, რომ...



\*\*\*

ორი კვირის შემდეგ ალი ხოჯა მწვანე დუქნის კარში გამოჩნდა. ნამიქ ეფენდი თხოვნას წერდა. სათვალის ზემოდან თავის კლიენტს რომ მოჰკრა თვალი, გაიღიმა:

– კეთილი იყოს შენი მოსვლა. რას იტყვი, მოვიგეთ საქმე! – მიახარა მან ალი ხოჯას.

ნამიქ ეფენდი მთელი კვირა განცვიფრებული იყო, როგორ გამოიტანა მოსამართლემ ასეთი არასწორი გადაწყვეტილებაო.

– ჩემი გაგზავნილი ყოჩის წყალობით მოვიგეთ, – ცივად უპასუხა ალი ხოჯამ.

– რა?! შენ ყოჩი გაუგზავნე მოსამართლეს?!

– დიახ!

– მერე, როგორ გაბედე...

– კი მაგრამ, შენ არ მითხარი, ქრთამი სძულს და, ვინც საჩუქარს გაუგზავნის, მტყუანად გამოიყვანსო?

– გითხარი.

– მეც, ყოჩი რომ გავუგზავნე, ჩემი სახელი არ გამიმხელია.

– მაშ, რა ჰქენი?

– ჩემი მონინააღმდეგის, მამასახლის ჰუისუზ ოლლუს სახელით გავუგზავნე.

– !!!

მოხუც ადვოკატს სანერ-კალამი ხელიდან გაუვარდა. სკამის ზურგს მიეყრდნო და გაბრწყინებულ ორ პატარა შავ თვალს მიაშტერდა. გარეთ ისევ ქანაობდნენ ჩინარები. თუმცა კარში ალი ხოჯა იდგა, მაგრამ მათი შრიალი მაინც აღწევდა შიგ და იღუმალი ჩურჩულით ავსებდა ოთახს, რომლის კედლებზე ძველი სავილაიეთო გაზეთები იყო აკრული.



რეშათ ნური გიუნთექინი  
(1889-1956)

ნარჩიტა<sup>1</sup>

(ნანყვეტი რომანიდან)

B... სექტემბერი, 19... წელი

მეოთხე კლასში ვიყავი. თორმეტი წლისა ვიქნებოდი. ერთხელ ფრანგულის მასწავლებელმა, დაი ალექსიმ, საწერი დავალება მოგვცა:

– ეცადეთ აღწეროთ თქვენი პირველი მოგონებები, – გვითხრა მან, – ვნახოთ, რა გაგახსენდებათ. თქვენთვის ეს გონების საუკეთესო ვარჯიში იქნება.

არასდროს დამავიწყდება. ჩემი მოუსვენრობისა და ლაყბობისაგან თავმოებურებულმა მასწავლებლებმა ამხანაგებს მომაშორეს და კუთხეში დამსვეს ერთადგილიან მერხზე.

როგორც დირექტორმა თქვა, მე ეს გადასახლება მისჯილი მექნებოდა მანამ, სანამ თავს არ დავანებებდი „გაკვეთილების დროს მეზობლებთან ლაპარაკს და არ შევეჩვიეოდი მასწავლებლებისთვის წესიერად ყურის გდებას“.

მერხის ცალ მხარეს ვეება ხის ბოძი იყო აღმართული. ამ ჩემს ჭკუადამჯდარ, ჩუმ და ახმახ მეზობელს თავზევით ძალა არ შესწევდა და მედგრად იტანდა ჩემგან დანის წვერით მიყენებულ ჭრილობებს.

მეორე მხარეს მოჩანდა მუდამ დარაბებმიხურული მაღალი ფანჯარა, რომელიც თითქოს იმისათვის იყო გაჭრილი, რომ სამონასტრო ყოფის გრილი და უსიხარულო მწუხრი უზრუნველყო. მე ერთი მნიშვნელოვანი აღმოჩენა მოვახდინე. გულით მერხს რომ დავეყრდნობოდი და ცოტა თავს ავწევდი, დარაბის

ლარტყებს შორის ცის ნაფლეთი და დიდი აკაციის ფოთლებს შუა სახლის ერთი ფანჯარა და მოაჯირი მოჩანდა.

სიმართლე გითხრათ, სანახაობა დიდად სახარბიელო არ გახლდათ; ფანჯარა მუდამ დაკეტილი იყო, აივნის მოაჯირზე კი ყოველთვის პატარა ბავშვის ლეიბი და საბანი იყო გადმოფენილი.

მაგრამ მე ამითიც კმაყოფილი ვიყავი.

გაკვეთილზე, როცა ნიკაპით გადაჯვარედინებულ ხელებზე დაყრდნობილი ცას გავცქეროდი ხოლმე, მასწავლებლებს ჩემი ასეთი შთაგონებული იერი გამოსწორების დასაწყისად მიაჩნდათ და ხარობდნენ. ასე ვატყუებდი მათ. მეჩვენებოდა, თითქოს ვხედავდი იმას, რასაც გვიმალავდნენ და შურისგების სიხარულს განვიცდიდი.

დაი ალექსიმ ახსნა-განმარტება დაამთავრა და საწერად დაგვანება თავი.

პირველი მოწაფეები, რომლებიც წინა რიგებს ამშვენებდნენ, მაშინვე შეუდგნენ წერას. მართალია, მე იმათ გვერდით არ ვიჯექი, მაგრამ თითქოს აქედანაც ვხედავდი, რასაც წერდნენ. მათი ნაწერი დაახლოებით ამგვარი პოეტური სიყალბე იყო: „პირველი, რაც მახსენდება, არის ჩემს პატარა საწოლზე დახრილი საყვარელი დედიკოს ოქროსფერი თმებით შემკული ნაზი თავი და ცისფერი, სიყვარულით მომღიმარი თვალები“. ნამდვილად კი მათ დედიკოებს,

<sup>1</sup> იბეჭდება პირველად.



ვინმეს სახე მოსვირინგებული არ ჰქონდა, ულამაზო მეგონა. ჩემთვის პირველი დიდი მწუხარებაც ფატმასთან განშორება იყო. ხეტიალ-ხეტიალში ქერბელაში ჩავედით. ოთხი წლისა ვიყავი. ეს ისეთი ასაკია, საიდანაც უკვე ყველაფერი მახსოვს. ფატმას ბედი ეწვია. დღევანდელივით თვალწინ მიდგას ის დღე, როცა საპატარძლო ფატმა კუთხეში იყო მიმჯდარი. ოთახი სავსე იყო ფატმასავით სვირინგით სახეაჭრელებული ქალებით, რომლებიც მზეთუნახავებად მეჩვენებოდნენ. ისინი ხელიდან ხელში მატარებდნენ და ბოლოს ფატმასთან დამსვამდნენ ხოლმე.

მახსენდება შუაში ჩადგმული თეფშები, საიდანაც ჩვენ მუჭით შევექცეოდით საჭმელს. ბოლოს ეყვნებიანი დაირებისა და თასის მოყვანილობის დოღების ბაგიბუგისაგან გაბრუებულს ჩამეძინა ჩემი ძველი ძიძის კალთაში.

როცა ქერბელაში ფატმას ვაყი, ჰუსეინი, მოკლეს, მაშინ თვითონ ფატმა ცოცხალი იყო თუ არა, აღარ მახსოვს, მაგრამ ის ოხვრა, რომელიც ამ შავი დღის მომსწრე უბედურ ქალს აღმოხდებოდა, არაფერი იყო იმ ვაისთან შედარებით, რომელიც მე ავტეხე სახლში ქორწილის პირველ ღამეს, როცა ვილაც უცხო ქალის გვერდით აღმოვჩნდი.

ერთი სიტყვით, ქერბელა რომ ქერბელაა, ასეთ ვაი-ვუის, მგონი, ისიც არ მოსწრებია. ყვირილისაგან ხმა წამივიდა. მთელი დღეები დიდი ადამიანივით შიმშილობა გამოვაცხადე.

გამზრდელის გამო მწუხარება შემდეგში ერთმა კავალერიის ჯარისკაცმა, სახელად ჰუსეინმა, დამავინყა. ჰუსეინი მეცადინეობის დროს ცხენიდან იყო ჩამოვარდნილი და დაკოჭლებული. მამაჩემმა იგი სახლში წამოიყვანა. ჰუსეინი რალაც უცნაური კაცი იყო და მალე შემიყვარა. მის ასეთ სიყვარულს მე მოუ-

ლოდნელი და არასაპატიო ორგულობით ვუპასუხე. ერთი ის იყო, რომ ფატმასავით ერთად არ ვწვებოდით, თორემ, მამლის ყივილზე თვალებს გავახელდი თუ არა, სულმოუთქმელად გავრბოდი მისი ოთახისაკენ, ცხენივით გადავაჯდებოდი გულზე და თვალებს ვუხელდი.

ისევე, როგორც ფატმამ ბალსა და მინდორს, ჰუსეინმა ყაზარმებსა და ასკერებს მიმარჩია. მე სხვაგან არსად შემხვედრია თამაშობების გამოგონების ისეთი უნარი, როგორც ამ ვეება, ულვაშებიან კაცს ჰქონდა. ყველა ძალიან ლამაზი, შფოთიანი და სახიფათო იყო. მაგალითად, ბურთივით ამაგდებდა ჰაერში და ისევ დამიჭერდა ან კიდევ თავზე დამაყენებდა, ფეხებში ხელებს წამავლებდა და ხტუნვა-ტრიალს მოჰყვებოდა. ისეთი სიამოვნება, როგორსაც მე სულშეხუთული, თმებჩამონენილი და თავბრუდახვეული ვგრძნობდი, შემდეგ არაფრისგან განმიცდია.

ზოგჯერ არც ხიფათი აგვცდებოდა. მაგრამ მე და ჰუსეინს პირი გვექონდა შეკრული. თამაშის დროს სულიც რომ დამელია, არ ვიტირებდი და არც არავისთან ვიჩივლებდი. ამან მოზრდილი ადამიანივით საიდუმლოების შენახვას მიმარჩია და არა იმიტომ, რომ მე თვითონ ვიყავი ალალი, არამედ უფრო იმის შიშით, რომ, ასე თუ არა, ჰუსეინი ჩემთან აღარ ითამაშებდა. ბავშვობაში ის მოუქნელს მეძახდა. ალბათ, მართალიც იყო. ვისთანაც უნდა მეთამაშა, რამე უნდა მომეწია მისთვის და ამელრიალებინა. ეს ჩვეულება, ალბათ, ჰუსეინისგან წასწავლი თამაშობების შედეგი იყო.

ისევე, როგორც ჰუსეინი, მეც გასაჭირის დროს აურზაურს არ ვტეხდი და უბედურებას სახეგალიმებული ვხვდებოდი.

ჰუსეინი ზოგჯერ ყაზარმაში საზს დააკვრევიანებდა ხოლმე ანატოლიელ



ჯარისკაცებს, მე ბრტყელ თავზე შემისვამდა და უცნაურად ცეკვავდა.

ერთხანს მე და ის ცხენის ქურდობას შევეჩვიეთ. როცა მამაჩემი სახლში არ იყო ხოლმე, ჰუსეინი თავლიდან ცხენს გამოაპარებდა, მე წინ დამისვამდა და საათობით დამაქროლებდა ველად. მაგრამ ჩვენი ეს გართობა დიდხანს არ გაგრძელებულა. ღმერთო, შეგცოდე და, მგონი, მზარეულმა ქალმა დაგვასმინა მამაჩემთან და, როცა საწყალმა ჰუსეინმა მისგან ორი სილა იგემა, მერე ცხენთან მიკარებასაც ველარ ბედავდა.

ხალასი სიყვარული უჩხუბრად და უდავიდარაბოდ არ არსებობსო, ნათქვამია, და მე და ჰუსეინიც დღეში, სულ ცოტა, ხუთჯერ მაინც წავკინკლავდებოდით.

უცნაური ცხვირის ჩამოშვება ვიცოდდი. ოთახის ერთ კუთხეში ჩავიჩოქებდი და სახეს კედლისკენ ვიქცევდი. ჰუსეინი ხუთ წუთს მაცდიდა ხოლმე. შემდეგ კი შევეცოდებოდი, უეცრად წელში მწვდებოდა და, აყვირებულს, ჰაერში ამიტაცებდა.

ერთხანს მაინც განვაგრძობდი მის მკლავებში ჭინჭყლობას, მაგრამ ბოლოს თანახმა ვიყავი, ლოყაზე მეკოცნა მისთვის და ვურიგდებოდი.

ჰუსეინისა და ჩემი მეგობრობა ორ წელიწადს გაგრძელდა, მაგრამ მაშინდელი წლები ახლანდელს ვერ შეედრება. ისეთი გრძელი იყო, ისეთი გრძელი, რომ...

\*\*\*

ცოტა უხერხული ხომ არ არის, რომ ბავშვობის დროინდელი მოგონებების გახსენებისას სულ ფატმასა და ჰუსეინზე ვლაპარაკობ?

მამაჩემს ნიზამეთინი ერქვა. ის კავალერიის ათასისთავი იყო. იმ წელს, როცა მან დედაჩემზე იქორწინა, იგი დი-

არბაქირში გააგზავნეს. ის იყო და ის. ჩვენ სტამბოლში აღარ დავბრუნებულვართ. დიარბაქირიდან მამაჩემი მოსულში, შემდეგ ხანაკინში და იქიდან კი ბაღდადში და ქერბელაში გადავიდა. ერთ ადგილას მიყოლებით ერთი წელიც კი არ დარჩენილა.

დედაჩემს მე მამსგავსებენ. ერთი სურათი გვაქვს დარჩენილი, გათხოვების წელს გადაღებული, სულ მთლად მე მგავს. ოღონდ საწყალი ქალი ჯანმრთელობით არ მმგვანებია. ძალიან სუსტი ყოფილა. მისი ორგანიზმი ვერ უძლებდა მუდმივ მოგზაურობას, მთის მკაცრ ჰავას, ველების სიცხეს. მერე, მგონი, რაც მძიმე ავადმყოფობაც უნდა ჰქონოდა. საწყალი ქალი, რაც გათხოვდა, მას მერე მთელი თავისი ცხოვრება სულ იმის ცდაში იყო, რომ თავისი სწეულება დაემალა... რა ექნა, ძალიან ჰყვარებია მამაჩემი და შიშობდა, რომ ძალით დააშორებდნენ ერთმანეთს...

მამაჩემი, რომელიც სულ უფრო და უფრო შორდებოდა სტამბოლს, ყოველი მგზავრობის წინ თურმე ეტყოდა ხოლმე:

– სულ თუ არა, ორი-სამი თვით მაინც გაგაგზავნი დედასთან, ისიც მოხუცდა, საწყალი... ვინ იცის, როგორ უნდა შენი ნახვა.

მაგრამ დედაჩემს სწყინდა:

– განა ასეთი იყო ჩვენი პირობა? განა ერთად არ უნდა დავბრუნებულიყავით სტამბოლს?

ავადმყოფობაზე კი, მე არაფერი მიჭირს, ცოტა გადაღლილი ვარ... ეს ორი დღეა, ამინდი შეიცვალა და იმიტომ, თორემ გამივლისო, იტყოდა ხოლმე.

სტამბოლის ნახვის სურვილს მამაჩემს უმაღლავდა... მაგრამ განა შეიძლებოდა ამის დაფარვა?

ორი წუთის მიძინებულისც არ იყო ხოლმე, რომ გამოელვძებოდა და ქალენ-



დერში ჩვენს სახლსა და ქალაში თუ ბოსფორის პირას გატარებულ გაუთავებელ სიზმარს მოჰყვებოდა... ორ წუთში რომ ამოდენა სიზმარი ჩაატო, კაცს ძალიან ბევრჯერ, ნამდვილად ძალიან ბევრჯერ უნდა გქონდეს ნანახი ეს ადგილები.

დიდედაჩემს ბევრი უვლია სამხედრო სამინისტროსა და დიდკაცების კარდაკარ, ტირილით შესთხოვდა, მაგრამ მის ხვეწნა-მუდარას არავითარი შედეგი არ გამოუღია.

ბოლოს, როცა დედაჩემის სენმა იმძლავრა, მამას ერთი თვის შვებულება უთხოვია სტამბოლში წასყვანად და პასუხის მიღებამდე გასდგომია გზას.

დღევანდელივით მახსოვს უდაბნოში ჩვენი მოგზაურობა მაჭფებებით<sup>1</sup>.

ბეირუთში ზღვის ნახვამ თითქოს ცოტა გამოაცოცხლა დედაჩემი. სახლში, სადაც ჩვენ გავჩერდით, დედა ლოგინზე დამისვამდა ხოლმე, თმებს მვარცხნიდა, ჭუჭყიანი ხელებისა და აწყვეტილი ღილების დანახვაზე თავს მკერდზე მომაყრდნობდა და ატირდებოდა.

ერთ დღეს ფეხზეც კი დადგა; ზანდუკიდან ახალი ტანსაცმელი ამოიღო და მოირთო. საღამოს ქვევით ჩავედით მამის შესახვედრად. მამაჩემმა ჩემში ველური ხასიათის და მკაცრი მეომრის მოგონება დატოვა. მაგრამ, დედა ფეხზე რომ დაინახა, არასდროს დამავინწყდება, როგორ სიხარულით გამოიქცა, ახალფეხადგმული ბავშვივით მკლავებში წაავლო ხელი და აქვითინდა.

ეს იყო უკანასკნელი დღე, რომელიც ჩვენ ერთად გავატარეთ. მეორე დღეს დედაჩემი მკვდარი იპოვეს თავლია ზანდუკთან; თავი თეთრეულის ბოლჩაზე დავარდნოდა და ბაგეებზე სისხლი სდიოდა.

ექვსი წლის ბავშვი უკვე კარგად

უნდა ერკვეოდეს ბევრ რამეში, მაგრამ მე რატომღაც ვერაფერს ვხვდებოდი. სახლი, სადაც ჩვენ ვცხოვრობდით, ხალხმრავალი იყო. მახსოვს, მთელი დღეები როგორ ვერხუბებოდი ბავშვებს დიდ ბაღში, როგორ ვხეტილობდით მე და ჰუსეინი ქუჩებში, ზღვის პირას, მეჩეთის ეზოსავით გუმბათოვან ადგილებში.

მას შემდეგ, რაც დედაჩემი უცხო მინას მიაბარა, მამაჩემისათვის სტამბოლში დაბრუნებას რალა ფასი ჰქონდა. მგონი, ცოტა არ იყოს, დიდედაჩემთან და დეიდებთან შეხვედრასაც ერიდებოდა... თუმცა, ამის მიუხედავად, ჩემი იქ გაგზავნა ვალად მიუჩნევია. გარდა ამისა, ბუნებრივია, რომ ქალიშვილის აღზრდა ყაზარმაში, ჯარისკაცებთან მან შეუძლებლად დაინახა.

\*\*\*

სტამბოლს მე ჩვენმა ჰუსეინმა ჩამიყვანა. შესანიშნავ გემზე ცუდად ჩაცმული ჯარისკაცი ხელში პატარა გოგონათი... ეს სანახაობა, ვინ იცის, რამდენს საცოდაობად და სამწუხაროდ ერჩენა. მაგრამ ამ მოგზაურობაში ჩემთან ვინმე სხვა რომ ყოფილიყო და არა ჰუსეინი, ასეთი ბედნიერი ნამდვილად არ ვიქნებოდი.

ჩვენი ვილის უკან, ტყეში, ქვის აუზი იყო, რომლის პირასაც იღლიებთან მკლავებმოკვეთილი შიშველი ბავშვის ქანდაკება იდგა.

ჩამოსვლის პირველ დღეებში ეს დამტვრეული ქანდაკება მზისა და ნესტისაგან გაშავებულ ხეიბარ ველურ ბავშვად მეჩვენებოდა. მგონი, შემოდგომა იდგა, რადგან აუზის მომწვანო წყალი წითელი ფოთლებით იყო დაფენილი. ამ ფოთლების თვალიერებისას მათ ქვეშ მოცურავე რამდენიმე ოქროს თევზს მოვკარი თვალი და დიდედაჩემის მიერ

<sup>1</sup> მაჭფე - აქლემზე გადაკიდებული თავდახურული კალათა.



გულმოდგინედ შეკერილი აბრეშუმის კაბითა და ახალი ფეხსაცმლით პირდაპირ აუზში შევტოპე.

ირგვლივ ერთი წივილ-კივილი ატყდა. ჯერ გონსაც ვერ მოვსულიყავი, რაში იყო საქმე, რომ დეიდებმა ხელი მტაცეს, ზემოთ ამიყვანეს და კოცნა-ლანძღვაში ტანსაცმელი გამომიცვალეს.

ამ ყვირილითა და აურზაურით შეშინებული აუზში ჩასვლას ველარ ვბედავდი. ნავნებოდი ირგვლივ დაყრილ ქვიშაზე და წყლისკენ ჩავკიდებდი თავს.

ერთ დღეს, ასე ნაწოლილი, თევზების ცქერით ვიყავი გართული. ახლაც დღევანდელივით მიდგას თვალწინ. იქვე მოშორებით ბალის სკამზე იჯდა დიდედაჩემი თავისი განუყრელი შავი მოსასხამით. მის გვერდით ჰუსეინი იდგა დაჩოქილი, გეგონებოდათ, ლოცულობსო.

წყნარად საუბრობდნენ რალაცაზე. ალბათ, თურქულად ლაპარაკობდნენ, რადგან მე არაფერი მესმოდა. მაგრამ მათმა ხმამ და დროდადრო ჩემკენ გამოხედვამ დამაეჭვა. კურდღელივით დავცქვიტე ყურები. მე თვალს ველარ ვადევნებდი სიმითის ნამცეცების გარშემო მოფუსფუსე თევზებს და წყალში დიდედაჩემისა და ჰუსეინის ანარეკლს მივჩერებოდი. ჰუსეინი ჩემკენ რომ მოიხედავდა, ვეება ცხვირსახოცით ცრემლებს ინმენდდა ხოლმე.

ბავშვებს ზოგჯერ თავიანთი ასაკის შეუფერებელი გუმანი აქვთ.

ამ საიდუმლო გადალაპარაკებაში მე ლალატის სუნი მეცა: მე და ჰუსეინი უნდა დაგვაშორონ!

რატომ? ჩემი ხნის ბავშვი ასეთ წვრილმანებს, აბა, რას მიხვდებოდა. ის კი ძალიან კარგად მესმოდა, რომ ეს განშორება, როცა მისი დრო მოვიდოდა, ისეთი გარდუვალი უბედურება იყო, რომელსაც წინ ვერ დაუდგებოდი ისევე, როგორც მზის ჩასვლასა თუ წვიმას.

იმ ღამეს მე უეცრად გავახილე თვალები. ჩემი პატარა საწოლი დიდედაჩემის საწოლის გვერდით იდგა. წითელი ღამა, რომელიც ჩვენს თავთან ენთო, ჩამქრალიყო. მაგრამ ფანჯრიდან შემოსული მთვარის შუქი ოთახს თეთრად ანათებდა. აღარ მეძინებოდა. დაუძლეველმა მწუხარებამ შემიპყრო. იდაყვებზე წამოწეულმა დიდედას გადავხედე და, როცა დავრწმუნდი, რომ ეძინა, ჩუმად გამოვძვერი საწოლიდან და ფეხის წვერებზე შემდგარი ოთახიდან გავედი. სხვა ბავშვებივით როდი მეშინოდა სიბნელისა და მარტოობისა. კიბის საფეხურების ქრიალზე მოზრდილივით შევჩერებოდი ერთ ადგილზე და ისევ ფრთხილად განვაგრძობდი გზას. ასე მივალწიე დერეფანს.

კარი გადაერაზათ, მაგრამ ბაღში გასასვლელი კარის გვერდით ფანჯარა ღია დარჩენილიყო და მეც ერთ წამში გარეთ აღმოვჩნდი.

ჰუსეინს ბალის მეორე ბოლოში ეძინა მებალის ქოხში. გავიქეცი. თეთრი ღამის პერანგის გრძელი კალთები ფეხებში მედებოდა. მივედი და რკინის საწოლზე მძინარე ჰუსეინს ლოგინში ჩავუხტი.

ჰუსეინმა მაგარი ძილი იცოდა. არაბეთში რომ ვიყავი, მისი გაღვიძება მთელ საქმედ ღირდა. მისთვის თვალები რომ გამეხილა, ცხენივით გადავაჯდებოდი გულზე, ვხტუნავდი, გრძელ უღვაშებში აღვირივით ჩავავლებდი ხელს და ვენეოდი, ვყვიროდი. მაგრამ ახლა მეშინოდა მისი გაღვიძებისა, რადგან ძველებურად გულზე აღარ მიმინვენდა და, რამდენიც უნდა მეთხოვა, მაინც დიდედაჩემს ჩამაბარებდა.

მე კი მინდოდა, რომ ეს უკანასკნელი ღამე მის მკერდზე გამეტარებინა.

ჩემი იმღამინდელი საქციელი ჩვენს ოჯახში კარგა ხანს იყო სალაპარაკო.

დიდედაჩემმა, დილას რომ გაიღვი-



ძალია მე ლოგინში ვერ მნახა, კინაღამ ქკუა დაკარგა... რამდენიმე წუთში მთელი ვილა ფეხზე დადგა... ხელში ლამპე-ბითა და სანთლებით ბაღსა და ზღვის ნაპირს მოედნენ... არაფერი დაუტოვე-ბიათ, არც სხვენი და არც ქუჩა, არც ნა-ვების საყუდელი და არც აუზი, რომელ-შიც ორი გოჯი სიღრმის წყალი იდგა. საარწყავი წყლის ჭაში, რომელიც იქვე იყო, ჩვენ მიზობლად, ფარნები ჩაუშ-ვეს...

ბოლოს და ბოლოს, დიდუდაჩემს ჰუსეინი გახსენებია, მისკენ გაქცეულა და მეც იქ ვუნახივარ, ჰუსეინს მაგრად ჩაკრული და ჩაძინებული.

განშორების ტრაგედია ახლაც მახ-სენდება და მეცინება. მე არ მახსოვს, რომ ისეთი მლიქვნელობა სხვა დროს კიდევ ჩამედინა. ჰუსეინი კართან ჩაჩო-ქილიყო და ტიროდა, მე კი ბაღდადსა და სირიაში არაბი მათხოვრებისგან ნას-წავლ ლოცვას ვამბობდი და დიდუდაჩემ-სა და ჩემს დეიდებს კაბის კალთებს ვუ-კოცნიდი.

რომანებში დაღვრემილი ადამიანი მხრებჩამოყრილი, თვალებჩამქრალი, უმოძრაო და უენო, ერთი სიტყვით, რა-ღაც საცოდავი გამოჰყავთ ხოლმე.

მე კი ყოველთვის პირიქით მემარ-თებოდა. როცა კი ღრმა მწუხარება შე-მიპყრობდა, თვალები გამიბრწყინდებო-და, იერი და მოძრაობები გამომიციოც-ხლდებოდა და საკუთარ თავში ველარ ვეტიოდი. არაფერს არაფრად ვამგდებდი, ვხარხარებდი და ნაირ-ნაირ ოინებსა და სისულელებს ჩავდიოდი. თან კი მეგო-ნა, რომ ეს შესანიშნავი იყო ისეთი ადა-მიანისათვის, რომელსაც არ შეეძლო გა-მოტყდომოდა არც ახლობელსა და არც გარემეს.

მახსენდება, ასეთ რამეებს ჰუსეი-ნის წასვლის შემდეგაც ვაკეთებდი. ცელქობას საზღვარი არ ჰქონდა, ჩემ

გასართობად მოყვანილ ნათესავ ბავ-შეებს სულს ვუნყალებდი.

ჩემდა სამარცხვინოდ, ჰუსეინი სულ მალე, ადვილად ამოვიღე გული-დან. არ ვიცი, მაგრამ შეიძლება მარ-თლაც ვიყავი მასზე ნაწყენი. მისი სახე-ლის ხსენებაზე სახე მომელმიჭებოდა, ვიფურთხებოდი და თან გავიძახოდი თურქულად, რომელსაც ის-ის იყო, ვსწავლობდი: ჰუსეინი ცუდი, ჰუსეინი ფინთი-მეთქი...

მიუხედავად ამისა, სანყალი ცუდი ჰუსეინის მიერ ბეირუთში ჩასვლისთანა-ვე გამოგზავნილმა ერთმა ყუთმა ფინიკ-მა თითქოს დამამშვიდა. და, თუმცა ძა-ლიან მეშინოდა მათი გათავებისა, კო-ლოფი ერთ ჭამაზე მაინც ამოვასუფთა-ვე. საბედნიეროდ, დარჩა კურკები, რაც მთელ კვირას მეყო გასართობად. ერთი ნაწილი მსხვილ მძივებთან ერთად, რომ-ლებსაც ჯორებს ჰკიდებენ ხოლმე კი-სერზე ავი თვალისგან, ძაფზე ავასხი და კაციჭაძიების დიდებული მძივებით კი-სერზე დავიკიდე. დანარჩენები ბაღში ჩავრგე აქა-იქ. მთელი თვეების განმავ-ლობაში ყოველ დილით ვრწყავდი და ფინიკის ტყის ამოსვლას ველოდი.

სანყალ დიდუდაჩემს თავგზა ჰქონ-და აბნეული. ჩემი დამორჩილება მარ-თლაც შეუძლებელი იყო. დილაუთენია ვიდვიძბდი და საღამომდე, სანამ დად-ლილობისგან ქანცი არ გამომეღეოდა, ვცელქობდი და ერთ აურზაურში ვიყავი. ჩემი ხმა მიწყდებოდა თუ არა, ყველას ელდა ეცემოდა, რადგან ეს იმას ნიშნავ-და, რომ მე ან რაიმე გავიჭერი და ჩუ-მად ვცდილობ სისხლის შეჩერებას, ან სიმაღლიდან გადმოვვარდი და სადმე ვიგრიხები, რომ ტკივილისაგან არ წამო-ვიყვირო, ან კიდევ სკამს ფეხებს ვახერ-ხავ, ლეიბის პირებს ვღებავ, ან სხვა ამ-გვარი დანაშაულით ვარ გართული.

ერთ დღეს ხეზე მივპვრებოდი, რომ



ჩხირებისა და ჩვრებისაგან ჩიტებისთვის ბუდე გამეკეთებინა; მეორე დღეს კი სახურავზე ავხობდებოდი საკვამლე მილიდან ქვის ჩასაგდებად და მზარეულის შესაშინებლად.

დროდადრო ჩვენს სახლში ერთი ექიმი მოდიოდა ხოლმე. ერთხელ ცარიელ ეტლში ჩავხტი, რომელიც გარეთ ექიმს ელოდა და ცხენებს მათრახი გადავუჭირე; ერთხელ კიდევ სარეცხის დიდი ვარცლი ზღვის პირამდე ჩავათრიე, წყალში ჩავუშვი და გავცურე. სხვა ოჯახებში როგორ არის, არ ვიცი და ჩვენთან ობოლი ბავშვის ცემა ცოდვად ითვლებოდა. ძალიან რომ გავიდოდი თავს, მკლავში ხელს წამავლებდნენ და ოთახში ჩამკეტავდნენ.

ერთი უცნაური ნათესავი გვყავდა. მას ყველა ბავშვი “წვერებიან ძიას” უწოდებდა. ეს წვერიანი ძია ჩემს ხელებს “წმინდანების ცხაურს” ეძახდა, რადგან ვერასდროს ვერ ნახავდით, რომ ზედ ჭრილობა არ მქონოდა, ან დაღურჯებული არ ყოფილიყო. ხელები სულ მუდამ შეხვეული მქონდა.

ჩემს ტოლებს ვერ ვენყობოდი. უფროს ბავშვებსაც კი ჩემი შიში ჰქონდათ. და ათასში ერთხელ, როცა ჩემს გულში სიყვარულის ნაპერწკალი გაღვივდებოდა ხოლმე, მაშინაც კი ეს ახალი უბედურება იყო. ადამიანური სიყვარული და ნაზად მოფერება მე არ ვიცოდი. თუ ვინმე შემეყვარდებოდა, მგლის ლეკვივით ვეძგერებოდი, ხელებზე ვკბენდი, პირისახეს ვაკანრავდი, ვანჯღრევდი, ერთი სიტყვით, გადავრევდი ხოლმე.

ჩემს ნათესავ ბავშვებს შორის მხოლოდ ერთის მიმართ მქონდა რალაც გაუგებარი რიდი.

ეს იყო დეიდაჩემის, ბესიმეს, ვაჟი, ქამრანი. სხვათა შორის, მას უკვე ბავშვიც აღარ ეთქმოდა. ორი ჩემი ხნისა იყო. ძალიან დამჯერი და დინჯი. ბავ-

შვებთან თამაში მაინცადამაინც არ უყვარდა, ჯიბეებში ხელებჩანყობილი თავისთვის სეირნობდა ზღვის ნაპირზე ან წიგნს კითხულობდა ხოლმე ხის ძირას.

ქამრანს ოქროსფერი ხუჭუჭა თმა და თეთრი, ნაზი და პრიალა კანი ჰქონდა. ისეთი პრიალა, თითქოს გამბედაობა რომ მყოფნოდა, ყურებში მეტაცა ხელი და ახლოს შემეხედა მისი ლოყებისთვის, შიგ, როგორც სარკეში, ჩემს თავს დავინახავდი.

თუმცა, მიუხედავად ჩემი რიდისა, ერთ დღეს ქამრანსაც წავეჩხუბე: ზღვის პირას კალათით ქვებს ვეზიდებოდი. ერთი ქვა გადმოვარდა და ქამრანს ფეხზე დაეცა. არ ვიცი, ქვა იყო ისეთი მძიმე, თუ თვითონ იყო ძალიან განაზებული, უეცრად ერთი ყვირილი და ვაი-ვუი მორთო. გავშეშდი. მაიმუნივით საჩქაროდ ავცოცდი დიდ ჩინარზე. ვერც ლანძღვამ, ვერც მუქარამ და ვერც ხვენწა-მუდარამ ძირს ვერ ჩამომიყვანა. ბოლოს მებაღეს დაავალეს ჩემი ხიდან ჩამოსმა. მაგრამ, რამდენსაც ის ჩემკენ მოინევდა, მე იმდენად უფრო მალლა მივძვრებოდი. სანყალი კაცი მიხვდა, რომ უკან არ დავიხევდი, ისეთ ტოტზე გავიდოდი, რომელიც ვერ გამიძლებდა, რალაც უბედურება მოხდებოდა და ისევ ძირს ჩასვლა ამჯობინა.

\*\*\*

ერთი სიტყვით, იმ საღამოს დაბინდებამდე ჩიტვიით ხის ტოტზე ვესკუპე.

ჩემს საცოდავ დიდედას ძილი გავუტეხე. სანყალმა ქალმა მთელი თავისი სიყვარული ხომ ჩემზე გადმოიტანა. როცა ზოგჯერ, დილაობით, ჯერ ისევ დაღლილს ჩემი ხმაური გააღვიძებდა ხოლმე, იგი ლოგინზე წამოჯდებოდა, მხრებში ხელებს წამავლებდა, შემანჯღრევდა და დედაჩემს შეჰლალადებდა, ეს რა მიყავი, შენ ნახვედი და ჩემი ხნის ქალს მხეცი



დამიტოვე სატანჯველადო.

მაგრამ ისიც ცხადი იყო, იმ წუთში რომ დედაჩემი გამოცხადებოდა და ეთქვა, ან მე, ან ეს მხეციო, დიდედაჩემი უეჭველად მე ამირჩევდა და დედაჩემს კი უკან გაისტუმრებდა.

ღიახ, ავადმყოფი და მოხუცი ქალისთვის ძნელი იყო დილით ადგომა, მით უმეტეს, რომ ჯერ წინა დღის დაღლილობასაც გრძნობდა, მაგრამ ასევე ძნელია, თუნდაც მოსვენებული სხეულისათვის, იღვიძებდე მუდამ წარსულის მოგონებებით და გატანჯული სულით...

ასე რომ, მიუხედავად იმ დიდი საზრუნავისა, რომელიც მე დიდედას გავუჩინე, ის მაინც მაყოლებდა გულს და ბედნიერი იყო.

\*\*\*

ცხრა წლისა ვიყავი, როცა დიდედა გარდაგვეცვალა. მამაჩემი შემთხვევით სტამბოლში იყო.

საწყალი ამჯერად ტრიპოლიდან ალბანეთში გადაეყვანათ. სტამბოლში მხოლოდ ერთ კვირას შეეძლო დარჩენა.

დიდედას სიკვდილმა ის გამოუვალ მდგომარეობაში ჩააყენა. მარტოხელა ოფიცერი თავისი ცხრა წლის გოგონათი ალმა-დალმა ხომ ვერ ივლიდა. დეიდებთან ჩემი დატოვება რატომღაც არ უნდოდა, ალბათ, იმისა ეშინოდა, რომ მათი სამონყალო შევიქნებოდი. იფიქრა, იფიქრა და ერთ დილას ხელი მომიკიდა, გემში ჩამსვა და სტამბოლში ჩამიყვანა. გალათის ხიდზე<sup>1</sup> ეტლში ჩავსხედით, უამრავი აღმართი ავიარეთ, ბაზრებს ჩავუქროლეთ და ბოლოს ერთი ქვის სახლის წინ შევჩერდით.

ეს იყო სასწავლებელი, სადაც ათი წელი ჩაკეტილში უნდა გამეტარებინა. ჩვენ იქვე შეგვიყვანეს ერთ ბნელ ოთახ-

ში, სადაც ფარდები ჩამოშვებული და გარედან დარაბებიც მიხურული იყო.

როგორც ჩანს, ყველაფერი წინდაწინ იყო მოლაპარაკებული და გადანყვეტილი, რადგან ცოტა ხნის შემდეგ ოთახში შემოსული შავტანსაცმლიანი ქალი პირდაპირ ჩემკენ წამოვიდა; მისი თეთრი თავსაბურავის ბოლოები უცნაური ფრინველის ფრთებივით თმებზე შემეხო. ქალმა სახეში ჩამხედა და ლოყაზე ხელი მომითათუნა.

მაგონდება, სკოლაში ფეხის პირველ გადადგმას ისევ ცელქობა და ერთი არასასიამოვნო ამბავი მოჰყვა.

მამაჩემი დირექტორ ქალს რომ ესაუბრებოდა, მე ოთახში დავდიოდი და ყველაფერს ვეღებოდი. ერთ ფერადი სურათით მოხატულ ვაზას ხელი შევახე. ვაზა გადმოვარდა და დაიმსხვრა.

მამა ხმლის ჟღარუნით წამოვარდა ადგილიდან და აღელვებულმა ხელი მტაცა.

დამსხვრეული ვაზის პატრონი დირექტორი ქალი კი, პირიქით, იცინოდა, ხელს იქნევდა და მამაჩემის დამშვიდებას ცდილობდა.

\*\*\*

კიდევ რამდენი ამ ვაზაზე უფრო ძვირფასი ნივთის დამტვრევა მელოდა ამ სასწავლებელში. ჩემი აშრობა იქაც გრძელდებოდა. აქაურ აღმზრდელებს ან მართლა ანგელოზის მოთმინება ჰქონდათ, ანდა მე ვიყავი რაღაც კარგი თვისების პატრონი, თორემ სხვანაირად ჩემი ატანა შეუძლებელი იყო.

საკლასო ოთახში მუდამ ვეშმაკობდი. აქეთ-იქით დავეხეტებოდი.

სხვასავით კიბეზე ასვლა-ჩამოსვლა ჩემთვის არ არსებობდა. უსათუოდ მივიმალეობოდი სადმე კუთხეში, ვიდრე ჩემი

<sup>1</sup> გალათის ხიდი – ოქროს რქაზე გადებული ერთ-ერთი ხიდი სტამბოლში იენი ჯამის მოედანსა და ნეჯათი ბეის პროსპექტს შორის.



ამხანაგები არ ჩავიდოდნენ, შემდეგ კი ცხენით მოვაჯდებოდი მოაჯირს და სრიალით დავეშვებოდი, ან კიდეც ფეხებს ტყუპად დავიჭერდი და სკუპ-სკუპით ვეშვებოდი კიბეზე.

ბაღში ერთი გამხმარი ხე იდგა. ერთხელ დრო ვიხელთე, ხეზე ავძვერი და, აღმზრდელის მუქარის მიუხედავად, მთელი დასვენება ტოტიდან-ტოტზე დავხტოდი.

– ეს ხომ ადამიანის შვილი არ არის,  
– შესძახა ამის მნახველმა აღმზრდელმა,  
– ეს ნამდვილი ნარჩიტაა!

იმ დღიდან ყველამ დაივიწყა ჩემი ნამდვილი სახელი და ნარჩიტა შემერქვა.

აღარ მახსოვს, როგორ მოხდა, მაგრამ შემდეგში ამ სახელმა ჩვენს ოჯახშიც მოიკიდა ფეხი და ფერიდე, სადღესასწაულო ტანსაცმლისა არ იყოს, განსაკუთრებულ დღეებში სახმარ ოფიციალურ სახელად იქცა.

ნარჩიტა მომწონდა კიდეც და ჩემი საქციელის შესაფერიც იყო. როცა ჩემს თავგასულობას უჩიოდნენ, მე მხრებს შევათამაშებდი და ვიტყოდი, რა ვქნა... აბა, ნარჩიტასგან მეტს რას უნდა მოელოდეთ-მეთქი.

დროდადრო ჩვენს სასწავლებელში ერთი თხანვერა სათვალისიანი მღვდელი დადიოდა. ერთ დღეს მაკრატლით ცოტათმა მოვიჭერი და წებოთი ნიკაპზე მივიკარი. როცა ის ჩემკენ იყურებოდა, ნიკაპზე ხელებს ვიფარებდი, ხოლო როცა მიბრუნდებოდა, წვერს გამოვაჩენდი, ვაცანცარებდი, მღვდელს დავცინოდი და ბავშვებს ვაცინებდი. მას ამ ხარხარის მიზეზი ვერ გაეგო და ბრაზისგან ყვიროდა.

ერთხელ ფანჯარაში ვიხედებოდი, რომელიც საკლასო ოთახიდან დერეფანში გადიოდა. ვხედავ, იქიდან დირექტორი მიყურებს.

დავიბენი და ნახეთ, რა ვქენი. წელ-

ში მოვიხარე, თითი ტუჩებზე მივიდე და სუ-მეთქი, ვანიშნე. შემდეგ კი კოცნაც გავუგზავნე.

სასწავლებელში დირექტორი ყველას უფროსი იყო. უხუცეს მასწავლებელსაც კი იგი ღმერთად მიაჩნდა. მიუხედავად ამისა, თხოვნამ, ჩემთან გაეზიარებინა დანაშაული, ის გაამხიარულა. თითქოს შეშინებულმა, რომ კლასში შემოსვლისას მკაცრ გამომეტყველებას ვეღარ შეინარჩუნებდა, მუქარის ნიშნად თითი დამიქნია და ბნელ დერეფანში გაუჩინარდა.

ერთხელ მან სასადილოშიც წამასწრო დანაშაულზე. კლასიდან მალულად წამოღებულ ქალაქის კალათში საჭმლის ნარჩენებს ვაწყობდი.

დირექტორმა მკაცრი ხმით მიმიხმო თავისთან.

– აქ მოდი, ფერიდე! ამას რას შვრები?

ვერაფერს მივხვდი, რას ვშვრებოდი ცუდს და თვალეები მივაპყარი:

– განა რა მოხდება, ძაღლებს რომ საჭმელი მივუტანო? – ვკითხე მე.

– რომელ ძაღლებს? რა საჭმელი?

– აი, გარეთ რომ ძაღლები არიან... აჰ, რომ იცოდეთ, როგორ უხარიათ ჩემი დანახვა... გუშინ საღამოს ზედ კუთხესთან შემხვდნენ, ფეხებში დამიტრიალდნენ.. მოითმინეთ, რას შვრებით, სანამ გაშლილ ადგილზე არ გავალთ, არ მოგცემთ-მეთქი, ვეუბნები, მაგრამ მაგ ქოფაკებს არაფრის გაგონება არ უნდათ. მიწაზე დამაგდეს. მეც გავჯიუტდი და კალათას მაგრად მოვუჭირე ფეხები... კინალამ გამგლიჯეს. ღმერთმა უშველოს, ერთმა ვაჭარმა ჩაიარა ამ დროს და იმან გადამარჩინა.

დირექტორი თვალეებში შემომცქეროდა და მისმენდა.

– კარგი, მაგრამ სასწავლებლიდან როგორ გახვედი? – მკითხა მან.



– სამრეცხაოს უკან კედელზე გადავძვერი, – უყოყმანოდ მივუგე მე.

მან, თითქოს დიდი უბედურება შეიტყუო, ხელები თავში შემოირტყა:

– მერედა, როგორ გაბედე?

– ნუ წუხხართ, – მშვიდად მივუგე მე, – კედელი ძალიან დაბალია. აბა, როგორ გნებავთ, კარიდან გავიდე... განა კარისკაცი გამიშვებს. პირველად კი მოვატყუე, დაი ტერეზა გეძახის-მეთქი და გავეპარე... ძალიან გთხოვთ, რომ არ გამცეთ, თორემ ძაღლების დატოვება ძალიან საშიშია...

დიდად უცნაური ხალხი იყო ეს აღმზრდელები. ეს რომ სხვა პანსიონში ჩამედინა, მგონი, ან დამიჭერდნენ, ანდა რამე სხვა სასჯელს მომცემდნენ.

დირექტორი მუხლებზე ჩაჯდა. ჩვე-

ნი სახეები ერთმანეთს შეხვდა:

– პატარავ, – მითხრა მან, – ცხოველების მფარველობა ძალიან კეთილი საქმეა, მაგრამ ურჩობა სულაც არ არის კარგი საქმე... კალათა მე დამიტოვე... ნარჩენებს კარისკაცს მე გავატან ძაღლებთან.

ცხოვრებაში ამ ქალივით, მგონი, არავის ვყვარებივარ.

აღმზრდელების ასეთ მოქცევას ისეთივე ძალა ჰქონდა, როგორც ნიავს კლდის მიმართ. არა მგონია, რომ მათ ჩემს თავგასულობაზე და აშრობაზე ემოქმედათ. მაგრამ ვშიშობ, რომ დროთა ვითარებაში მაინც იმოქმედეს და ჩემში წარუშლელი კვალი დატოვეს, ორი თვისება – თანაგრძნობა და სიბრალული – გამომიმუშავეს.



საბაჰათინ ალი  
(1907-1948)

სატვირთო მანქანა<sup>1</sup>

სასტუმრო ზინჯირლის ეზოს ვინ-რო და დაბალი ჭიშკრიდან დიდი გაჭირვებით გამოვიდა სატვირთო მანქანა. იგი აქეთ-იქით ახეთქებდა ტომრებსა და კალათებს და შელესილ კედლებს ეხახუნებოდა. შოფერს ცალი ხელი საჭისათვის ჩაევლო და ცდილობდა, ვინრო ქუჩაზე ისე მოეხვია, რომ გადაღმა მყოფ სადალაქოებში არ შესულიყო. მეორე ხელით კი თეთრ ლავაშსა და ყველს იტენიდა პირში. შოფერის თანაშემწე ზემოთ იჯდა მანქანაზე და იქიდან კარნახობდა მიმართულებას. მისი სახე და ტანსაცმელი ისე იყო გასვრილი მტვრით, ტალახით, ბენზინითა და მანქანის ზეთით, რომ ძნელი იყო მათი ფერის გარჩევა.

– წინ! უკან! გვერდზე! – ყვიროდა თანაშემწე და თან ყველსა და პურს შეეცუოდა.

სატვირთო მანქანა თავისი ოცდამდე მგზავრით ქუჩაზე გამოვიდა, ცოტა წინ გაიარა და გაჩერდა. გრძელწვერა მგზავრთან, რომელსაც თავისი აბგა ფეხებს შორის ამოედო, სირბილით მივიდა ერთი ბიჭი და ჩურჩულით დაუნყო მას ლაპარაკი. დროდადრო მოისმოდა სიტყვები: ხორბალი... კრედიტში... ერთი კოდი... რვა მეტრი შავი დიმი. ჩანდა, რომ მანუფაქტურით მოვაჭრე კაცი იზმირში მიდიოდა და შვილს უბარებდა, როგორ მოქცეულიყო, როგორ მიეცა გლეხებისთვის საქონელი. ორივე მღელვარებით იხედებოდა უკან და შოფერს სთხოვდა, ცოტა კიდევ მოეცადა:

– ცოტაც მოიცა, ხომ არ მოკვდები,

– ეუბნებოდა ვაჭარი, შემდეგ სხვასაც შეავლებდა თვალს, რათა მოუთმენარი მგზავრებისთვის ეგრძნობინებინა, რომ ეს თქვენც გეხებათო.

ამ დროს მანქანას ძველ ხურჯინაკიდებული ახალგაზრდა გლეხი მიუახლოვდა. ის ერთხანს რაღაც შემკრთალი უყურებდა შოფერს, შემდეგ ჰკითხა:

– იზმირში მიდის?

– დიახ, იზმირში.

– მეც წამიყვანთ?

– ადგილი არა მაქვს.

ახალგაზრდა მაშინვე მიბრუნდა და მოშორდა იქაურობას.

მაგრამ შოფერის ფანჯარაზე დაყრდნობილმა გამხდარმა მალალმა კაცმა, რომელიც შოფერს რაღაცებს აბარებდა, დაუძახა გლეხს:

– მოდი აქ, ჰეი, ახალგაზრდა!

გლეხი მიბრუნდა. შავგვრემანმა მალალმა კაცმა შოფერს მიმართა:

– ადგილი როგორ არა გაქვს, უკან ჩააკვებე სადმე.

ეს კაცი მანქანის პატრონი იყო. შოფერმა სახე შეიჭმუხნა და ძირს ჩამოვიდა. ნახევარი ლირა წინასწარ გამოართვა ახალგაზრდას. შემდეგ მანქანის უკანა ბორტი გახსნა, მგზავრები მისწიმოსნია და ახლამოსულს ადგილი მისცა. ისედაც მუხლებზე ჩაჩოქილმა და ვინროდ მყოფმა მგზავრებმა ყაყანი ატეხეს, არ შეიძლება, აქ როგორ უნდა ჩაეტიოსო. მაგრამ, ყველას ბრძანების შესრულებას მიჩვეულნი, ერთმანეთს ხელსა ჰკრავდნენ და ადგილს ათავისუფლებ-

<sup>1</sup> თურქული მოთხრობები, საბჭოთა მწერალი, 1958.



დნენ. ახალგაზრდა გლეხმა განაპირას ჩაიჩოქა და აბგა ქვეშ ამოიღო. მანქანა მაგრად შეირხა, ადგილიდან დაიძრა.

შოფრის გვერდით სულელური გამომეტყველების, შავებში ჩაცმული, ხნიერი, ვერცხლის სათვალისანი კაცი იჯდა. ვეჯილი იყო, ბეიშეჰირის მხარეს მიდიოდა სასამართლო საქმეებზე. თავი მოაბრუნა და უკან მსხდომთ მიმართა:

– კეთილ მგზავრობას გისურვებთ!

მგზავრებმა ერთხმად გაიმეორეს იგივე სიტყვები. როცა მანქანა კონიას გასცდა და ბეიშეჰირისკენ მიმავალ აღმართს შეუდგა, ზოგმა მგზავრმა მეზობელს დაუწყო მუსაიფი, ზოგმა პაპიროსს მოუკიდა, ზოგი კი მანქანის მეორე კუთხეში მჯდომს გამოელაპარაკა. ვინც უფულობის გამო ზურგიან სკამზე ვერ მოხვდა, სულ ბოლოში იყო ჩაცუცქული. მანქანა ანჯღრევდა ძილმორეულებს და ლაპარაკის საშუალებასაც არ აძლევდა. სანყლებს პაპიროსიც ვერ მოენიათ და გამოშტერებულნი შესცქეროდნენ ერთმანეთს.

\*\*\*

ახალგაზრდა გლეხი, რომელიც გვიან მოვიდა, პირველად იჯდა მანქანაზე. მანქანით მგზავრობას მიუჩვეველი, მთლად გაფითრებულიყო, თუმცა სხვა სადარდებელიც ჰქონდა.

მისი სოფელი ერთი საათის სავალზე იყო მოშორებული კონიას. მას იზმირში უნდოდა წასვლა. შოფერს ჩვეულებად ჰქონდა, იზმირში მისვლისთანავე გზის ფული მოეთხოვა მგზავრებისათვის. ახალგაზრდა გლეხმაც იცოდა ეს, მაგრამ, სამწუხაროდ, შოფრის მოთხოვნას ვერ დააკმაყოფილებდა, რადგან ხუთი გროშიც კი არ გააჩნდა.

მოსავალი ისე მცირე იყო, რომ გაყიდვად არ ღირდა. გადასახადები დაუფარავი რჩებოდა, სახლშიც ყველაფერი

გამოელია და იმედიც არაფრისა იყო. მაშინ განზე გაიხმო მამამისი და უთხრა:

– მამა, ქალაქში წავალ სამუშაოდ. შეხე, ნახევარი სოფელი წავიდა. იზმირში ბევრი სამუშაო ყოფილა. ფაბრიკებში თურმე ნახევარ ლირასაც კი იძლევიან დღეში. ზამთარი რომ აქ გავატარო, ტვირთად დაგანვები, უმჯობესია, წავიდე და ჩემთვის ლუკმაპური ვიშოვო. გაზაფხულზე ისევ დავბრუნდები და ყანაში ვიმუშავებ.

სიღარიბისაგან დაბეჩავებულ მოხუცს ლაპარაკის თავიც კი არ ჰქონდა და შვილს თანხმობა მისცა. თვრამეტი წლის ახალგაზრდა იზმირში უკვე ნამყოფ კაცებთან წავიდა ჭკუის საკითხავად.

იზმირში წასასვლელად ჯერ კონიაში უნდა ჩამჯდარიყო ავტობუსში. მანქანა ორ-სამ დღეს უნდებოდა გზას და ბეიშეჰირი, კარაღაჯი და ოდემიში უნდა გაეგლო. სამგზავრო ხარჯად ხუთი ლირა იყო საჭირო. იზმირში მას ნათესავი უნდა მოენახა და მისთვის ეთხოვა შოფრისათვის მისაცემი თანხა.

იგი საგზაო ხარჯის შეგროვებას შეუდგა. სახლში ერთი ძველი ორლულიანი თოფი ჰქონდა, მაგრამ ნახევარ ლირაზე მეტს არავინ მისცემდა იმ თოფში. ერთი კვირა ეძება სოფელში ფული, მაგრამ ხუთი ლირის შეგროვება ვერ მოახერხა. სასონარკვეთილებაში ჩავარდნილს ბაყლის შვილი შეხვდა. ის ერთ დროს მამამისს გაექცა და შოფრის თანაშემწედ მუშაობდა. იმან ასწავლა ჭკუა:

– ბიჭო, გაგიჟდი შენა? ისლა გაკლია, მანქანის ფული გადაიხადო. ნახევარი ლირა წინასწარ მიეცი შოფერს, შემდეგ, იზმირს რომ მიუახლოვდები, ჩუმად ჩამოხტი და იზმირამდე ფეხით იარე. ოღონდ, – დაუმატა მან, – იცოდე, რომ ფულს იქვე იზმირთან აგროვებენ და, შენ თუ უფრო ადრე არ გადმოხტი, მაშინ ცუდად იქნება შენი საქმე. ფეხ-



ქვეშ ამოგიდებენ და ცხვრიდან ძმარს გადენენ; თან ნიფხავ-პერანგის ამარად დაგტოვებენ.

ასე რომ, თვრამეტი წლის ახალგაზრდამ ორმოცდაათი ყურუში წინასწარ მისცა შოფერს და თვითონ კი უფულოდ გაემგზავრა იზმირში სამუშაოდ.

\*\*\*

მგზავრობის მეორე დღეს, სალამოს, ახალგაზრდა გლეხი უკვე ველარ ისვენებდა თავის ადგილზე. სახლიდან გამოსვლის შემდეგ მშიერი იყო. სოფლიდან წამოღებული კვერი მაშინვე შეჭამა, როგორც კი მანქანაზე ავიდა. მის გვერდით მსხდომი გლეხები მძიმე-მძიმედ ღეჭავდნენ გამხმარ შავ პურს. ამის დახვავაზე მას ნერწყვი მოსდიოდა, თვალებს ხუჭავდა, თავბრუდახვეულივით ეყრდნობოდა მანქანის კედელს. შემდეგ უცბად შეკრთებოდა, ოდნავ წამოიწევდა ადგილიდან, წინ გაიხედავდა და ისევ მიიკრუნჩხებოდა თავის ადგილზე. რაც უფრო წინ მიიწევდა მანქანა, მით უფრო მატულობდა ახალგაზრდა გლეხის შიში და ხშირად შიმშილსაც კი ავინწყებდა. დროდადრო შიში და შიმშილი ერთად ეუფლებოდა და სანყალი გონებას კარგავდა. მგზავრობისგან გაიგო, რომ იზმირს უახლოვდებოდნენ. რამდენზე მიუახლოვდნენ? ნეტავ დროა, რომ გადახტეს და გაიქცეს? ვაითუ შორსაა და ამ შუადამისას მთებში გზას როგორ გააგნებს? არადა, აქ როგორ გაათიოს ღამე? ვაითუ ჟანდარმებს ჩაუვარდეს ხელში? ან იქნება შოფერმა შეატყობინოს პატრულებს, რომ ფული არ გადაუხდია და ისე გადახტა და გაიქცა. მაშინ ხომ, ალბათ, სცემენ ჟანდარმები; ვინ იცის, რა ჯობია, – ჟანდარმებმა სცემონ თუ შოფერმა. თუმცა იქნებ ვინმე მაღლიანი მგზავრი აღმოჩნდეს და არ აცემინოს. ხომ შერცხვა ამდენ ხალხში და თან

ტიტველიც დარჩა. მაშინ იზმირში როგორღა მივა, ნათესავენს როგორ მოძებნის. უნდა გადამხტარიყო, სხვა გზა არ ჰქონდა.

მაგრამ როგორ მოეხერხებინა გადახტომა? მანქანა ხომ ბულს აყენებდა და მოსახვევებში აქეთ-იქით ისროდა მგზავრებს. ბევრჯერ უნახავს მანქანა, მაგრამ შიგ არა მჯდარა. ახლა კი ხმაურის, ლაყლაყის და გადამუშავებული ბენზინის საშინელი სუნის გამო მანქანა მისთვის რაღაც შიშის მომგვრელ მოჩვენებად ქცეულიყო. არეულობაში, მტვერსა და ხმაურში ნახევრად გაბრუებულ ყმანვილკაცს სიზმარივით გაუელვა თავში მისმა სოფელმა, მის მიერ წარმოდგენილი იზმირის მკრთალმა სურათებმა, ბენზინით აყროლებული შოფრის სახემ, ბენიშეჰირში გადმომხტარმა სათვალთანმა ვექილმა.

დროდადრო, როცა ავტომობილი სვლას შეანელებდა, შეშინებული ყმანვილი ადგილიდან წამოხტებოდა, ვაითუ ფულის მოსაგროვებლად ჩერდებაო, მაგრამ, როცა მანქანა ისევ სწრაფად განაგრძობდა გზას, ის თავის ადგილს უბრუნდებოდა, გადასახტომად მზადმყოფი. მაგრამ როგორ გადახტეს? მანქანის ზომა თანდათან მატულობდა მის თვალში. უჩვეულო შთაბეჭდილებას ახდენდა მის გრძნობებზე და სულს უხუთავდა. აღარ ეგონა, რომ გადაურჩებოდა ხიფათს, თვალედაჭყეტილი იცქირებოდა აქეთ-იქით. ეჩვენებოდა, რომ გარშემო მსხდომი გლეხები და წინ მოკალათებული ბატონები მას უცქერდნენ და, როგორც კი ოდნავ გაინძრეოდა, მაშინვე სტაცებდნენ ხელს. საფეთქელზე ამოსული ბუსუსები შუბლიდან ჩამონადენი ოფლით ჰქონდა დასველებული.

სატვირთო მანქანამ მოულოდნელად უკლო სიჩქარეს. გზის მარცხენა მხარეს მიუვალი კლდე იყო აღმართული, მარ-



ჯვნივ კი ორი მინარეთის სიღრმის პირ-დაღებული უფსკრული ჩანდა. გზა მოულოდნელად ვიწროვდებოდა. ძრავის ხმაურმა იკლო, უფსკრულიდან წყლის ჩუხჩუხი მოისმოდა. შარაგზის ამ მონაკვეთზე ერთი ქვაც კი არ იყო დაგებული. მანქანა შეიძლება გადაბრუნებულიყო, რის გამოც მგზავრები, ჩვეულებრივ, ამ ადგილს ფეხით გადიოდნენ, მანქანა კი ნელ-ნელა ცარიელი მიიწევდა წინ. მანქანა ჯერ გაჩერებული არ იყო, როცა მოფერმა უკან მოიხედა და დაიყვირა:

– აბა, მოემზადეთ, ბატონებო!

მანქანის უკანა მხარეს რაღაც უეცარი მოძრაობა შეიქნა, თვალებამღვრელი და შიშისგან აკანკალებული ახალგაზრდა მანქანიდან ქვევით გადაეშვა. წონასწორობა დაკარგა, მოძრაობის საწინააღმდეგო მხარეს გადამხტარი, რამდენჯერმე ამოტრიალდა ერთ ადგილზე, ფეხი აუცდა, ბუჩქებს მოებლაუჭა, მაგრამ თავის შეკავება უკვე ძნელი იყო. ლოდს კეფა დაჰკრა და დაგორებულ ქვებსა და ხრეშთან ერთად დაეშვა ქვევით, საიდანაც ახლა უფრო მკაფიოდ მოისმოდა მდინარის ჩუხჩუხი.

## ურიკები ხუთ ყურუშად<sup>1</sup>

საღამოობით, როცა ქუჩებში ხალხი ირეოდა, ერთი სახლის კუთხეს ქალი და პატარა ბავშვი მოადგებოდნენ ხოლმე. მუქ მოსასახმაში გახვეული ქალი სახეს იფარავდა, მხოლოდ ორი შავი თვალი დაჰყურებდა ნახევრად დაბნელებულ ქუჩას. გვერდში ბავშვი ედგა, რომელიც სათამაშოებს იღებდა ტომრიდან. ეს იყო ჯოხის ბოლოზე დამაგრებული ორი ხის ბორბალი. ბორბლებს ზემოდან ორ ტრიალა ღერძს შორის ჩამაგრებული იყო მრგვლად შეკრული ოთხი ჩხირი. მინაზე გაგორებისას იგი ტრიალებდა, ფრრ-ო, გაიძახოდა.

ბავშვმა სათამაშოები ქალის წინ ჩამწკრივა, ერთი ცალი ქვაფენილზე გააგორ-გამოაგორა და წვრილი ხმით გასძახა:

– ურიკები ხუთ ყურუშად... ყუთ ყურუშად... ურიკები ხუთ ყურუშად!..

ქალი და ბავშვი მანამდე რჩებოდნენ იქ, სანამ ქუჩები არ დაცარიელდე-

ბოდა.

ბავშვი რვა წლისა იყო, მაგრამ ერთი შეხედვით ექვსზე მეტს არავინ მისცემდა. პატარა და საცოდავი, თავის ხმასავით დაღეული იყო და კანკალებდა. ყვირილის დროს ცდილობდა, გრძლად გამოეთქვა სიტყვები. დედასავით ისიც სულ ქვევით იცქირებოდა, თავს ერთხელ არ ასწევდა.

იქვე, კუთხესთან, ვიტრინაგანათებული საგალანტერიო მაღაზია იყო. ვიტრინიდან მნახველს უღიმოდა ნაირნაირი, თვალისმომჭრელი ყელსაბამები, ლამაზაბზინდიანი ქამრები, შალის სვიტერები, ხელთათმენები და მრავალი სხვა, ადამიანისათვის საჭირო თუ უსარგებლო ნივთი. დედა-შვილი მაღაზიას ჩაუვლიდა ხოლმე და თავის კუთხეში მოიკალათებდა. ისინი ცდილობდნენ, აღარ მიეხედათ მაღაზიისაკენ. სინათლე რომ არ ყოფილიყო, რომელიც ტალახიან ქვაფენილს ეცემოდა და იქაურობას

<sup>1</sup> საბაჰათინ ალი, მგელი და კრავი, ნოველები, სახელგამი, 1957.



ალაგ-ალაგ ანათებდა, ალბათ არც კი ეცოდინებოდათ ამ მაღაზიის არსებობა.

სამაგიეროდ, ბევრი გამვლელი, განსაკუთრებით კი ბავშვები, დიდხანს ჩერდებოდნენ ამ ოსტატურად განწყობილ ვიტრინასთან, მაგრამ მათ მეხსიერებაში დიდხანს არ რჩებოდა ვიტრინის ლამაზი სურათები. ბავშვები ცოტა კიდევ ჩაივლიდნენ თუ არა, ტუჩებაბზუებულნი მიაცქერდებოდნენ ხის ბორბლებიან ურიკებს. პატარა ბავშვი კი ყურადღებას არ აქცევდა მათ გულცივობას, წინ იყურებოდა და დროდადრო გაიძახოდა:

– ხუთ ყურუშად, ურიკები ხუთ ყურუშად!

მაღაზიის წინ დიდი ავტომანქანა გაჩერდა, საიდანაც საკმაოდ მსუქანი და მორთული ქალბატონი გადმოვიდა. უკან მას მოჰყვა რვა-ცხრა წლის ბიჭუნა. ბავშვს მსუბუქი ლურჯი პალტო ეცვა და თეთრი ლაბადა ჰქონდა მოსხმული. თავზე თეთრი ბერეტი ეხურა. ისინი მაღაზიაში შევიდნენ.

მალე, შიდა ვიტრინები რომ დაათვალიერა, ბიჭი გარეთ გამოვიდა და იმ კუთხისკენ გაიხედა, სადაც სათამაშოები ეგულეობდა. სწორედ ამ დროს პატარა გამყიდველის ხმა გაისმა.:

– ურიკები ხუთ ყურუშად...

ბავშვი შავმოსასხამიანი ქალის გვერდით მდგომი პატარა ბიჭისკენ გაქანდა. ხელი მოჰკიდა.

– ააა! შენ აქ ურიკებს ყიდი? – წამოიძახა მან.

პატარა გამყიდველმა თავი ასწია და შეხედა. სახეზე მაშინვე ღიმილი გადაეშალა და იმანაც ააა-ო, წამოიძახა.

– დედაჩემი მარტო ვერ მოდის, არც ყვირილი შეუძლია... ამიტომ მე დავყვები... – დაამატა მან.

თეთრლაბადიანმა ბიჭმა, რომელსაც მატყლის ხელთათმნები ეცვა, ხელები ჯიბეში ჩაიწყო, ნუში ამოიღო, ერთი

პირში ჩაიღო, ერთი თავის ამხანაგს გაუწოდა და ლოყებგამობერილმა ჰკითხა:

– გაკვეთილებს როდის ამზადებ?

– სკოლიდან რომ ვბრუნდები, ერთი-ორი საათი გაკვეთილებს ვუზივარ, მერე აქ მოვდივარ. სალამოობით არ ვმეცადინეობ, ნავთი ძვირი გვიჯდება.

– ჩვენი მასწავლებელი დაინახე? ახლა აქ გაიარა.

– მასწავლებელმა იცის, რომ მე ურიკებს ვყიდი.

პატარა ბიჭმა ამ დროს თვალი მოჰკრა მომავალ ქალს, რომელსაც რამდენიმე ბავშვი მოჰყვებოდა, ლაპარაკი შეწყვიტა და გასძახა:

– ურიკები ხუთ ყურუშად...

ბიჭებს ერთმანეთისთვის ხელი ჩაევლოთ. შავმოსასხამიანი ქალი დამწუხრებული შესცქეროდა მათ.

– ამოხსენი არითმეტიკის ამოცანა? – ჰკითხა თეთრბერეტიანმა ბიჭმა თავის ამხანაგს. – მე წელან ბევრი ვეცადე... სალამოს მამას ვკითხავ.

– რა უნდა ჰკითხო, ძალიან ადვილია, – უპასუხა მეორემ და მაშინვე აუხსნა კიდევ.

ბავშვები ისე გაერთნენ ლაპარაკით, რომ სათამაშოების გამყიდველს თავისი საქმე სულ გადაავიწყდა.

– ყური მიგდე, – ხელი წაჰკრა მას ამხანაგმა, – ჩემ გვერდით რომ ბავშვი ზის, პირი უყარს... მე შენთან გადმოვჯდები... უფრო კარგადაც ვიმეცადინებთ.

– ჩემთან რომ ზის, ის არ დაგითმობს ადგილს. მე ვერ ვეტყვი, ჩვენი უბნელია, თანაც – მეზობელი, ისიც ჩვენსავით ღარიბია...

სიტყვა აღარ გაუგრძელებია, კინალამ თქვა, იტყვიან, ეს ააყენა და გვერდზე მდიდარი ბავშვი მოისვაო, მაგრამ გაჩუმდა და სხვა რალაცებზე დაიწყო ლაპარაკი.

სწორედ ამ დროს მაღაზიიდან მდი-



დარი ბავშვის დედა გამოვიდა. მოლი-მარმა ქალმა აქეთ-იქით მიმოიხედა. შოფერმა მაშინვე მასთან მიიღბინა, ჩამოართვა ფუთა და თავის ადგილას დადო. ქალმა კუთხისკენ გაიხედა. თავის შვილის დანახვაზე კოპები შეიკრა და ჩქარი ნაბიჯით მისკენ გაემართა. ბავშვი გაიტრუნა და გაკვირვებული, მაგრამ მოლიმარი მიაცქერდა დედას. ერთი წუთით თითქოს ყველაფერი გაირინდა.

პატარა გამყიდველის დედას თავი აენია და უყურებდა მისკენ მომავალ ქალს, რომელიც ისე მოაბიჯებდა, თითქოს მოგორავსო. მას ძვირფასი ქურქი და გველის ტყავისგან შეკერილი ფეხსაცმელი ეცვა.

ქალმა მიახლოებისთანავე გაკვირვებულ და მოლიმარ შვილს სტაცა ხელი:

– ეს რასა ჰგავს, ერთი მითხარი, ვის ელაპარაკები? – იყვირა მან და ქოლგა ჩასცხო ზურგში პატარა გამყიდველს, რომელსაც ჯერ ხელი არ გაეშვა თავისი ამხანაგისათვის. – საძაგელო! – ყვიროდა ქალი, – განა შენი ტოლია ჩემი შვილი, რომ ელაპარაკები?

ბიჭებმა ხელი უშვეს ერთმანეთს.

შავმოსასხამიანი ქალი კედელთან ატუზულიყო. ბავშვს ტკივილისგან ცრემლები მოერია.

თეთრბერეტიანი ბიჭი გაოცებული იდგა, მაგრამ ამხანაგის თვალებზე ცრემლი რომ დაინახა, აღშფოთებით მიმართა დედას:

– დედიკო, ის ჩემი სკოლის ამხანაგია!

სახენამონითლებულმა ქალმა ბავშვს ხმა გააკმენდინა:

– ხვალ თქვენს სკოლაში დავრეკავ და იმათ ვუჩვენებ, როგორ შეუშვან სკოლაში ყველა ოხერი.

მან ხელი მოჰკიდა თავის შვილს, მუქარით გადახედა უკან დარჩენილ პატარა გამყიდველს და მანქანისკენ გაემართა. ბიჭმა მოიხედა, თვალცრემლიანი ამხანაგი რომ დაინახა, რომელიც განზე იცქირებოდა, თვითონაც ცრემლებით აევსო თვალები.

სათამაშოების გამყიდველი თავისი ათრთოლებული წვრილი ხმით განაგრძობდა ყვირილს:

– ხუთ ყურუშად, ურიკები ხუთ ყურუშად!

## პატეპი<sup>1</sup>

დუდუმ, რომელსაც ხელში წერილი ეკავა, სასწრაფოდ შეაღო მასწავლებლის სახლის კარი.

– ნამიკითხავ ამ წერილს? სეიდისგან მივიღე, – წარმოთქვა მან.

მასწავლებელმა ცალი თვალი დუდუს შეავლო, შემდეგ ხელი გაიშვირა წერილისკენ და, მომეციო, უთხრა.

დუდუს ქმარმა სამი წლის წინათ ვიღაცა მოკლა ქორწილში და ათი წლით

ციხეში ჩასვეს. მართალია, რვამ ისროლა ერთად და ძნელი იყო იმის გარკვევა, ვისმა ტყვიამ მოკლა კაცი, მაგრამ სხვებმა, სეიდისა და მისი ამხანაგის, დურმუშის, გარდა, მაზრის გამომძიებელს ქრთამი მისცეს და თავი გაიმართლეს. ვილაიეთის<sup>2</sup> სასამართლომ ორივეს ათ-ათი წელი მიუსაჯა.

მასწავლებელმა წერილი წაიკითხა. მოკითხვის შემდეგ სეიდი ჩიოდა,

<sup>1</sup> საბაჰათინ ალი, მგელი და კრავი, ნოველები, სახელგამი, 1957.

<sup>2</sup> ვილაიეთი – ადმინისტრაციული ერთეული.



კარგად ვერა ვარ, ჭუჭყიან და ტილებით სავსე საკანში ვარ გამომწყვდეულიო. შემდეგ დუდუს სთხოვდა, იქნებ მოხვიდე და ორი ბატი მოუყვანო უფროს ზედამხედველსა და ციხის უფროსს, რომ სამყოფი გამომიცვალონ. საკნის თავში უფრო ნაკლები ტილია და სისუფთავეც უფრო არისო.

ქალმა წერილი გამოართვა და უბეში ჩაიდო. მასწავლებელმა ამით ისარგებლა და უკეთ შეავლო თვალი დუდუს გულ-მკერდს.

დუდუმ ხელი მოჰკიდა იქვე, სკოლის გვერდით ნაკელის გროვაზე თამაშით გართულ პატარა ვაჟს, ჰუსნუს, და დაფიქრებული დაბრუნდა შინ. რა ექნა, არ იცოდა.

თვითონ დუდუს ერთი ბატის მეტი არ ჰყავდა და ამ ბატის დადებული კვერცხით ბაყალ ილიას ეფენდის უხდიდა ვალს. ბატს ყოველდღეც რომ დაედო კვერცხი, ჰუსნუს საპერანგედ ნაყიდი ჩითის ვალს ერთ თვეში თუ გაისტუმრებდა, ახლა კი, ბატი რომ ქალაქში წაელო, ილიას ეფენდი სახლში ლოგინსაც არ დაუტოვებდა.

დუდუს ერთი ბატი ჰყავდა... სეიდი კი ორსა სთხოვდა...

დუდუ რძალს მიადგა კარზე, სეიდის უფროსი ძმის ცოლს. სეიდის ძმა ამ ორი კვირის წინ, ნადირობის დროს, ქორწილში მოკლული კაცის ნათესავებმა გამოასალმეს წუთისოფელს.

– აქედან დამეკარგე! მაგ გაიძვერა სეიდის გულისათვის მომიკლეს ქმარი. ღმერთო, ნუ გამოიყვან იმას ციხიდან! – იყვირა ახალდაქვრივებულმა და ტირილი დაიწყო.

დუდუ უკან გამობრუნდა და შეშინებულს სხვა ნათესავებისთვისაც აღარ მიუკითხავს. ღამე რული არ მიჰკარებია. სახლში ოთხი წლის ბიჭის გარდა არავინ ჰყავდა, ეშინოდა კიდევ, სეიდის მტრები

სულ ემუქრებოდნენ, არ გაბედო და ქმარს არ დაეხმარო. მისი ძმაც ხომ იმიტომ მოკლეს, რომ სეიდს ხელს უმართავდა ხოლმე. დუდუს ყველამ გამოუკეტა სახლის კარი.

სეიდი კი ორ ბატს სთხოვდა და ისიც – სხვისთვის.

დუდუ ფრთხილად წამოდგა ლოგინიდან და ეზოში გავიდა. ბატი დაიჭირა და ფეხები შეუკრა. ბატმა ყიყინი მორთო. მეზობლის ბოსტნის ლობის იქიდან სხვა ბატებმაც მისცეს ბანი.

ცოტა ხანს დაფიქრდა დუდუ, შემდეგ გარღვეულ ლობეს მიაშურა. მეზობელ ბოსტანში გადაძვრა და თავის საშველად კუთხისკენ ბაჯბაჯით მიმავალი ბატებიდან ერთს ხელი წაავლო.

ძალღმა იცნო მოსული და ხმა არ ამოუღია.

დუდუმ ჰუსნუ ზურგზე მოისვა, ცალ ხელში ფეხებშეკრული ბატები დაიჭირა, მეორეში ერთი პარკი ბურღული და ლამის სიგრილეში ქალაქისაკენ მიმავალ გზას დაადგა.

ჰუსნუს ბექმეზით სავსე პატარა დოქი ეკავა ხელში. ხანდახან დუდუ ქვას წამოჰკრავდა ფეხს და მაშინ ბექმეზი ზურგში ესხმებოდა.

ქალაქამდე ცხრა-ათი საათის სავალი იყო.

აგერ უკვე სამი თვეა, რაც სეიდი ავად არის. ციხის ექიმმა იგი საავადმყოფოში დაანვინა. წინათაც რამდენჯერმე იწვა თითო-ოროლა დღე, მაგრამ, როგორც კი უფრო მძიმე ავადმყოფი მოვიდოდა, მაშინვე გამოწერდნენ ხოლმე.

ბოლოს სულ აღარ მიიღეს.

საავადმყოფოები არ იღებდნენ ისეთ სნეულებს, რომელთა მკურნალობაც შეუძლებელი იყო. ასეთი იყო კანონი.

ამგვარი ავადმყოფებისათვის შეიძლება პატიმრობის ვადა გადაედოთ ან







ყარაულმა შუბლი შეიჭმუნა და ის იყო, ხელი უნდა გაეშვირა ახლახან გატანილი საკაცისკენ, რომ მისი თვალები ისევ ბატებსა და პარკს წააწყდა.

– აქაა, მაგრამ დღეს ნახვის დღე არ არის. ეგენი მე დამიტოვე, შენ კი ერთი კვირის შემდეგ მოდი, – მიუბრუნდა ის დუდუს. პარკი, ბატები და ბექმეზიანი კოკა ჩამოართვა და კედელთან დააწყობა. – კვირის სწორს მოდი-მეთქი, ხომ გითხარი, – უყვირა იქვე კედელთან ჩაცუცქულ დუდუს. – ამას ჩვენ თვითონ გადავცემთ, შენ კი გასწი, ნულარ იცდი.

ერთი კვირა ქალაქში ხომ ვერ დარჩებოდა. მოჰკიდა ჰუსნუს ხელი და სოფლისაკენ გასწია.

ბავშვი წარამარა უკან იცქირებოდა და ტიროდა:

– სად არის მამა?.. სად არის მამა-ჩემი?..

– რა გატირებს? ვერ გაიგე, რომ არ გვაჩვენებს? – გაბრაზდა დუდუ და ბავშვი შეანჯღღრია.

შემდეგ კი რბილად დააყოლა:

– აი, გავლენავთ პურს და მერე ვნახავთ მამას.

დაბრუნდნენ სოფელში.

ის იყო, სოფელში ფეხი შედგა დუდუმ, რომ ჟანდარმებმა ხელი სტაცეს. სანამ დუდუ ქმრის სანახავად იყო წასული მაზრაში, გაეგოთ, ბატი რომ მოიპარა, მისი საქმე გაერჩიათ და სამი თვის პატიმრობაც მიესაჯათ. ციხეში მჯდომ დუდუს არც კი გაუგია, რომ სეიდმა ჯერ კიდევ კალოობამდე განუტევა სული.

## შუშის კოშკი<sup>1</sup>

ოდესღაც ცხოვრობდა სამი ამხანაგი, რომლებსაც საქმის კეთებას უქმად სიარული ერჩიათ. სადაც მივიდოდნენ, იშვიათად, რომ გულთბილად მიეღოთ; ყველა კინნისკვრით ერეკებოდა. ოფლით მოპოვებული გემრიელი ლუკმის ჭამა მათთვის უცხო იყო, რადგან ხელები შრომას არ ჰქონდათ მიჩვეული. ერთ დღეს ხანგრძლივი მოგზაურობით დაქანცულნი ისხდნენ მომალლო გორაკზე და მწუხარებით გასცქეროდნენ ქვევით, დაბლობზე გაშლილ დიდ ქალაქს. „ნეტავ როგორ მიგვიღებენ ამ უცხო ქალაქში?“ – ფიქრობდნენ ისინი. ერთ მათგანს ამ დროს რაღაც აზრი მოსვლოდა თავში, წამოიჭრა და შესძახა:

– გამომყევით, ამ ქალაქში შუშის

კოშკი ავაშენოთ; სიკვდილამდე კმაყოფილებასა და მოსვენებაში ვიცხოვრებთ.

– ეგ შუშის კოშკი რაღაა? – ჰკითხეს დანარჩენებმა.

– ნულარ დგახართ, დროს ნუ კარგავთ, გზაში მოგიყვებით, – უპასუხა მან, ამხანაგები გაიყოლია და ჩიტივით დაეშვა ქვემოთკენ.

მეთაურმა გზაში მოკლედ უამბო, როგორ უნდა მოქცეულიყვნენ ქალაქში შესვლისას.

ქალაქი, სადაც ისინი მივიდნენ, იმ ქვეყნის დედაქალაქი ყოფილიყო. ამ ქვეყანაში მთელი ხალხი შრომობდა, აკეთებდნენ, ვისაც რა გამოსდიოდა ხელიდან, საკუთარ თავს თვითონ განაგებდნენ და ბატონებივით ცხოვრობდნენ.

<sup>1</sup> საბაჰათინ ალი, მგელი და კრავი, ნოველები, სახელგამი, 1957.



ყანებსა და დუქნებში ხალხი ფუტკარით ირეოდა, ერთმანეთს ეხმარებოდნენ, საქონელს ცვლიდნენ საჭიროების მიხედვით. ცხოვრობდნენ და იხოცებოდნენ უომრად, უბატონოდ. დავისა და ყოველდღიური საკითხების გადასაჭრელად გამოყოფილი ადამიანები მხოლოდ იმას ფიქრობდნენ, რომ ერთგულად ემსახურათ თანამოძმეებისათვის და ძალადობა ფიქრადაც კი არ მოსდიოდათ.

იმ დღეს, როცა ჩვენი ნაცნობი სამი მეგობარი ქალაქში მივიდა, იქ ბაზრობა იყო. ქუჩებში ყველგან გროვა-გროვად ენყო მარცვალი, ხილეული, ქსოვილები, რკინეულობა, ნახშირი. მყიდველი თუ გამყიდველი შუამავლის გარეშე ვაჭრობდა.

მეგობრები, ადრე დადებული პირობის თანახმად, უსაქმოდ დახეტიალებდნენ ქუჩებში, გარშემო იცქირებოდნენ, თავს იქნევდნენ და გამვლელთა გასაგონად ამბობდნენ:

– ღმერთო, ღმერთო, რა უცნაური ქვეყანაა!..

გაიარეს ერთი ქუჩა, გავიდნენ მეორეზე, შემდეგ – მესამეზე და ყველგან ერთსა და იმავეს იმეორებდნენ განცვიფრებულნი. თანდათან მათ დაინტერესებულთა მთელი ტალღა აედევნა და ერთმანეთს დაუნყეს კითხვა, თუ რა იყო მათ ქალაქში ასეთი უცნაური. ბოლოს ერთმა მათგანმა ველარ მოითმინა და უცხოელებს შეეკითხა:

– ღვთის გულისათვის, რა გიკვირთ ასე?

– ისა, რომ სად არის თქვენს ქვეყანაში შუშის კოშკი? – იკითხა მეთაურმა.

– რა შუშის კოშკი?

– როგორ რა! განა თქვენ არა გაქვთ შუშის კოშკი?

– რას ნიშნავს ეგ?

მეთაური ამხანაგებს მიუბრუნდა:

– ოჰ, ღმერთო, არც კი იციან, რა

არის შუშის კოშკი. ასეთ ქვეყანაში არ დაიდგომება. ახლავე გავუდგეთ ჩვენს გზას.

ქალაქის მოსახლეობა კიდევ უფრო დაინტერესდა. სამი ამხანაგისათვის თავი აღარ დაუნებებიათ, რამდენიმე ნაბიჯი რომ გაიარეს, ისევ შეეკითხნენ:

– ძმაო, რა არის ეგ შუშის კოშკი? გვითხარ და, თუ აუცილებელი რამაა, იქნებ ჩვენც გავაკეთოთ.

– „აუცილებელი“ რა სიტყვაა? განა იქნება ქალაქი შუშის კოშკის გარეშე ან კიდევ შუშის კოშკისგან დამოუკიდებელი ქვეყანა?.. ნავიდეთ, მეგობრებო!..

ხალხმა იქვე მოილაპარაკა ერთმანეთში და უცხოელებს მიაშურა:

– რა გვაკლია ჩვენ სხვა ქალაქებთან შედარებით? რადგან ასე საჭირო ყოფილა, ყველამ ერთად ავაგოთ ეს შუშის კოშკი.

უცხოელების მეთაურმა უთხრა:

– არ იქნება, არა, შუშის კოშკის აგება ასე ადვილი არ არის... ხარჯი უნდა, მასალა უნდა, მუშახელია საჭირო. თავი დაგვანებეთ, ჩვენ ნავალთ ისეთ ქალაქში, სადაც შუშის კოშკი არის.

მაგრამ ხალხი არ ეშვებოდა. რაც საჭირო იქნება, მოგცემთ, ოღონდ გვასწავლეთ, არ გვინდა, რომ სხვა ქვეყნებს ჩამოვრჩეთო.

დასხდნენ, იანგარიშეს და მაშინვე შეუდგნენ საქმეს. სამმა მეგობარმა შუშის კოშკის ხუროთმოძღვრობა იკისრა, ხალხში მუშები გამოარჩიეს, მეურვეები გამოყვეს და ქალაქის ყველაზე დიდ მოედანზე სილისა და ნახშირის ზიდვა დაიწყო. ერთი ნაწილი საჭმელ-სასმელს ეზიდებოდა მუშებისთვის, ტანსაცმელს ამზადებდა, ბოლოს მინა გადაადნეს, შუშის კედლები ამოიყვანეს და, როცა პირველი სართული მოთავდა, სამი მეგობარი შესახლდა შიგ და ხალხს მიმართა:



– ახლა შეიძლება ითქვას, რომ კომპი მზად არის. ჯერ არ დამთავრებულა, თქვენი ქვეყნის დიდების შესაფერი ზომაც არა აქვს, მაგრამ მაგასაც მოესწრებით. ამას ახლა კარგი დაცვა და ბოლომდე მიყვანა უნდა. ახლა გამოგვიყავით ხალხი, მოუმატეთ საჭმელი და სასმელი, დაითხოვეთ თქვენგან ამორჩეულნი, ჩვენ მივხედავთ ყველა თქვენს საქმეს.

ხალხი გახარებული იყო, შუშის კომპი გვაქვსო. თვითონ მოიკლეს საჭმელი და ტანსაცმელი და კომპში მსხდომთ და მათ მოსამსახურეებს დაუნყეს ზიდვა. ცოტა ხნის შემდეგ კომპიდან ბრძანება გამოვიდა:

– საჭიროა, დავაშენოთ კიდევ ერთი სართული. ეს ჩვენ და ჩვენს მოსამსახურეებსაც არ გვყოფნის.

ისევ დაიწყეს ურმებით სილის ზიდვა. კომპში მყოფი ბატონებისა, მათი მოსამსახურეებისათვის და მშენებლობის მუშებისათვის მოჰქონდათ ტომრებით ხორბალი, საკვები, ცხვარი. როცა მეორე სართულიც მოთავდა, სამმა მეგობარმა იქ ხალხს შორის ამორჩეული, მათი საქმისათვის გამოსადეგი ადამიანები შეასახლა. ამათ მალე იგემეს უზრუნველი ცხოვრება, დარწმუნდნენ, რომ კომპი მართლაც აუცილებელი რამ ყოფილა და ცდა არ დაუკლიათ, რათა თავიანთი ნათესავებიც დაეჯერებინათ ამაში.

ასე და ამგვარად, შუშის კომპი მალლა-მალლა იწევდა, სართულს სართული ემატებოდა. იქაურობა გავსებული იყო. შიგ შესულს გარეთ გამოსვლა აღარ უნდოდა. გარეთ მყოფნი კი იმას ცდილობდნენ, როგორმე შემძვრალიყვნენ კომპში. მაგრამ კომპში მსხდომთა და მათ მსახურთა შენახვამ ხალხი წელში განყვიტა. გამოჩნდნენ უკმაყოფილონიც:

– შუშის კომპი რომ საჭიროა, მივ-

ხვდით, მაგრამ რა საჭირო იყო ამდენი ოთახი და მუქთამჭამელი?

მეთაურმა მათ კარგად აუხსნა ყოველი ოთახის დანიშნულება:

– აი, ამ ოთახში მე ვცხოვრობ. შუშის კომპის სათავეში ვდგავარ მე. განა უჩემოდ ეს საქმე წინ წავა? მე რომ არ ვყოფილიყავ, განა თქვენ გექნებოდათ შუშის კომპი?... ეს ოთახები კი ჩემი მთავარი თანაშემწეებისაა... ჩვენ, უცხო ქვეყნიდან მოსულებმა, შუშის კომპი აგიგეთ, ჩვენ თუ არ გიხელმძღვანელეთ, არც შუშის კომპი იქნება და ვერც თქვენ იარსებებთ!

– ძალიან კარგი, – უპასუხა ხალხმა, – მაგრამ ეს ამდენი უქმად მოხეტი-ალე რალა საჭიროა? აი, მაგალითად, ამ ოთახში მყოფი რას აკეთებს?

– ესა? რასა ბრძანებთ! შუშის კომპში შემოსული საქონლის აღრიცხვას ეგ აწარმოებს. საქონლის დამამზადებლების მეთაურია. ეგ რომ არ იყოს, არცერთ თქვენგანს არ ეცოდინებოდა, სად მიდის თქვენი გადასახადი. განა თქვენ კმაყოფილი იქნებოდით ამით?

– ეეე... ამ ოთახში მყოფნი?

– ესენი ეძებენ იმათ, ვისაც თავის დროზე არ მოაქვს საქონელი კომპში, ვინც უხარისხო საქონელს გზავნის, ვინც ცდილობს, შელახოს კომპის ძლიერება... ამისთანების მიშვება თავის ნებაზე ხომ არ იქნება?

– კარგი, მაშ ესენი?

– ესენი მომსვლელთა და წამსვლელთა აღრიცხვას ახდენენ.

– გასაგებია. ესენი?

– ესენი კომპის ოთახებს გვიან, ალაგებენ...

ხალხმა რაც არ იკითხა, ყველაფერზე მიიღო პასუხი და დაიჯერა, რომ ეს ოთახები და მათში მცხოვრები მუქთახორები ნამდვილად საჭირონი არიან, რადგან ზოგი განათების საქმეს მეთაუ-







ბით წამოიძახა:

– ასეთი თავი მე არ მჭირდება! – რქებში მოჰკიდა ხელი და ისროლა. და მაშინ მოხდა რაღაც განსაცვიფრებელი ამბავი: გაისმა ტკაცანი და კოშკი გაიზარა. ხალხს სჯეროდა, რომ შუშის კოშკი ურყევი და უძლეველი იყო და არ ეგონა, თუ ასეთი ფუყე გამოდგებოდა. ამის მნახველთ სათითაოდ დაუშინეს ცხვრის მოჭრილი თავები და ბროლის კოშკი თვალის დახმარებაში მტვრად იქცა; ჩამოინგრა, ჩამოიშალა, შიგ მყოფნი შუშის ნამსხვრევებში მოისრისნენ; გადარჩა მხოლოდ ათიოდე კაცი, რომელნიც იმ დროს კართან ახლოს იყვნენ.

ხალხმა მალე განმინდა იქურობა შუშის ნამსხვრევებისაგან და ისევ ძველ

ყოფას დაუბრუნდა. მიხვდნენ, რომ უკოშკოდაც შეიძლებოდა ცხოვრება. თავისი საქმე ისევ არჩეულ ხალხს ჩააბარეს, მაგრამ შუშის კოშკის უსიამოვნო მოგონება დიდხნას არ ამოშლიათ მეხსიერებიდან.

და როცა მოხუცები ბავშვებს უამბობდნენ ამის შესახებ, ასეთ დარიგებას აძლევდნენ ხოლმე:

– ფრთხილად იყავით, თავზე შუშის კოშკი არ დაიდგათ, მაგრამ თუ ვინიცობაა, როგორღაც მოხდა ასეთი რამ, არ დაიჯეროთ, რომ ის ურყევი და უძლეველი იყოს. ხუთიოდე ცხვრის თავი კმარა იმისათვის, რომ ყველაზე უფრო დიდებული და გრანდიოზული კოშკიც კი ნაცარტუტად იქცეს.



ორჰან ქემალი  
(1914-1970)

უიგუილი<sup>1</sup>

კაცმა წიგნების გაყიდვა გადაწყვიტა. მთელი ღამე იწრიალა ლოგინში, ვერ დაიძინა. „წიგნები გავყიდო!“ – ფიქრობდა იგი. საშინლად შეწუხებულს მხოლოდ ნაშუალამევს ჩაეძინა. დილით ადრე გაღვიძებულს საფეთქლები სტკიოდა. ადგა, ხელ-პირი დაიბანა. საფეთქლების ტკივილმა მაინც არ გაუარა. გარეთ გავიდა, ისევ შემობრუნდა, ტანსაცმელი ჩაიცვა, სარკეში ჩაიხედა, მაგრამ თავისი თავი ვერ იცნო. „წიგნები გავყიდო!“ – კვლავ გაუელვა ფიქრმა. თმის ვარცხნას შეუდგა, სავარცხელი კანში ჩაესო, ეტკინა... და მაინც... „წიგნები გავყიდო!“

– რას შვრები, ჩემო კარგო, – ჰკითხა ცოლმა, – ვერ ხედავ, თასს ნამოედე და წყალი დაღვარე.

– წყალი დავღვარე?!

წიგნების ყუთზე ჩამოჯდა. რა ახლობელი იყო მისთვის ეს წიგნები. ყოველ მათგანში ცოტა რაღაცა იყო თვით მისი ფიქრებისა... ყოველი წიგნი აჭრელებული იყო მისი მინაწერებით, შენიშვნებით, ხაზგასმული ადგილებით.

– დღეს უკვე აღარაფერია გასაყიდი? – ჩუმად ჰკითხა დედას პატარა გოგომ.

დედამ გულმოსულმა შეხედა გოგონას. იგი გაჩუმდა, მაგრამ რატომ? ის ხომ მშიერია. წიგნები მუცელს არ აძლებს. წავიდეს, ჩქარა გაყიდოს ისინი... თვითონ რომ იყოს, ერთ წუთს არ შეყოყმანდებოდა, სწრაფად გაყიდდა.

კაცი წიგნებს არჩევდა. ბავშვი მიუახლოვდა, რაღაც უნდა ეკითხა, მაგრამ მოერიდა, ვაითუ მამა გაჯავრდესო.

მამა იღიმებოდა, სტვენდა, წიგნის გადაშლილ ფურცლებზე რაღაცას კითხულობდა. სახეზე ღიმილი მოემატა, შემდეგ ამოიოხრა, წიგნი დახურა და განზე გადადო.

– მამიკო, – შიშით წარმოთქვა გოგონამ.

აი, ტოლსტოის „ომი და მშვიდობა“... მას ძალიან უყვარდა ტოლსტოი. თვითონ მასში იყო რაღაც ტოლსტოისებური. აი, „ჩემი უნივერსიტეტები“. განსაკუთრებით ეს... მასში გორკისებრი კინამდვილად იყო რაღაც, ალბათ, იმიტომ, რომ ისიც ისე ცხოვრობდა, როგორც გორკი.

– მამიკო!

გოგონას გული ელეოდა, ის ხომ მშიერი იყო... ასე ჯდომით არაფერი გამოვიდოდა. თვითონაც მშიერი იყო, მშიერი... მეტი გამოსავალი არ არის!

წიგნები გადაარჩია, გაზეთის ქალღმერთში გაახვია და კანაფით მაგრად შეკრა. როცა ორი შეკვრა ილღიაში ამოიღო და გარეთ გამოვიდა, ცოლმა უთხრა:

– სადილად არაფერი გვაქვს, აქეთობისას ორი პური, ხორცი და კვერცხი წამოიძღვანიე...

გოგონას ნერწყვი მოადგა.

– დედა, დღეს ისე მომშივდა, რომ მგონი, მთელი ხორცი მე შევჭამო.

შეწუხებული და დაღვრემილი კაცი მძიმედ მიაბიჯებდა. პროსპექტზე დატვირთული მანქანები და ტაქსები ლალად მიმოდიოდნენ, კაცს კი გონებას ურევდა იმაზე ფიქრი, რომ წიგნები უნდა გაეყი-

<sup>1</sup> თურქული მოთხრობები, საბჭოთა მწერალი, 1958.



და... დაფიქრებული მიდიოდა ქვაფენილზე. გარშემო ხალხი ირეოდა – ზოგი – დამნუხრებული, ზოგი – ბრწყინვალედ ჩაცმული, მხიარული.

„და მე წიგნები უნდა გავყიდო!“

კაცმა უკან მოიტოვა შესახვევი და ქუჩები გადაიარა.

წიგნები ერთი თავისი ამხანაგისათვის უნდა მიეყიდა. ისინი ერთ სკოლაში სწავლობდნენ, კლასში ერთ მერხზე ისხდნენ. ბედისა მას არ სჯეროდა და ამიტომ სასწაულად მიაჩნდა ის ამბავი, რომ მისი ამხანაგი დიდი „საავტომობილო სააგენტოს“ პატრონი იყო. თუმცა ეს ამხანაგი ბევრ სხვას სჯობდა.

კაცი კანტორაში შევიდა, მაგრამ ნეტავ არ შესულიყო. იქ მას ნეჯეთი დახვდა. ისიც სკოლის ამხანაგი იყო, ერთ კლასში სწავლობდნენ. „ნეჯეთი ახლა ექიმია. მე კი?“

გაშეშდა. ნეჯეთი ისევ ის ნეჯეთი იყო. მშვენიერ ლურჯ კოსტიუმში გამონყობილი.

„გააგებინოს მას, რომ წიგნებს ყიდის, რათა შინ ორი პური და ხორცი წაიღოს?“

მაგრამ ჰაირიმ უკვე დაინახა იგი და მიაძახა:

– ააა, მოიტანე წიგნები?

ნეჯეთი დამცინავად იცქირებოდა, თვალები წიგნის შეკვრებისათვის მიეპყრო. ჰაირიმ, ალბათ, უამბო ყველაფერი; „წიგნები უნდა მომყიდოს თორმეტი პროცენტის დაკლებით, ძალიან უბედურია, შემეცოდა. წიგნები მე არაფრად მჭირდება, მაგრამ მინდა დავეხმარო“. უსათუოდ გაუმხილა. რომ არ გაემხილა, მაშინ განა ასე ყურადღებით დააცქერდებოდა წიგნებს?

ჰაირიმ ნეჯეთს სწორედ ამ დროს ჩამოუგდო ლაპარაკი წიგნების შესახებ. კაცს ყურებმა ზუილი დაუწყო, თვალთ დაუბნელდა. მოეჩვენა, რომ ნეჯეთი და

ჰაირი ხან შორდებიან და ხან კი უახლოვდებიან მას, ისევ შორდებიან და ხელახლა უახლოვდებიან. შემდეგ კი ციბრუტივით ტრიალებენ.

ნეჯეთი ისევ დამცინავად იცქირებოდა.

– არა, – წარმოთქვა კაცმა უეცრად, – გადავწყვიტე, აღარ გავყიდო წიგნები. – ნეჯეთის ცბიერმა თვალებმა თითქოს მოიწყინეს.

– სამუშაო ვიშოვე და წიგნებს აღარ ვყიდი...

მათ შორის საუბარი გაიბა. ბოლოს სამივენი ადგნენ და სასმელების დუქნისკენ გასწიეს. კაცი ისევ დაბნეული იყო. მის გონებას არ სცილდებოდა ფიქრი შინ წასაღებ ორ პურსა და ხორცზე, მაგრამ...

– დედა, – წარმოთქვა გოგონამ, – უკვე სადილობის დროა და მამა კი ჯერ არ მოსულა.

– მოვა, შვილო, მოითმინე.

– ველარ ვითმენ, დედიკო, შიმშილისგან კუჭი მიხმება, რალაც მემართება, თითქოს კედლები ბრუნავენ.

ქალმა იცის, რომ ქმარი არ მოვა. იცის, წიგნები რომ გაეყიდა, აქამდე დაბრუნდებოდა. „ალბათ, არ იყიდება. წყეულები... რატომ არიან ადამიანები ასეთნი? რა დავუშავეთ? დიდი სახლები აქვთ, მამულები, მანქანები... რატომ არ მიშვებს ქმარი ფაბრიკაში სამუშაოდ? ეჭვიანობს განა?“

ქალმა დამცინავად გაიღიმა. „ეჭვიანობს, ნამდვილად ეჭვიანობს!“

– ოჰ, დედა, ოჰ... არ მოვა ეს მამაჩემი, არ მოვა!

– მოვა, შვილო, მოვა, აუცილებლად მოვა, მოითმინე.

დედა მეზობელთან გავიდა და ნახევარი პური ისესხა. გოგონამ თვალის დახამხამებაში შეჭამა ნახევარზე მეტი.

სალამომ მოატანა, გოგონას კიდევ



მოშივდა, ძილი მოერია, ტახტზე წამონვა. დედამ ძველი მოსასხამი გადააფარა და მეზობელთან გავიდა. „იქნებ მოსაქსოვი აქვთ რამე ან გასარეცხი, იატაკი მოსანმენდი“.

ჭიშკარი გაიღო, იღლიაში წიგნება-მოჩრილი, მთვრალი, მწარედ მოღიმარი ქმარი შემოვიდა და შუა ოთახში შეჩერდა, გაიცინა, თავი გაიქნია. სარკესთან მივიდა, შიგ ჩაიხედა, ტახტზე მწოლიარე გოგონას მოჰკრა თვალი, მას მიაშურა. იღლიაში ამოდებული ერთი შეკვრა ხელიდან გაუვარდა, გაბრაზებულმა მეორეც დააგდო და ფეხით გათელა.

„ცოლი სადაა?“

კვლავ სარკესთან მივიდა, სახეს ჩააშტერდა: ხმელი, გაუპარსავი სახე, ჩაცვნილი, სისხლიანი თვალები... „ვაჟკაცი, ჰა?! ჰმ... მამაკაცი... მამა... მართალიცაა, თუ არ ვუყვარვარ!“ სარკეს მუშტი შემოჰკრა და დაამსხვრია. ნამტვრევები ხმაურით მიმოიფანტა იატაკზე. გოგონას გაელვიდა. გონებაარეული მამამისი იატაკზე მიმოხეულ სარკის ნამსხვრევებს უყურებდა და ფეხით სრესდა მათ.

– მამიკო!

კაცმა გოგონას შეხედა.

– თავს ნუ იკატუნებ, გოგო!

გოგონა მოიკრუნჩხა, შეშინებული თვალებით მიაცქერდა მამას. მამამისი ლაპარაკს განაგრძობდა:

– არ გიყვარვართ, არც შენ, არც დედაშენს; არ გიყვარვართ, ტყუილს მეუბნებით, ტყუილს...

– ღმერთმანი, გვიყვარხარ, მამიკო, მე ძალიან მიყვარხარ.

– ტყუილს ამბობთ, არც შენ და არც დედაშენს იოტისოდენადაც არ გიყვარვართ! გინდათ, მოვკვდე, მერე კი...

– დედაჩემს თუ არ უყვარხარ, მერა შუაში ვარ, მამიკო, მე მიყვარხარ...

– განა შეიძლება, გიყვარდეს უმუშევარი მამა, უმუშევარი ქმარი?

გოგონა ტიროდა, ეგონა, რომ მამამისი ჭკუიდან შეირყა. მამა კი კვლავ განაგრძობდა:

– აი, ახლა სადაა, ვინ იცის? მეზობელთან ვიყავიო, იტყვის, იცრუებს, მე მომატყუებს, იფიქრებს, რომ მოვატყუეო.

ჩამოხედა. კაცი ბარბაცებდა, კედელს ებლაუჭებოდა, სინათლის ანთება ვერ მოეფიქრებინა. თანდათან ცუდად ხდებოდა, თავი საშინლად უბრუოდა.

როცა ქალი შინ დაბრუნდა, უკვე დიდი ხნის დაღამებული იყო. სინათლე აანთო და იატაკზე თავისი ქმარი დაინახა. წიგნების ერთი შეკვრა თავქვეშ ამოედო. გოგონას კი, სადაც იჯდა, იქვე ჩამოსძინებოდა.

ქალმა ამოიოხრა. ახლა მთელი სიმწვავეთ იგრძნო შიმშილის ძალა.



სუათ დერვიში  
(1903-1972)

ქურდი<sup>1</sup>

დიდ ქალაქში კენტ-კენტად ინთება სინათლეები უმდიდრესი, დიდებული უბნებიდან ვიდრე ღარიბთა და ლატაკთა სადგომებამდე.

რაოდენ იდუმალია ის საათი, როცა დღე და ღამე ერთმანეთს ეყრება. საღამოს ბინდბუნდში აკიაფებული ყოველი ნათურა ქალაქის გულში მიმდინარე ცხოვრების ნიშანია. ფანჯარაში გამოღწეული ყოველი შუქის ირგვლივ ნაირ-ნაირი ამბავი ტრიალებს; ცვალებადი მოვლენები, სადაც არც დარდი, არც სიხარული, არც მწუხარება და არც დაღიანება ერთმანეთს არ ჰგავს.

\*\*\*

ვინრო, ოღროჩოღრო ქუჩაზე ძველ ფეხსაცმელებს გაჭირვებით მიითრევს მოხუცი ქალი.

მხარზე დაფლეთილი შალი აქვს წამოსხმული. ცალ ხელში ჯოხი უჭირავს დაუძღურებული სხეულის დასაყრდენად, მეორეში – მომცრო შეკვრა.

– კიდევ რა მოიპარე, აიშე ნინე?<sup>2</sup> – გასძახებს ნაყვავილარი, სახემოთხუპნილი ბიჭი, რომელიც საბაყლოს ფანჯარას მიყრდნობია. ბავშვი ჭუჭყიანი, ნარეცხი წყლითაა გასვრილი, მუდამ გუბედ რომ დგას დუქნის წინ. – კიდევ რა მოიპარე, აიშე ნინე?

ამ ხმის გაგონებაზე მთელი უბნის ბავშვები, მოედანზე მობურთავე აბებრები, ქვის ძველ კიბეზე კოჭის თამაშით გართული გოგონები და თვით თულუხჩი სულელი მეჭმედიც კი ყივილხივილით დაედევნებოდნენ მოხუც ქალს.

– კიდევ რა მოიპარე, აიშე ნინე? პოლიციამ ხომ არ დაგინახა?

ათი წელია, ასე გრძელდება... აიშე ნინე უკვე შეეჩვია ამას.

ათი წელია, ყოველ საღამოს ჯოხდაბჯენილი მოლასლასებს ძველი ფეხსაცმელის ფლატუნით და ყურსაც არ ათხოვებს ხოლმე გარშემოხვეული ბავშვების ხარხარს.

\*\*\*

კედელზე ჩამოკიდებული ჭუჭყიანი ღამის სანათურით განათებული ვინრო დერეფანი. შუაში დადგმულ მანგალზე შიშხინით ინვის აყროლებილი თევზი.

ტაფასთან მსუქანი დედაკაცი ტრიალებს. იქვე ახალგაზრდა ქალი დგას და ბავშვს ძუძუს აწოვებს.

შემოსულმა აიშე ნინემ ეს ქალი ვერ იცნო... ახალი მდგმური იქნებაო, ალბათ. დიახ, ასე უნდა იყოს, რადგან, კიბეზე რომ ადიოდა, მას ჩახრენნილი ხმა მოესმა:

– ეს ბებრუხანა, უსალმოდ რომ ჩაგვიარა, ქურდია, შენ აქ ახალი გადმოსული ხარ... იმიტომ გეუბნები, დაო, რომ იცოდე, სადმე თუ წახვალ, კარი კარგა მაგრა ჩაკეტე, არაფერი დაგაკლდეს. ხომ გაგიგონია, ხმელთან ერთად ცეცხლი სველსაც მოედებაო...

\*\*\*

აიშემ აკანკალებული ხელებით გაჰკრა ასანთი და სინათლე აანთო.

ღარიბი, ბინძური და დაულაგებელი ოთახი განათდა.

<sup>1</sup> თურქული მოთხრობები, საბჭოთა მწერალი, 1958.

<sup>2</sup> ნინე – ბებია.



მოხუცმა ქალმა კედელთან მდგარ სანოლს მიაშურა. ფრთხილად ეხებოდა საბანს და ეძებდა სხეულს, რომელიც ოცდათერთმეტი წელია, ამ საბანქვეშ წევს; სხეულს, რომელიც სხვას შიშსა ჰგვრიდა, მაგრამ მისთვის კი ძალიან ძვირფასი იყო.

\*\*\*

დიახ, დიდი ქალაქის ყოველ სახლში ანთებულ სანთელს თავ-თავისი თავგადასავალი აქვს... ამ მოხუცი ქალის ჭუჭყიან ოთახს და მბუჟტავ სინათლესაც აქვს თავისი ტრაგედია... მაგრამ იგი არავინ იცის. ათი წელია, მას ქურდს ეძახიან და მოსვენებას არ აძლევენ. საცოდავ აიშე წინეს კი... ნაღვლიანი, ტანჯვითა და ცრემლით სავსე ცხოვრება აქვს.

ახალგაზრდობაში ერთ ღარიბ გლეხს მიათხოვეს, რომელიც აიშეს არ უყვარდა.

ეს ლატაკი და ლოთი საღამოობით, იმის ნაცვლად, რომ სახლში პური მოეტანა, უმიზეზოდ სცემდა ხოლმე აიშეს.

მაშინ აიშეს ნაბლისფერი თმა, თვალისა და სახის მშვენიერი ფერი ჰქონდა. მისი უბედურების მოწმე ერთმა მეზობლის ახალგაზრდამ გზა გადაუჭრა, როცა ის სამუშაოდან სახლში ბრუნდებოდა.

– ჩემთან წამოდი, – უთხრა ვაჟმა, – ღმერთმანი, ცოლად მინდისხარ. გაეყარე შენს ქმარს და მე წამომყევი.

\*\*\*

აიშე ახალგაზრდა იყო. ის ვაჟიც... სწორედ შესაფერები იყვნენ. სიყვარულისათვის სხვა საბაბი აღარ უძებნიათ.

აიშემ სახლი მიატოვა.

შეირთეს ერთმანეთი. მაგრამ... დიდხანს არ უცხოვრიათ ერთად. მათი ერთად ცხოვრების ხანი აიშეს ცხოვრებაში ყველაზე უფრო დიდი ბედნიერება

იყო.

ჰო, ეს ბედნიერება დიდხანს არ გაგრძელებულა. ერთი წელიც კი არ იყო გასული, რომ ერთ დღეს ამხანაგებმა აიშეს ქმრის ცხედარი მოასვენეს შინ.

ერთი მაღალი შენობის ფასადს რომ ლებავდა, ფეხი დასცდენოდა, გადმოვარდნილიყო და მომკვდარიყო.

\*\*\*

ფეხმძიმე აიშე მარტო დარჩა. გულმოკლული იყო. ვინ იცის, რამდენი მწუხარება, შიმშილი და სიცვიე ელოდა წინ. გამკითხავი კი არავინ ჰყავდა. მართალია, გაჭირვებამ გატეხა, მაგრამ ვერ მოკლა.

და ზამთრის ერთ ცივ დღეს აიშეს საცოდავი გოგონა მისცეს ხელში.

ეს ბავშვი კი არა, სიმახინჯე იყო. მთელი ტანი ბალნით ჰქონდა დაფარული, თავი – ტანზე უფრო დიდი, ფეხები – მონგრეული, რალაც საშინელება იყო.

აიშემ პირველად ბავშვი ხელში ვერ აიყვანა, მაგრამ მის გულში თანდათან გაიღვიძა სიბრალულნარევმა სიყვარულმა და მან ისევე, როგორც ყველა დედამ, ვინ იცის, იქნებ უფრო მეტადაც, შეიყვარა თავისი პირმშო.

\*\*\*

საავადმყოფოდან სახლში დაბრუნებული აიშე ყველას ებრალებოდა, უბნის თავკაცებს – პირველ რიგში. მათ აიშე და მისი პირველი ქმარი შეარიგეს.

ნეტავ თუ უყვარდა მას ახლა ქალი? ვინ იცის, რატომ, მაგრამ ქმარმა ყველაფერი აპატია აიშეს. ის კი მხოლოდ იმიტომ დასთანხმდა ისევ მის ცოლობას, რომ ბავშვისთვის სიცოცხლე შეენარჩუნებინა.

ჯანმრთელი, უბავშვო ქალებიც კი ვერ პოულობდნენ სამუშაოს და მას, აბა, ვინ რას მისცემდა?



აიშეს ქმარი უფრო უხეში და უკეთური გახდა... საშინლად ტანჯავდა და ანამებდა აიშესა და ბავშვს. აიშე ბავშვთან ერთად ისევ მასზე იყო დამოკიდებული.

ბავშვი გაიზარდა, ენა აიდგა, მაგრამ სიარული მაინც არ დაუნყია. სანყალი იატაკზე იზრდებოდა. აიშემ ქირაზე სარეცხის რეცხვას მიჰყო ხელი, რომ ბავშვისთვის ლუკმა ეჭმია. ასე ირჯებოდა წლობით.

გავიდა ხანი. გოგონა დაქალიშვილდა. თავზე ხვეული გაძეძილი თმა ჰქონდა. დიდ პირში ჩაშავებული კბილები მოუჩანდა.

\*\*\*

თითქოს ისიც არ კმაროდა უბედური აიშესთვის, რომ სიღარიბესა და ქმრის ჭირვეულობას იტანდა. ახლა გოგოც ლოგინად ჩაუვარდა. მარჯვენა ლოყა ულურჯდებოდა, უსივდებოდა და ტანჯვა-ვაებაში მყოფი საცოდავი სხეული მწარედ ღრიალებდა.

\*\*\*

ქმარი მოხუცდა. ძველებურად ველარ შოულობდა ფულს. იმასაც ღვინოსა და ყომარის თამაშში ფლანგავდა. ზოგჯერ მთელი დღეები არ მოდიოდა შინ, ცოლთან არაფერი აკავშირებდა და არც ბავშვი ებრალებოდა.

ქალიშვილს სახეზე ახლა პატარ-პატარა მუნუკებიც დააყარა. ქმარი შემთხვევით თუ შემოივლიდა შინ და ისიც იმისათვის, რომ ცოლისთვის ფული წაერთმია.

არა, იმიტომ კი არა, რომ ავადმყოფს ვერ ტოვებდა აიშე, არა, უკვე დაბერდა, ვერც სარეცხს რეცხავს და ვერც – იატაკს. ამიტომ არ აძლევენ სამუშაოს.

თებერვლის იმ ცივ დღესაც ასე იყო. არც საჭმელი ჰქონდათ, არც სას-

მელი, არც ნახშირი. ავადმყოფი სიცვისგან კრთოდა, იყინებოდა, ოხრავდა.

აიშე სახლიდან გაიპარა, რომ ამ საცოდაობისათვის აღარ ეცქირა. ქმრის საძებნელად წავიდა. ქმარი რამდენიმე დღეა, შინ აღარ მოსულა.

ქმარი, როგორც ყოველთვის, ღვინის სარდაფში იპოვა. ბავშვი შეაგზავნა დასაძახებლად. ბერიკაცს თვალები მთლად დანითლებული ჰქონდა.

აიშე შეეცადა, რაიმე შეესმინა ამ თვალმდარისხლიანებული კაცისთვის.

– ბაყალი და მენახშირე საერთოდ არაფერს იძლევიან. ჯერ ძველი ვალი გაქვთო, მეუბნებიან.

ტყუილად იარა, ერთხელ ხელიც კი გაიშვირა სამათხოვროდ. ერთმა ძუნწმა ზედაც არ შეხედა, ისე მიძახა:

– ჯანმრთელი ქალი ხარ, ხელი გაანძრიე.

ბოლოს, როცა შინ დაბრუნდა, სამი დღის სულთმობრძავემა, უბედურმა ბავშვმა ესლა უთხრა დედას:

– დედა, ნახშირი მოიტანე?

– კი, შვილო, ახლავე დავანთებ.

– ჩქარა დაანთე, დედი, თორემ გავიყინე. ცოტა მაინც გავთბე.

\*\*\*

ისევ წავიდა სახლიდან, ისევ ქუჩაში გავიდა, მერე როგორ იყო, რა მოხდა, აღარ იცის. აკანკალებულმა ფეხებმა იგი მენახშირესთან მიიყვანეს.

იმ დროს, როცა მენახშირე სხვა საქმით იყო დაკავებული, აიშემ მხარზე მოხვეულ შალში რამდენიმე ნახშირი შეახვია.

ძალიან გამოუცდელი იყო, ხელები აუცახცახდა. მენახშირემ შენიშნა და შეუტია.

მშიერი მოხუცი, ულონო და ნახევრად გაყინული, ველარ გაიქცა, ადგილზე იდგა გაუნძრევლად.



ის ღამე კომისრის მოსვლამდე საყარაულოში გაატარებინეს...

მეორე დღეს, როცა ბინდისას შინ დაბრუნდა, აუტანელმა სუნმა შეანუხა. ასანთს გაჰკრა.

– სიდიკა, – დაუძახა შვილს, – ხმა გამე, გოგო!

სანოლს მიუახლოვდა, მაგრამ... მწარე კივილი აღმოხდა და გულდაღმა დაემხო.

სიდიკა არ სუნთქავდა... თმა ბალიშზე გაშლოდა, თვალები გადმოკარკლული ჰქონდა.

აი, უკვე ათი წელია, აიშეს ყველა ქურდს ეძახის... ქმარიც კი, როცა ის

მთვრალი მოვა ხოლმე შინ, ჩხუბს აუტეხს და გაჰყვირის:

– ქურდო, ქურდოო!..

\*\*\*

დიდ ქალაქში თითო-თითოდ ინთება სინათლეები.

რა იდუმალებითაა მოსილი დღისა და ღამის გასაყარი... საღამოს ბინდბუნდში აკიაფებული ყველა სანთელი ქალაქის მკერდში მიმდინარე ცხოვრების მანიშნებელია. დიდ ქალაქში თითო-თითოდ ანთებულ ყოველ სანთელს საკუთარი საიდუმლო, საკუთარი თავგადასავალი აქვს.

## ფოსფორიანი ჯეჰრია<sup>1</sup>

(ნაწყვეტები რომანიდან)

თხუთმეტი წუთი გავიდა, რაც ის საპოლიციო უბანში მოიყვანეს. ოთახში ძალიან თბილოდა, რადგან კოქსის ღუმელი ენთო და უამრავ ხალხსაც მოეყარა თავი.

მიუხედავად ამისა, ჯეჰრიეს მაინც აკანკალებდა. სიცივე ძვალ-რბილში გასჯდომოდა.

ეს მხოლოდ სიცივის ბრალი იყო. მაგალითად, შიში ან რაიმე სხვა გრძნობა მას თრთოლას ვერ მოჰგვრიდა.

ჯეჰრიე... ამ და ბევრი ამისთანა საპოლიციო უბნის ერთი მუდმივი სტუმართაგანი იყო წლების მანძილზე.

ძალიან ცივი ღამე იდგა...

წვიმის წვრილ-წვრილი წინწკლები მტვერივით ეფინა მის შავ, ხუჭუჭ თმებს.

ასეთ ღამეებს, სტამბოლის ღამეებს, როცა წესტი ძვალსა და რბილში

ატანდა ხოლმე, ის „დაწყველილ ღამეებს“ ეძახდა.

ასეთ ღამეებში ნამდვილი წვიმა არც კი მოდიოდა. ღამის უკუნეთი სასხურებელ მანქანასავით აქეთ-იქით აფრქვევდა სინესტეს.

ფარაონებმა<sup>2</sup>, როგორც ჯეჰრიე ეძახდა ხოლმე პოლიციელებს, ამ ღამით თვალი იმიტომ შეასწრეს, რომ თმები ჰქონდა წვიმით დანინკლული.

მან უმაღლესს შეაფარა თავი, როგორც კი დაუსტვინეს და შორიდან ფეხის ხმა მოესმა...

ჯერ ქვაფენილზე მაღალქუსლიანი ფეხსაცმელების გამალებული ბაკაბუკი გაიგონა... შემდეგ კუთხესთან ორი ქალის აჩრდილი გამოჩნდა... ერთი მათგანი მსუქანი იყო, მეორე – გამხდარი... მსუქანი ბურთივით მოგორავდა... გამხდარი, რომელსაც თითქოს უფრო

<sup>1</sup> სუათ დერვიში, ფოსფორიანი ჯეჰრიე, რომანი, საბჭოთა საქართველო, თბილისი, 1967.

<sup>2</sup> ფარგონის ენაზე პოლიციელებს ეძახიან.



სწრაფი სირბილი და თავის შეფარების უნარი უნდა ჰქონოდა, წარამარა რალაცას ედებოდა, ზანტად ირჯებოდა და ისე უხერხულად გარბოდა, თითქოს საცაა, დაეცემაო. მათ უკან მამაკაცების ფეხის ხმა ისმოდა.

მსუქანი ქალი იცნო... ტანის მოყვანილობაზე... ეს თოფ<sup>1</sup>-მელაჰათია... ნამდვილად ის არის...

ის ასე ადვილად არავის ჩაუვარდება ხელში... ამ ბნელ ღამეში აუცილებლად გაქრება სადმე თავისი ჩამრგვალებული ტანით. ახლაც სწორედ ასე მოხდა...

იგი თვალის დახამხამებაში გაუჩინარდა ქუფრად აღმართული ერთ-ერთი სახლის სადარბაზო კარში.

მელაჰათი სტამბოლს ხელისგულივით იცნობს: სად ნიშია თავშესაფარი, სად – ქუჩიდან ქუჩაზე გასასვლელი, სად – ნაგვის ყუთი, სადაც მშვიდად შეაფარებდა კაცი თავს, ან ფუნდუკი, რომლის სამზარეულოშიც უკანა კარიდან შეიძლება შესვლა.

ჯევრიეც მას ბევრად არ ჩამორჩებოდა ამ საქმეში, მაგრამ თოფ-მელაჰათს მთელ სტამბოლში ვერავინ სჯობნიდა.

ჯევრიე ჭიშკართან შეყუჟულიყო, სამად მოკეცილი ერთმანეთზე შეწყობილ ნაგვის ყუთებს ამოფარებოდა, თავი მუხლებში ჰქონდა ჩარგული, მკლავები კი წვივებისათვის შემოეჭდო.

შემდეგ, როცა ჯევრიეს ხელი სტაცეს და წაიყვანეს, იჯდა და ფიქრობდა, თოფ-მელაჰათი რომ ჩავარდნოდან ხელში, ფარაონები მე ველარ მიპოვიდნენო.

დიახ, როცა ამ ჩიხში უეცრად გაქრა მელაჰათი, მაშინ კი დაიწყეს ჭიშკრებში ცქერა.

გამხდარი გოგო მინაზე იყო გართმული და მალე დაიჭირეს. ხელი რომ სტაცეს, გინება მორთო... ჯევრიემ ხმაზე იცნო. ასეთ პატარა სხეულში ასეთი ბოხი ხმა...

ეს ყველას უკვირდა. ამის გამო ქოს<sup>2</sup>-აითენს ეძახდნენ.

\*\*\*

თმების დამალვა ჯევრიეს აზრადაც არ მოსვლია. რომც გახსენებოდა, სად დაემალა თავი.

ქუჩის კუთხეში, საკმაოდ მოშორებით, ფარანი ენთო.

სწორედ ამ ფარნის სინათლე სწვდებოდა მის თმებს და ათასობით წვიმის წვეთს წვრილ-წვრილი ვარსკვლავებივით აკიაფებდა.

ფარაონებმა სწორედ ეს შეამჩნიეს... ასევე იყო მაშინაც, როცა ის პირველად მოხვდა პოლიციაში.

მაშინაც გაიქცა და დაიმალა, მაგრამ მის თმებში ჩამსხდარმა წვრილ-წვრილმა ვარსკვლავებმა გასცეს...

კომისარი, რომელმაც ის პირველად დაიჭირა, მსუქანი და ხანში შესული კაცი იყო.

იმ ღამეს მისკენ მიმართულმა ელექტროფარნის სხივმა მის თმებში უამრავი ვარსკვლავი ააციმციმა.

– ერთი ფოსფორიანი აქაც არის... აბა, ფოსფორიანო, ერთი ადექი მანდედანი! – დაიძახა პოლიციელმა.

იმ დღიდან „ფოსფორიანი ჯევრიე“ გახდა მისი სახელი, თუმცა მას ეს სახელი სხვა მიზეზითაც შეეფერებოდა. არა მარტო თმები, არამედ თვალელებიც და საერთოდ, მთელი მისი არსება მართლაც და თითქოს სინათლეს აფრქვევდა ირგვლივ.

როცა გოგოები ქუჩის ბნელ კუთხე-

<sup>1</sup> თოფ – მრგვალი.

<sup>2</sup> ქოს – როხროხა.



ში იდგნენ ხოლმე, მამაკაცები მაინც პირდაპირ ჯვევრიესთან მიდიოდნენ. და განა იმიტომ, რომ მას ხედავდნენ ან სწორედ მას ირჩევდა ვინმე.

– ფოსფორიანია, – იტყოდნენ გოგოები, – თვალში პირველად ეგა ხვდებოდა ხოლმე.

დიახ, თითქოს მართლაც ფოსფორიანი ყოფილიყო, მამაკაცები მაინცადა მაინც მას აირჩევდნენ ხოლმე ამდენ გოგოში...

სიბნელეში მამაკაცები ხედავდნენ, როგორ უბრიალებდა თვალები და თეთრად უქათქათებდა კბილები.

შორს მბუჟტავი ქუჩის სინათლეც საკმარისი იყო, რომ ჯვევრიე მთლად აციმციმებულყო...

გოგოებს არ შურდათ მისი... უბრალოდ, გული სწყდებოდათ, რომ იმისთანები არ იყვნენ.

– რა გაქვს ასეთი, ფოსფორიანო? – ჯვევრიემ თვითონაც არ იცოდა, რა ჰქონდა. და მხოლოდ იმიტომ, რომ პასუხი გაეცა, – ფოსფორი, – ეტყოდა ხოლმე.

უკეთესი ეპითეტის გამონახვა, რომელიც ასე კარგად დაახასიათებდა ამ სიბნელის ასულს, ქალს, რომელიც ღამეს ქუჩაში ატარებდა ხოლმე, ძნელი იყო.

მისი სახელი ისევე იყო ქუჩაში ცნობილი, როგორც მისი სილამაზე.

ფოსფორიანი ჯვევრიე.

ის ყველაზე უფრო მიმზიდველი გოგო იყო სტამბოლის ქოხმახებით დაფენილ ქუჩებში, ხანძრით გადამწვარ უბნებში, სასაფლაოებზე, გალავნის, თექვსურის სასახლის ნანგრევებისა და ბოსტნების უბანში.

მანანალები მას ერთიმეორეს ეცილებოდნენ და ჯვევრიესთან ყოფნა ყველაზე უფრო სატრაბახოდ ითვლებოდა

მათ შორის...

– ნუხელ მეჯიდიეჯოში<sup>1</sup> დილაზე ვაცეკვეთ ფოსფორიანი!

ცეკვის დროს ჯვევრიე მართლაც რომ ფოსფორით ენთებოდა.

განა შეიძლებოდა კაცს ჯვევრიეს ცეკვა ენახა და არ გადარეულიყო?..

რამდენ კაცს ნაუნევი ერთმანეთზე ქუჩის ამ ფოსფორიანი ვარსკვლავის გულისთვის.

რამდენი ყმანვილი კაცის სიკვდილის ან ციხეში მოხვედრის მიზეზი ყოფილა ჯვევრიე...

ეს მხოლოდ ალაჰმა უნყოდა.

ფოსფორიანმა კი ამის შესახებ არაფერი იცოდა...

\*\*\*

...თებერვალი იყო, მაგრამ თბილი საღამო იდგა... ნაადრევ სითბოს ნუში შეეცდინა და თეთრად გადაეფურჩქნა.

სახლებში ჯერ კიდევ ციოდა, გარეთ კი გაზაფხულის სითბო ეალერსებოდა ადამიანს.

ჯვევრიე დანიშნულ დროზე მისულიყო ქერიმთან და პაკეტი წამოეღო.

გეგმა მზად ჰქონდათ. ჯვევრიე უნდა ჩამჯდარიყო ფინდიელის სანაპიროზე მიბმულ ნავში და ქერიმს დალოდებოდა. შემდეგ გავიდოდნენ ზღვაში, პაკეტებს გადაყრიდნენ, გამოვიდოდნენ სადმე სხვა სანაპიროზე და სხვადასხვა მხარეს გაემართებოდნენ, ოღონდ, მეორე დღეს, შუადღისას ორივე უნდა გამოჩენილიყო კარაქოზე, ხორცის დუქნის წინ, რათა დარწმუნებულიყვნენ, რომ არაფერი შემთხვევით და ისე გასცლოდნენ იქაურობას, თითქოს ერთმანეთს არც კი იცნობდნენ. ჯვევრიე მხოლოდ ერთი თვის შემდეგ მოვიდოდა და ნახავდა ქერიმს.

„ის შენით იამაყებსო, მითხრა ქერიმმა,“ – ფიქრობდა ჯვევრიე და ხელში

<sup>1</sup> უბანია სტამბოლში.



მძიმე პაკეტით მიაბიჯებდა ბნელ ქუჩაზე. თუ გათავისუფლდა და ისევ შეხვდა ჯევრიეს, ეტყოდა, მე შენით ვამაყობო.

ამიტომ აუცილებელი იყო ნაკისრი საქმის ნარმატებით დასრულება, მოვალეობის შესრულება.

ნაცნობ პოლიციელს რომ შეხვედროდა, შავად იყო საქმე. მაშინვე დაიჭერდნენ და პაკეტის ამბავიც გაიხსნებოდა. ის კი გაიგებდა და იფიქრებდა, გამცაო. „ხომ მოვკვდი სირცხვილით,“ – ფიქრობდა ჯევრიე. თუნდაც გაეგო, რომ ასე არ მოხდა, ჯევრიეს რა.

პაკეტი რომ პოლიციამ იგდოს ხელთ, ეს ძალიან საშიშია მისთვის. საშიში რას მიქვია, სიკვდილი იქნება.

ჯევრიემ იცოდა, რომ ეს საშიშროება ძალიან სერიოზული იყო, მაგრამ ვერც კი მიმხვდარიყო, რა მოიმოქმედეს ისეთი, რის გამოც ისინი ასეთ გაუთავებელ შიშში არიან.

ამიტომ სიფრთხილე იყო საჭირო.

ჯევრიე მიაბიჯებდა და გაფაციცებით ადევნებდა თვალყურს, უკან ხომ არავინ მომდევსო.

თუმცა, რაც ბოლუდან დაბრუნდა, ისედაც ფრთხილად იყო ხოლმე.

კაცმა რომ თქვას, მისი ხელობის ადამიანი განა მუდამ „დამალობანას“ და „დაჭერობანას“ არ ეთამაშება პოლიციას?

დამალვაში დახელოვნებული და გამოცდილი იყო.

მაგრამ ჯევრიე არასდროს არ დამალვია პოლიციას ასეთი მნიშვნელოვანი საქმის გამო.

ამას მის გადასარჩენად აკეთებდა და მის გამო ეშინოდა ყველაფრისა. მას ეშინოდა ქუჩაში სტვენით მომავალი კაცისა, კაცისა, რომელიც კედლიდან ჩამოხტა და გაფაციცებით გარბოდა ქუჩის მეორე მხარისაკენ, საკუთარი ჩრდილისა, რომელმაც უეცრად წინ გაუსწრო,

როცა ჯევრიემ ქუჩის ფარნის ქვეშ ჩაიარა.

ახლა ბნელი ქუჩები უკვე გათავდა და საცაა, გამზირზე უნდა გასულიყო... ახლა უფრო მეტი იყო იმის შესაძლებლობა, რომ ნაცნობ პოლიციელს შეხვედროდა, თვითონაც ჩავარდნილიყო და ისიც ჩაეგდო.

ჯევრიეს ძველი ფეხსაცმელების ქუსლებს ერთი ბაკიბუკი გაუდიოდათ ქვაფენილზე. არც კი ახსოვს, რომ ოდესმე ევლოს ასეთი ხმამაღალი ნაბიჯებით.

გამზირს რომ მიაღწია, თავისუფლად ამოისუნთქა... ასეთ დროს ქუჩა, რომ ეგონა, არც ისეთი ხალხმრავალი აღმოჩნდა. „შიშმა მთლად შემარყია,“ – ფიქრობდა ჯევრიე, – „ასეთ დროს გამზირზე ვინ უნდა იყოს“.

ერთხანს განათებული ქუჩით იარა, შემდეგ ერთ წყაროსთან ზღვისკენ გაუხვია და ვიღაცას შეეჩება. ეს უბნის ყარაული იყო. ჯევრიეს გულმა ბაგაბუგი აუტეხა. „ეგენი პოლიციელებზე უარესები არიან. ასეთ დროს ვეება პაკეტით ხელში ზღვისკენ მიმავალი ადამიანი რომ ნახონ, ვინც უნდა იყოს, ეჭვს მიიტანენ. განსაკუთრებით კი ასეთ ბნელ ადგილას“.

ყარაულმა ფარანი აანთო და სახეში მიანათა ჯევრიეს. ჯევრიეს კინალამ გული წაუვიდა შიშისგან. მადლობა ღმერთს, აქ იშვიათად დავდივარ და არ მიცნობსო, იფიქრა და შეუხელებლად განაგრძო სიარული.

ყარაული ადგილიდან არ დაძრულა. ჯევრიეს უკან არ მოუხედავს, მაგრამ გრძნობდა, რომ ყარაული ერთ ადგილზე იდგა. უეჭველი იყო, რომ მან ეჭვი აიღო ჯევრიეზე.

ამ სახლთან თუ გაუხვია, მერე მოეფარება მის თვალს და ჩაჯდება ნავში, რომელიც ორმოცდაათ-სამოც ნაბიჯზეა



აქედან მიბმული ხის ნავმისადგომზე.

„ლონივრად მოვუსვამ ნიჩბებს და მერე მდიოს ყარაულმა,“ – ფიქრობდა ჯევრიე.

ქერიმი, მადლობა ღმერთს, მასზე ადრე იყო მისული ნაპირზე და ელოდა...

ჯევრიემ სახლთან გაუხვია თუ არა, მოკურცხლა. მას ნაანგარიშები ჰქონდა, რომ ყარაული ვერ ხედავდა, მაგრამ ის კი აღარ მოსვლია აზრად, რომ ფეხის ხმას გაიგონებდა. მაგრამ როცა ყარაულმა გაიგონა, რომ ქუჩის ქალი, რომელსაც ხელში ვეება პაკეტი ეჭირა, გარბოდა, მაშინვე მიიჭრა სახლის კუთხესთან და ყვირილი დაიწყო:

– ჰეი, შესდექ! შესდექ!

ჯევრიე მიხვდა, რომ ეს შეძახილი მისკენ იყო მიმართული და უფრო ჩქარა გაიქცა.

„ღმერთო, მიშველე, ვიღუპები, თუ დამიჭირეს... იმასაც სიცოცხლეს გამოასალმებენ და იფიქრებს, რომ მე გავეცი“.

ყარაული მიხვდა, რომ მისი წონის კაცი გაქცეულს ვერ დაენეოდა და სტვენა ატეხა. ის დარწმუნებული იყო, ეს ქალი, რომელსაც ხელში პაკეტი ეჭირა და გარბოდა, ქურდი ან კონტრაბანდისტი იქნებოდა.

ჯევრიემ გაიგონა, რომ ყარაულის სასტვენის ხმას ვიღაც გამოეხმაურა. გაისმა მდევრების ფეხის ხმაც.

მძიმე პაკეტით სირბილი ძნელი იყო. კიდევ ოცი-ოცდაათი ნაბიჯი და ნავში იქნება. რამდენჯერმე კინალამ ნაიქცა, მაგრამ თავი შეიკავა. ბოლოს ნაპირსაც მიაღწია.

– შესდექ! შესდექ! – ესმოდა ჯევრიეს, მაგრამ ყური არ უთხოვებია ამ შეძახილებისთვის და პირდაპირ ნავში ჩახტა. ქერიმი ჯერ არ იყო მოსული. ასეთ ხმაურს, პოლიციელებისა და ყარაულების სასტვენის ხმას რომ გაიგონებ-

და, რასაკვირველია, არ გაეკარებოდა აქაურობას... ჯევრიეს სხვა გზა აღარ ჰქონდა, ნავი აუშვა და მოშორდა ნაპირს.

ის მთელი ძალით უსვამდა ნიჩბებს. ზღვაზე, როგორც ცარიელ სახლში, სიჩუმე იდგა. ირგვლივ ჩამიჩუმი არ ისმოდა, მხოლოდ ნიჩბების ხმა სწვდებოდა ჯევრიეს ყურს...

ნაპირი უკვე საკმაოდ შორს იყო. ჯევრიეს ბედი ჰქონდა. წყლის დინებაც მას ეხმარებოდა და აჩქარებდა ნავის მოძრაობას.

– ამ ოხერ ნიჩბებს რა ტლაშატლუში გაუდით, – ბურტყუნებდა ჯევრიე.

ის ცდილობდა, უხმოდ მოესვა ხოლმე ნიჩბები, მაგრამ, რაც უფრო მეტს ღელავდა, უფრო მეტი ხმაურით ეშვებოდა ნიჩბები წყალში. ჯევრიეს ეჩვენებოდა, რომ ნიჩბების ტლაშატლუში დიდ ექოს გამოსცემდა ნაპირზე.

ამ უკუნეთ ღამეში მდევრებს რომც ვერ დაენახათ, ნიჩბების ხმაზე მაინც მიხვდებოდნენ, რომ ის ზღვაში იყო გასული.

ახლა სასტვენების, ფეხისა და ხმამალლა მოლაპარაკე მამაკაცების ხმა უკვე ნაპირიდან ისმოდა.

„მადლობა ღმერთს, ნაპირზე სხვა ნავი არ არის,“ – ფიქრობდა ჯევრიე და უფრო გულმოდგინედ უსვამდა ნიჩბებს. ახლავე რომ გადააგდოს პაკეტი, ხმას გაიგონებენ და ძებნას დაუწყებენ. თან კიდევ ქერიმ აბიმ უთხრა, პაკეტი ნაპირიდან შორს უნდა გადავაგდოთო.

შიშით იყო თუ მართლა, ჯევრიეს მოეჩვენა, რომ დინებამ მოქცევა დაიწყო.

ზღვის წყალი თითქოს გასქელდა და ბადაგივით ეკვროდა ნიჩბებს. ჯევრიეს ეჩვენებოდა, ჭანჭრობში ვეფლობიო.

ნაპირზე ჯიბის ფარნის სინათლეე-



ბი აციმციმდა. ერთი ფაციფუცი იდგა. „არასდროს არ მეგონა, ასე თუ შემეშინდებოდა პოლიციელების,“ – გაიფიქრა ჯევრიემ.

ზამთრის ცივ ღამეებში, როცა ფული არ ჰქონდა ხოლმე, ჯევრიეს უყვარდა კიდეც საპოლიციო უბანი, განსაკუთრებით კი ის, ბეიოღლუში რომ არის.

„პოლიციას სარკე აქვს, სარკე აქვს...“

მღეროდა ჯევრიე და მუდამ გაგიჟებით უყვარდა ამ სარკეში ცქერა და კოხტაობა. ჯევრიესათვის წინათ ყველაფერი თამაში იყო, მაგრამ ახლა:

„გოგოს ხელზე დალი აქვს, დალი აქვს...“

მღეროდნენ მისი მნახველები. ჯევრიეს მართლაც ჰქონდა ხელზე დალი – მაჯებზე დახატული ორი ხელბორკილი. ტანჯვის შესამსუბუქებლად სვირინგ გაიკეთა და ამ ტანჯვითა და სიყვარულით ხელებიც დადაღული ჰქონდა და გულიც.

ასეთი დიდი სიყვარული და ტანჯვა მუდამ თვალებზე ეტყობოდა ჯევრიეს, სწორედ ამიტომ ეუბნებოდა ხოლმე სუმბულ-დუდუ:

– შენ რალაც გჭირს, „ჩემს ჯევრიეს თვალებზე ეტყობაო“.

ჯევრიეს ყოველთვის თვალებზე ეტყობოდა ყოველგვარი განცდა: სიხარული, სიყვარული, ფიქრები და იმედები.

როგორც ოდესღაც ამოიკითხავდით ჯევრიეს თვალებში, რომ ის კახპა იყო, ისე ახლა თვალებზე ეტყობოდა ის სიყვარული, რომელმაც წმინდანივით უმანკოდ და სპეტაკად აქცია ჯევრიე, თვალებზე ეტყობოდა შიში – ვაითუ, არ მოვენონოო, თვალებზე ეტყობოდა სიყვარულით გამოწვეული იმედი.

ახლა კი, როცა ის დაიჭირეს და ჯევრიე ასე დაჰკანკალებდა მის სიცოცხლეს, ყველა ამბობდა, რომ ჯევრიეს

„გულში შავი დარდი აქვს, დარდი აქვსო“.

ეს დარდი სიყვარულზე უფრო შავ ნალველსა ჰგავდა.

ჯევრიეს უყვარდა ის კაცი, რომელმაც თავის სახლში წაიყვანა ავადმყოფი; არასდროს უთხოვია ის, რასაც ყველა სხვა მამაკაცი მოითხოვდა მისგან. კაცი, რომელმაც მას ადამიანური თავმოყვარეობა დაუბრუნა, პატივს სცემდა, თქვენობით მიმართავდა და თავი ისე ეჭირა, თითქოს ვერ ხედავდა, რომ ჯევრიე კახპა იყო.

როცა გაიგო, რა საშიშროება ელოდა მას, სიყვარული ტანჯვად ექცა.

ჯევრიე შეშინდა, რადგან ამ ნალველისა და საკუთარი მოუხერხებლობის გამო შესაძლოა, საფრთხეში ჩაეგდო იგი.

ჯევრიემ ჩვეული გულცივობა დაკარგა და, რადგანაც ყარაულმა სახეში შეხედა, გაქცევა ამჯობინა.

„ცოფიანი ძაღლების ხროვა არ დავიდევნე უკან?!“

\*\*\*

ჯევრიე გრძნობდა, რომ ნიჩბები, რომლის ბოლოებიდან წყლის განათებული წვეთები ცვიოდა ზღვაში, თანდათან მიძიმდებოდა. ოჰ, ეს ნიჩბები... ნიჩბები ზღვაში ჩაეშვებიან და უკან აღარ უნდათ ამოსვლა.

ჯევრიეს მაჯები ეტკინა. ეს მარმარილოს ზღვის შვილი, რომელმაც ასე კარგად იცოდა ნიჩბების მოსმა, ახლა ნიჩბების, კატერისა და ადამიანების ხმა რომ ესმოდა, დაბნეული იყო და ხელი ეშლებოდა.

თითებში და მაჯებში ტეხდა, მაჯებზე გამოხატული ორი ხელბორკილი ისე უჭერდა, თითქოს ნამდვილი ყოფილიყო.



\*\*\*

პროექტორის სხივმა ზღვა გაც-  
ხრილა და ზედ მიადგა ჯევრიეს.

– დავილუპე! – აღმოხდა მას.

ის უკვე ვერსად წავიდოდა. კატე-  
რების ხმა ახლოვდებოდა. ერთი-ორი წა-  
მი კიდევ უსვამდა ჯევრიე ნიჩბებს და  
ფარვანასავით ფართხალებდა პროექ-  
ტორის სხივში მოქცეული. ის გაფაცი-  
ცებით უსვამდა, ცდილობდა გაქცეოდა  
პროექტორის სხივს და სიბნელისათვის  
შეეფარებინა თავი.

ჯევრიეს სიბნელე უნდოდა, სიბნე-  
ლე. ყიჟინა ზღვას ეფინებოდა. ჯევრიეს  
ეჩვენებოდა, თითქოს ესმის, როგორ  
იძახიან, აი, ის, აი, ისო.

ჯევრიე შეინძრა. ადგილიდან წა-  
მოხტა. სანამ დაიჭერდნენ, მძიმე პაკეტი  
წყალში უნდა ჩაეგდო, შემდეგ კი, რაც  
შეიძლება ჩქარა გასცლოდა ამ არემა-  
რეს.

მისი ადგილიდან წამოხტომა და წა-  
ვის გადაქანება ერთი იყო. ჯევრიემ,  
რომელსაც პაკეტი გულზე ჰქონდა მიკ-  
რული, წონასწორობა დაკარგა და პაკე-  
ტიანად გადავარდა წყალში.

მაგრამ ეს რა ხდება... მან ხელი

უშვა პაკეტს, პაკეტი იძირება და ჯევ-  
რიესაც თან ეზიდება...

არა, ეს შეუძლებელია. როგორმე  
თავი უნდა დააღწიოს ამ ძალას, რომე-  
ლიც კუპრივით შავი წყლისაკენ ეზიდე-  
ბა. უნდა დააღწიოს...

მაგრამ ვერა. პაკეტის თოკი მის  
პალტოს გამოსდებოდა, რამდენჯერმე  
შემოხვეოდა ხელზეც და თავის დახსნა  
შეუძლებელი იყო. ჯევრიე პაკეტთან  
ერთად მიდიოდა ზღვის ფსკერისკენ.

\*\*\*

მდევრები წყლის ტყლაშუნზე და  
გამქრალ ლანდზე მიხვდნენ, რომ ზღვა-  
ში რაღაც ჩავარდა. წყლის ზედაპირზე  
რამდენიმე პრილა რგოლი გამოჩნდა და  
გაქრა...

პატარა მოტორიანი გემი სწრაფად  
უახლოვდებოდა ცარიელ წავს. ლუზაზე  
მდგომი გემის ბაქანზე ერთი ახალგაზ-  
რდა მეზღვაური საზს აკვნესებდა და  
ლილინებდა:

“მე ქვიშა ვარ ზღვისა,  
ქერცლი თევზებისა,  
გამიხსენ უბე, ჩემო ჯევრიე,  
მეც მონა ვარ ღვთისა”.



ბეჟირ სითქი ქუნთი  
(1905-1959)

ბეჭედი<sup>1</sup>

ასაფ აქჩილი საბაჟოზე მსახურობდა. ასაკით ორმოცდაათი-ორმოცდათხუთმეტი წლისა თუ იყო, ტანად ზორბა და მოუქნელი. მუდამ უჩვეულოდ და სასაცილოდ ეცვა. პირწმინდად მოსვლეს პილ კინკრიხოს გვერდებიდან ნასესხები ათიოდე ღერი თმისგან დაწნული კობტა გვირგვინი უმშვენებდა. ყოველდღე სუფთად იპარსებოდა. დიდი ხნის ნამსახურ, გახუნებულ მოყავისფრო ყელსაბამზე ყოველთვის ეკეთა სამკუთხა ოქროს საბნევი. დიდი ხნის ნაცვამი, ოდესღაც ყავისფერი, ახლა კი ფერგამკრთალი ტანსაცმელი ერთთავად განმედილი ჰქონდა, თუმცა გაუთოება მუდამ აკლდა. თეთრ კაშნეს ატარებდა, რომ პერანგის საყელო არ დასვროდა. გაცვეთილ მუხლისთავეებზე უთოს ხაზი ცერად მიუდიოდა და შარვალის მონგრეულის შთაბეჭდილებას ტოვებდა. ღიბზე გადმოკიდებული პიჯაკის კალთები მუხლებამდე სწვდებოდა. ჟილეტის ორ ქვედა ჯიბეს შორის უბრალო ლითონის ყვითელი ძენკვი მოუჩანდა. ძენკვის ერთ ბოლოზე გასაღებით დასაქოქი ძველი საათი ეკიდა, მეორეზე – მეღვინით გათხუპნილ ტყავის ბუდეში – სამსახურებრივი ბეჭედი. ეს ორი ამობურცული ჯიბე მის პატიოსან ღიბზე მიმჯდარ ორ ბაყაყს ჰგავდა.

ასაფ აქჩილის ძირითადი ხელფასი ოცდათხუთმეტი ლირას შეადგენდა. თავგადასხვებული სამსახურის, პატიოსანი შრომისა და უფროსების კმაყოფილების მიუხედავად, ბოლოს და ბოლოს, ამ დაწესებულებაში ოცდასამი წლის უწყვეტი

სამსახურის მიუხედავად, არავინ იცის, რატომ, ოფიციალურად კი შტატების უქონლობის გამო, უფრო მაღალხელფასიანი თანამდებობა არ ღირსებია. უკანასკნელი დანიანაურებიდან მთელი ექვსი წელი იყო გასული. ოცდათხუთმეტი ლირის შემყურე ასაფ აქჩილი, რასაკვირველია, უკმაყოფილო იყო. ამის მიზეზი ხელმოკლეობა სულაც არ გახლდათ. მცირერიცხოვანი ოჯახი ისედაც მომჭირნე ცხოვრებას იყო ჩვეული. მას უფრო ყოველი მოხელის დამახასიათებელი დანიანაურების ჟინი აწვალებდა.

\*\*\*

ერთ დღეს ასაფ აქჩილი თავის მაგიდას ეჯდა, წინ დავთარი გადაეშალა და ციფრების წერით იყო გართული. ამ დროს კარისკაცი შემოვიდა და მოახსენა, უფროსი გიბარებსო. ასეთი რამ დღეში ათჯერ მაინც ხდებოდა ხოლმე და მასაც განსაკუთრებული ყურადღება არ მიუქცევია ამისთვის. ახლაც, ჩვეულებისამებრ, რვეულიდან თავი აიღო, კალამი სამელნის გვერდით დადო, სათვალე ბუდეში შეინახა, ცხვირსახოცი ჯიბისაკენ წაიღო, წამოდგა და მშვიდი ნაბიჯით უფროსის ოთახისკენ გაემართა. კარზე არც კი დაუკაკუნებია.

უფროსი სახეგალიმებული შეხვდა. სხვა დროს ასე არ დახვედრიან. აკი ცქვიტა კიდეც ყურები ასაფ აქჩილმა და არც შემცდარა, მღელვარებისგან სისხლი მოაწვა თავში, სახეზე ბედნიერი და ბრიყვული ღიმილი მოეფინა.

– მობრძანდით, ასაფ ბეი, მობრძან-

<sup>1</sup> მწერლის გაზეთი, 12-18 სექტემბერი, 2002.



დით, დაბრძანდით. თქვენ შესახებ ბრძანება მოვიდა. ერთი საფეხურით დაგანინაურეს და ახალ თანამდებობაზე დაგნიშნეს. მომილოცავს, ღმერთი იყოს თქვენი შემწე. ახლავე დავწერ განკარგულებას და მოგართმევთ.

ასაფ აქჩილმა ზედიზედ გადაუხადა მაღლობა. მღელვარებისგან მის გულს ბაგაბუგი გაუდიოდა. როგორც იქნა, დადგა ექვსი წლის ნანატრი დღე. ოჰ, ეს მოლოდინი! რა მნიშვნელოვანი ადგილი უკავია მას მოხელის ცხოვრებაში, ქორნილივით არის და ეგაა. პირდაპირ დღესასწაულს ჰგავს. ახლა ყველა კოლეგამ უნდა მიულოცოს, ნაცნობების წერილებსა და ბარათებს ხომ ველარ აუვა. ასეთ დროს, უეჭველია, მოშურნეებიც გამოჩნდებიან. ისეთებიც კი, მასავით რომ დიდი ხანია, მოლოდინში იყვნენ და სადაცაა, კიდევ უნდა დაანინაურონ. ერთი სიტყვით, ამ ქვეყანას ვერაფერს გაუგებ.

დანინაურების ბრძანება არნახული სისწრაფით დაინერა და ასაფ აქჩილს ჩაბარდა. მანაც საქმეები სასწრაფოდ გადააბარა თავის კოლეგას. როცა ჯერი ჟილეტის მარცხენა ქვედა ჯიბეში მოკალათებულ სამსახურებრივ ბეჭედზე მიდგა, ასაფ აქჩილს, ცოტა არ იყოს, ხელი აუკანკალდა. ძენკვზე გამობმული ბეჭედი რომ ამოიღო, რაღაც ნალველმა გაჰკრა. ჰეი გიდი, ბეჭედო, ჰეი! რამდენი ქალაქი დაგიმონებია. შენი წყალობით რამდენი ძალა შეჰმატებია ამ ქალაქებს და სახელმწიფო საქმეც წაუწევია წინ.

ასაფ აქჩილი წუხდა, რომ ძველი ბეჭდის ადგილს ახალი აღარ დაიკავებდა. ეს ახალი თანამდებობა, მართალია, უფრო მაღალი იყო, მაგრამ უბეჭედო.

დღის ბოლოს დანინაურების ამბავი ცოლისთვის უნდა ეხარებინა, მაგრამ ჟილეტის მარცხენა ჯიბის გახსენებაზე მთელ ტანში რაღაც სიცარიელე იგ-

რძნო. თუმცა ცოლის პირველი სიხარულისა და თავის მოწონების მოლოდინმა დაამშვიდა.

ხელიდან გამოცლილი ბეჭდის მიუხედავად, მაინც ბედნიერი და კმაყოფილი იყო. გონების თვალთ რომ ჩაულრმავდებოდა დანინაურებას, ეს მის ცხოვრებაში ჭეშმარიტად მნიშვნელოვანი მოვლენა გახლდათ, ახალ თანამდებობაში კომპეტენციის ზრდას, ძალაუფლების კიბეზე აღმასვლას ხედავდა. სწამდა, რომ ამით საფუძვლიანი ნაბიჯი გადადგა უფრო მაღალი მდგომარეობისა და მაღალი საზოგადოებისაკენ მიმავალ გზაზე. ნეტა შენ... ნუ გეეწება, რა, ბეჭედი...

პიჯაკი გაიხადა და საშინაო ხალათის ჩასაცმელად მოემზადა. სიმძიმედაკარგული ჯიბის კუთხე ჩვარივით დაეკიდა. ასაფ აქჩილი შეეცადა, ცოლს არაფერი შეემჩნია, მაგრამ არაფერი გამოუვიდა. საფიე ჰანუმი რა საფიე ჰანუმი იყო, რომ ასეთი რამ გამოჰპარვოდა. მან უმაღლესი შეიკრა და შესძახა:

– ბეჭედი რა უყავი?

ასაფ აქჩილი შეეცადა, რაც შეიძლება ბუნებრივად დაეჭირა თავი:

– ააა, ბეჭედი? ისა... ის ბეჭედი თანამდებობრივი იყო და... საქმეები რომ გადავაბარე, ბეჭედიც ჩავაბარე, როგორც წესი და რიგია.

ახლა საფიე ჰანუმის წინაშე ნირნამხდარი იდგა ასაფ აქჩილი. მისი ცოლი მძვინვარებდა.

– კი მაგრამ, ძველის ნაცვლად ახალი არ უნდა მოეცათ? – იკითხა მან აღელვებულმა.

ასაფ აქჩილმა გადაწყვიტა, საქმე არ გაემწვავებინა და ახლა მაინც დაემშვიდებინა ცოლი:

– კი, რასაკვირველია, მომცემენ, – მიუგო მან, – მაგრამ ასე მალე ხომ არა, ჯერ არ მოუციათ.



ასაფ აქჩილი გრძნობდა, რომ მძიმე მდგომარეობაში აღმოჩნდა და თვითონაც ერთობ შენუხებული იყო. უბეჭდოდ დარჩენილი, აღარც თავად იყო კმაყოფილი. ოღონდ სალად აფასებდა „ვითარებით გამონვეულ მდგომარეობას“. რა ქნას, სახელმწიფო, ბუნებრივია, ყველას სათითაოდ ხომ ვერ ჩამოურიგებს ბეჭედებს, მაგრამ ეს როგორ უნდა გააგებინო შენს ცოლს.

იმ შემთხვევის აქეთ ასაფ აქჩილისთვის ყოველი დღე და ყოველი ღამე სატანჯველად იქცა. საფიე ჰანუმს პირისახე აღარ უღიმოდა. უარესი კი ის იყო, რომ ენა აღარ გაუჩერებია, ჭრი-ჭრი-ჭრიო, თავი გადასჭამა სანყალ ქმარს.

– შენ უბრალოდ გამოგაგდეს. გითხრეს, განინაურებთო და ძალაუფლების ბეჭედი გამოგაცალეს ხელიდან. არ უნდა მიგეცა, უნდა გასძალიანებოდი. ერთხელ რომ მაინც გეკითხა ჩემთვის, განა დაგთანხმდებოდი? კაცი თვითონ არის თავისი თავის პატრონი. ახლა კი დარჩი კუდმოკვეცილი ხელმონერის ამარა. ეგრე უბნის ყარაულიც კი მოაწერს ხელს. მთელ სამეზობლოში და სანათესაოში ბეჭდის პატრონი ქმარი მხოლოდ მე მყავდა. თავიც მომწონდა ამით. შენ ვერ შეიშნოვე ძალაუფლების ყადრი და ფასი. ძველი ვაზირები სიცოცხლეს წირავდნენ ერთი ბეჭდისთვის. ეს უმიზეზოდ არა ხდებოდა. განა არ გაგიგია, სულეიმანი ის არის, ვისაც ბეჭედი აქვსო.

სიმშვიდით და სიყვარულით სავსე მათი ცხოვრება თავდაყირა დადგა. ასაფ აქჩილი უთენია უგუნებოდ გადიოდა შინიდან. სამსახურში მოყამული იჯდა. სალამოს ისევ უგუნებოდ და ფეხის თრევით ბრუნდებოდა, თითქოს აქ სატანჯველი ელოდა.

ეს რა უქნეს და დაანინაურეს.

სანყალმა აღარ იცოდა, რა ექნა, რა მოემოქმედა. შიშველ თავზე ათიოდე

ღერი თმისგან შეკრულ გვირგვინს ველარ ნახავდით. აღარც სუფთად იპარსებოდა. აღარც ოქროს საბნევს იკეთებდა ყელსაბამზე. ამის შემყურე მისი ამხანაგები ეკითხებოდნენ, ავად ხომ არა ხარო და ჯანმრთელობას უსურვებდნენ. მტრები კიდეც ამბობდნენ, უღელი რა ძროხის საქმე იყოო.

ღიახაც, ეს რა უქნეს და დაანინაურეს. რას იზამ, მდგომარეობამ მოიტანა... სახელმწიფო ყოველ თავის მოსამსახურეს თითო ბეჭედს ვერ ჩამოურიგებს. ასეა... მაგრამ, სიკვდილის გარდა, ყველაფერს ეშველება. რაღა ეს გახდება უსაშველო? აჰ, ნეტამაც, ნეტამაც, ასაფ აქჩილი ამისთვის რას არ მოიმოქმედებს...

და აი, ყოველგვარ მოქმედებაზე, დამცირებაზე, ყოველგვარ დაცინვაზე თავგადადებული ასაფ აქჩილი უფროსის კაბინეტში შევიდა. ყველაფერი დაწვრილებით მოახსენა და სთხოვა, ოღონდ ძველ ადგილზე დამაბრუნეთ, რამე ერთი ბეჭედი მომეცით და ყოველგვარ დაანინაურებაზე ხელი ამიღიაო. ამას რომ ამბობდა, ოფლში იწურებოდა სირცხვილისაგან, მისი გახუნებული ცისფერი თვალები და თხოვნა-მუდარით აღსავსე გამოხედვა უფროსს კი არ შესცქეროდა, არამედ ოთახში დაბორიალებდა.

უფროსი გამგებიანი კაცი აღმოჩნდა. უღვაშეებში ჩაეცინა და მაშინვე მიხვდა ყველაფერს... რამეს ვეცდებიო, შეჰპირდა. იმავე დღეს დაინერა, ეს და ეს თანამდებობა თავისი მნიშვნელობის დასადასტურებლად აუცილებლად საჭიროებს სათანადო ბეჭდის არსებობასო და მაღალ ინსტანციებში გაიგზავნა. ამ ბეჭდის საქმემ სხვადასხვა საფეხური მოიარა და ბოლოს ოფიციალური აუცილებლობის სტატუსი მიიღო. ერთ მშვენიერ დღეს პასუხიც კი მოვიდა. ბეჭედი ზარაფხანაში უკვე შეკვეთილია, მივიღებთ თუ არა, უმაღ გამოგიგზავნითო.



ასაფ აქჩილი წუხდა, გამოსავალი არსებულაო და ასე რატომ ვნაღვლობდიო. ცოლს კი ფიცით არწმუნებდა და დროც გადიოდა.

დიდ დროს არ გაეგლო, რომ ტილოში გახვეული ბეჭედი ფოსტიდან ისევ ასაფ აქჩილის საშველად გამოემართა. ეს იყო, რასაკვირველია, ახალთახალი, უხმარი ბეჭედი.

ასაფ აქჩილმა ეს ირგვლივ წარწერებამოტვიფრული, ყვითელი ბრინჯაოს

ოქროსფრად მოელვარე ბეჭედი ხელში აიღო, მიესიყვარულა, ხელი გადაუსვა, გამოაბა ამდენი ხნის განმავლობაში უქმად მოქანავე ძენკვს და საგულდაგულოდ ჩაიღო ყილეტის მარცხენა ჯიბეში. შინ მისული, ვინ იცის, როგორ გაახარებდა ცოლს.

საფიე ჰანუმმა მართლაც ძალიან გაიხარა. სიხარულის ცრემლებიც კი გადმოაფრქვია, თითქოს რამე უბედურებისაგან დაეხსნას თავი.



ჯევდეთ ქუდრეთ სოლოქი  
(1907-1992)

ჩვენი ქუჩა<sup>1</sup>

ჩვენი ქუჩა სტამბოლის ბოლოს არის. ამ ქუჩაზე სულ ოცამდე სახლი დგას. თორმეტი სახლის სიგრძეზე ჩვენი ქუჩა სწორია, შემდეგ მარჯვნივ უხვევს, ბალის კედელს მიადგება და თავდება. ჩვენი ქუჩა თავდაღმართზე გამოდის, რომელიც ჯერაჰფაშას საავადმყოფოსთან ჩამოივლის და შემდეგ დავუთფაშას მისადგომისაკენ ეშვება. მუნიციპალიტეტის ყველა კულტურული ღონისძიება ჩვენს ქუჩას წინ ჩაუვლის და გარს უვლის, შიგ კი არასდროს შემოიხედავს.

მენაგვეები, რომლებიც ჯერაჰფაშადან ზღვაში გადასაყრელად ეზიდებიან ნაგავს, თავდაღმართში მაგრად ერეკებიან საზიდრებს; როცა ჩვენი ქუჩის თავში ჩამოივლიან, ერთს გადმოიხედავენ, მაგრამ აქეთ შემოხვევა ერთხელაც კი არ მოუვათ აზრად. დღის განმავლობაში გავსებული ნაგვის ყუთები ღამლამობით გააქვს ხალხს და ჩვენი ქუჩის პირდაპირ, ცარიელ მინდორზე ყრის. დროთა განმავლობაში დამპალი ნაგვის საშინელი სუნი ცაში მიიწევს, ზაფხულის მცხუნვარე დღეებში ნაგავს ალმურიც ასდის და ეს სუნი თითქოს თვალით დასანახიც ხდება. ქარიან დღეებში მისი სურნელი აქეთ-იქით ეფინება და ლოდოსის<sup>2</sup> დროს კი, მძიმე-მძიმედ შემოდის ჩვენს ქუჩაშიც და მდინარესავით მოედინება ორ რიგად ჩამწკრივებულ სახლებს შორის. ასეთ დღეებში მაგრად უნდა ჩაკეტო ფანჯრები და სულისშემხუთავ სიცხეს ებრძოლო ისედაც უჭაერო ოთახში.

ჩვენს ქუჩაზე არც ელექტროდენია,

არცერთ სახლში სინათლე არ არის, გარდა უბნის მეჩეთისა და ბაყალ ბოდოსის დუქნისა, რომელთა შორის ჩვენი ქუჩაა მოქცეული. ერთი სიტყვით, ის „ელექტრონად“ წოდებული რაღაც ჩვენს სახლებში არ არის. ჩვენ სახლებში ნავთის ღამბა გვინთია.

ახლა სასმელი წყლის შესახებ ვთქვათ: ჯერ ერთი, რომ ის ხუთას მეტრზეა ჩვენი ქუჩიდან მოშორებული. საღამომობით სამუშაოდან დაბრუნებული, დაღლილ-დაქანცული მამაკაცები ხელში ვედროებით მიდიან ხოლმე წყაროზე, რომელიც ჯერაჰფაშასაკენ მიმავალი აღმართის ყველაზე ციცაბო ადგილზეა მოქცეული და აავსებენ, რაც სახლში წყლის ჭურჭელი აქვთ. მხოლოდ ამის შემდეგ მთავრდება მათი სამუშაო დღე და თერთმეტის ნახევარზე უკვე შეუძლიათ დასასვენებლად დაწვნენ.

თაობა თაობას მოსდევს, ხალხი იცვლება, ჩვენი ბავშვები კი მუდამ უცვლელი რჩებიან; მართალია, ნურის იჰსანი მოსდევს, შემდეგ – ჯელალი, ჯელალს საიმი, მაგრამ თამაშობანი, ხმა, მოქმედება და სულიერი მდგომარეობა ყველასი ერთია. თაობები იზრდებიან, საქმეს ჰკიდებენ ხელს, მაგრამ ჩვენი ქუჩიდან მხოლოდ ის გადადის, ვინც ბევრ ფულს შოულობს. დანარჩენები, უბრალო მოხელიდან დაწყებული და ხელოსნით დამთავრებული, ვინც სულ დიდი, ოც ლირას აკეთებს, ძველ სახლში რჩება. წასულების ადგილზე ახლები მოდიან და ჩვენს ქუჩაზე ცხოვრება ისევ

<sup>1</sup> თურქული მოთხრობები, საბჭოთა მწერალი, 1958.

<sup>2</sup> ლოდოსი – სამხრეთის ქარი.



ძველებურად, გაჭირვებაში და უაზრობაში მიედინება.

\*\*\*

თუმცა აქ ხალხს ბინები თავ-თავიანთი აქვს, მაგრამ მათი გრძნობები და ფიქრები ერთნაირია. ისინი ისე ძალიან ჰგვანან ერთმანეთს, რომ ერთი ოჯახის წევრები გეგონებათ და ეს, ალბათ, ცხოვრების ერთნაირი პირობების წყალობითაა. ჩვენს ქუჩაზე თვალსაჩინოდაა წარმოდგენილი ისეთი რამეები, როგორცაა „საზოგადოებრივი აზრი“ და „სახელმწიფოებრივი ორგანიზმი“.

ცხოვრებას აქ საათებით კი არა, მზის ამოსვლა-ჩასვლით ანგარიშობენ. ზამთარში თუ ზაფხულში, საათი რამდენსაც უნდა უჩვენებდეს, მზის ჩასვლის შემდეგ ბავშვები სახლში შედიან, ქალები ფანჯარას მიადგებიან ქმრების მოლოდინში, მამაკაცები ხელში მომცრო ტვირთით ბრუნდებიან შინ, ნაგვის გადაყრისა და წყლის მოტანის შემდეგ კარები იკეტება და სიბნელე, რომელიც თანდათან უფრო და უფრო სქელდება, ავსებს სახლებს შორის სივრცეს, ქუჩას ერთ მთლიანობად აქცევს და მდუმარება სუდარასავით გადაეფარება აქაურობას.

ერთ ღამეს, სრულიად უდროოდ როს, ალბათ, თორმეტ თუ პირველ საათზე, გარედან ხმაური გავიგონე. ცოტა ხნის შემდეგ ქუჩის მთელს სიგრძეზე ქალის კივილი გაისმა და სიბნელეში შთაინთქა. ფანჯარას მივვარდი. ქვევით ხალხს მოეყარა თავი. რამდენიმე ფარნიანი კაცის ჩრდილი აქეთ-იქით მიდი-მოდიოდა. ყველა სახლის ფანჯრები ღია იყო და გარეთ გამოღწეულ ღამის სინათლეს აქა-იქ დაეფლითა უკუნეთი სიბნელე. მაშინვე ტანთ ჩავიცვი და გარეთ გავედი. რამე ბოროტმოქმედება მოხდამეთქი, ვიფიქრე. მაგრამ თურმე რამდე-

ნიმე სახლის მოშორებით მცხოვრები მეზობლის, სტიუარდ სალიჰ ეფენდის, ცოლი მშობიარობდა. გემი, რომელზეც სტიუარდი სალიჰი მუშაობდა, ამ ორი დღის წინ შავი ზღვის რეისში წავიდა. ქალი მარტო იყო დარჩენილი სახლში მოხუც დედამთილთან ერთად. დალოცოს ღმერთმა, მეზობლის ქალებმა ასეთ დროს მარტო არ დატოვეს მშობიარე და დასახმარებლად მოვიდნენ. კაცებსაც ქუჩაში მომალლო ადგილას მოეყარათ თავი და ინტერესით ელოდნენ შედეგს. მე მალე შევიტყვე მათი მღელვარების და ინტერესის მიზეზი: ბავშვი თურმე უკულმა მოდიოდა, ბებიაქალი ვერაფერს გახდა და ექიმი მოითხოვა. ორი კაცი ექიმთან აფრინეს, მაგრამ მას აქეთ უკვე ნახევარი საათი გავიდა, ისინი კი ჯერაც არ დაბრუნებულყვნენ. სწორედ ამ დროს შორიდან დაოთხილი ცხენის ფეხის ხმა და ეტლის ბორბლების რახარუხი მოისმა. ამ ღამის სინყნარეში გაჭენებული ცხენების და ქვაფენილზე ახმაურებული ბორბლების იმედის მომგვრელ ხმაზე ყველა სმენად იქცა და ისე მიუგდო ყური ღამის წყვდიადს, როგორც ექიმი ისმენს ხოლმე მძიმე ავადმყოფის გულისცემას. და მართლაც, ეს სანუკავრი ხმაური აღმართს ამოჰყვა და ცოტა ხნის შემდეგ ცხენები ქუჩის თავში შეჩერდნენ. ხალხმა მეტი ვეღარ მოითმინა და ყველა ერთად გაიქცა იქითკენ და ეტლიდან გადმოსულ ჩანთიან კაცს ისე შეაცქერდნენ, თითქოს ღმერთი იყო, რომელიც არაფრისაგან ადამიანს ქმნის და გაჭირვებულების დასახმარებლად ეშურება, სიცოცხლეს და სიკვდილიც მის ხელთ არის. გარს შემოეხვივნენ და სახლამდე ასე მიაცილეს. კარი ღია იყო. ექიმი შიგ შევიდა. ქვით დაფენილ მისასვლელში ქალები შემოეგებნენ.

– ავადმყოფი სად არის? – იკითხა ექიმმა.



– ზემოთ!  
ექიმმა მიხედ-მოიხედა და ისევ იკითხა:

– სახლის პატრონი რომელია?  
სტიუარდ სალიჰის დედაზე მიუთითეს:

– ეს არის.  
მამაკაცები გარეთ დარჩენილიყვნენ, მაგრამ ლამპით განათებულ მისასვლელს მაინც ხედავდნენ და ხმაც ესმოდათ.

ექიმი მოხუც ქალს მიუბრუნდა:  
– ქალბატონო, მე წინასწარ მიყვარს ყველაფრის თქმა. ჩემი ვიზიტი ორმოცდაათი ლირა ღირს.

ექიმს მის წასაყვანად მისულებისთვის ამის შესახებ არაფერი უთქვამს. ალბათ იფიქრა, რომ მივალ, მერე უკან ხომ აღარ გამომაბრუნებენო.

მოხუცმა ქალმა ნერწყვი გადაყლაპა, ერთხანს ვერაფერი თქვა, თითქოს ენა მუცელში ჩაუვარდაო; ბოლოს, როგორც იქნა, ძლივს მოახერხა ხმის ამოღება:

– ორმოცდაათი ლირა?  
მეტი აღარაფერი უთქვამს. კიბეზე ჩამოჯდა, თავით ხელებს დაეყრდნო და მიაცქერდა ამ ორმოცდაათლირიან კაცს, რომელიც ხელში ჩანთით შუა მისასვლელში იდგა.

განცვიფრებისაგან დაღებულის, კბილებჩაცვენილი ხახა ლამპის სუსტ სინათლეზე უძირო ორმოს ჰგავდა და შიშს ჰგვრიდა დამნახველს.

– წინასწარ თქმა სჯობს, რომ შემდეგ გაუგებრობას არ ჰქონდეს ადგილი, – დაუმატა ექიმმა.

– ექიმო, – წარმოთქვა ქალმა, – ჩვენ მაგდენი ფული არა გვაქვს, არც არასოდეს გვექონია. მხოლოდ ოცი ლირა შეგვიძლია მოგცეთ.

– ვერ ვიზამ, – უპასუხა ექიმმა, – სხვებმა იქნებ გააკეთონ მაგ ფასად, მე

კი სახელგანთქმული ექიმი ვარ და ჩემი ვიზიტის საფასურს ვერ დავცემ. არ შემიძლია.

ერთმა ქალმა, რომელიც აქამდე სიბნელეში იდგა შუა კიბეზე, თავი ველარ შეიკავა და უცბად იყვირა:

– ბატონო ექიმო, ეს სტიუარდის სახლია, კაპიტნის სახლი არ გეგონოთ, თუ შეიძლება, გასამრჯელოც სათანადო მოითხოვეთ.

ექიმმა ცივად მოუჭრა:  
– ჩვენი შრომის გასამრჯელოში სტიუარდებისთვის ფასის დაკლება გათვალისწინებული არ გახლავთ.

იგი მიბრუნდა და კარში გავიდა.  
მთელი ამ ხნის განმავლობაში მამაკაცები სახლის წინ იდგნენ თავმოყრილნი, მხარიმხარ დამდგარიყვნენ ნახევარკალად და გამოსასვლელი შეეკრათ. ეს ხალხი, რომელთაც ცოტა ხნის წინ ერთი წუთითაც ვერ ნახავდით მოსვენებულს, ახლა გაუნძრევლად იდგა, ხელები ქვევით დაეშვათ და გაშტერებით შესცქეროდნენ კიბის თავში გამართულ სცენას. იქ ნათქვამი ყოველი სიტყვა კიდევ უფრო მოქმედებდა და ერთ ადგილზე აქვავებდა მათ. ექიმმა ორიოდ ნაბიჯი გადადგა წასასვლელად, მაგრამ გასავლელ ადგილს ვერ მიაგნო.

– თუ შეიძლება, გამატარეთ, – მიმართა მან ერთ-ერთს.

მაგრამ ის კაცი არ განძრეულა. ექიმი ახლა მეორესთან მივიდა, მაგრამ არც ის დაძრულა ადგილიდან. ექიმმა მის წინ ადამიანებისაგან აღმართული ლობის გარღვევა მოინდომა და ერთ მათგანს ხელი გაჰკრა, მაგრამ მაშინვე უკან დაიხია, თითქოს ხელი ცივი მარმარილოსათვის დაედო. ხელს შეხედა. მის წინ თითქოს მთლიანი ქვისგან გამოთლილი, სახეგაფითრებული თეთრი ძეგლები იყო აღმართული. ექიმი ხმაამოუღებლივ მიბრუნდა, ისევ კარში შევიდა



და ჭრიალა ხის კიბეს აუყვავა.

– ექიმო, – წამოიძახა ერთმა მათგანმა, ვინც ქვის ღობედ იყო აღმართული კარის წინ.

ექიმმა მოიხედა.

– უბედური შემთხვევა არ მოხდეს.

ექიმი ისევ მიბრუნდა, დარჩენილი საფეხურებიც აიარა და თვალს მოეფარა. კარის წინ თავმოყრილმა ხალხმა თავისუფლად იგრძნო თავი, შეირხა და ამოძრავდა.

– ექიმი ახლა, სულ დიდი, ერთ საათს მოუნდება თავის საქმეს, შემდეგ ოც ლირას მიიღებს, – წარმოთქვა ერთმა კაცმა, რომელსაც წელან გასასვლელი ჰქონდა ჩაკეტილი.

მისი სიტყვები მეორემ დააბოლოვა:

– ...და მაინც უკმაყოფილო იქნება. ჩვენი ერთი საათის შრომა კი ოცი ყურუში ღირს.

ასეთ საუბარში რომ იყვნენ გართულნი, ზედა სართულიდან ერთხელ კიდევ გაისმა მწარე კვნესა, რომელსაც ზედ ბავშვის ტირილის ხმაც მოჰყვა. კარის წინ თავმოყრილი ხალხი უცებ გაჩუმდა.

ათიოდე წუთიც არ გასულა, რომ ბებიაქალმა სირბილით ჩამოიარა კიბე და გარეთ მომლოდინე მეზობლის ქალებს მიახარა, გადარჩა, გადარჩაო. ცოცხალი ხნის შემდეგ იმავე კიბეზე ექიმმა ჩამოიარა, მაგრამ მისი სახე ბებიაქალის პირისახესავით მხიარული არ ჩანდა.

კართან ძველებურად ბევრი ხალხი იდგა, მაგრამ გზა გადაღობილი აღარ იყო. ორმა კაცმა ქუჩის თავამდე ეტლთან მიაცილა ექიმი.

ეტლთან მისვლამდე ღამის სიჩუმეში სამი კაცის ფეხის ხმა ისმოდა მხოლოდ.



ორჰან ჰანჩერლიოღლუ  
(1916-1991)

ალი<sup>1</sup>  
(ნანყვეტი)

ალი შუალამისას თოფჰანეს<sup>2</sup> ერთ მივარდნილ ქუჩაზე, პატარა ქოხში გავიცანი.

ნონოლა იყო. ზურგზე დამჯდარი პატარა კუზისგან მხრებში მოხრილიყო. ნაბლისფერი ხუჭუჭა თმა შუბლზე ჩამოშლოდა. მარჯვენა ლოყას დიდი შავი ხალი უმშვენებდა. ხალს მუდამ ხელით აწვალებდა. ალი ცისფერთვალა იყო. წარბები ისე აზიდვოდა, გაკვირვება უფრო მეტად ეხატებოდა სახეზე. ასეთი წარბები რომ არა, თავისი სწორი ცხვირით, წვრილი ტუჩებითა და ნიკაპით ის ლამაზიც კი მოეჩვენებოდა კაცს.

გრძელი, გამხდარი მკლავები მუხ-

ლებამდე სწვდებოდა. უღვაში ახალი აშლილი ჰქონდა.

ალი უსწავლელი, უვიცი და ორპირი იყო. მე მინახავს, როგორ თრთოდა სულ უბრალო რამეზეც კი, მაგრამ დაბადებით ხარბს, შურიანსა და ეგოისტს, სახე მაინც კაცთმოყვარე და გულკეთილი ადამიანისა ჰქონდა.

ჩემი ყურადღება სწორედ ამან მიიპყრო და ამანვე მაფიქრებინა ისიც, რომ ასეთი გარეგნობის, ჭკუისა და ბუნების ალი შეიძლება ყოფილიყო ბაყალიც, მოსწავლეს, ჩინოვნიკიც ან კიდევ ხელოსანი, ვინმე მუქთახორა, ვაჭარი თუ მინისტრი.

ალი – ბაცაცა

ჰაერში თოვლის კორიანტელი ტრიალებდა. ალის ხალათის გახსნილ საკინძეში ჩაეყო ხელი და ილღიაში ამოედო გასათბობად. თოვლის ფიფიქები ნემსებივით იჩხვლიტებოდა. დაფლეთილი შარვალი მუხლებს ვერ უფარავდა. თვალები მოჭუტული ჰქონდა. თმაზე წვრილ-წვრილი ლოლუები ეკიდა. სიცივე თანდათან მატულობდა, მაგრამ ალის ჯერ კიდევ შერჩენოდა წინა დღის ჩხუბის სიცხარე და მტკიცედ მიაბიჯებდა თხელი ყინულით დაფარულ გუბებში.

ქოხის კარს ფეხი ჰკრა და შეალო. ცხვირში თამბაქოსა და ოპიუმის მკვეთ-

რი სუნის ეცა. თავი დახარა, რომ კარის ზედა წირთხლისათვის არ აერტყა და ქოხში შევიდა.

– ჩქარა მოხურე, ბიჭო! – დაიყვირა ბებერმა ქურდმა.

ალიმ ღონივრად ჰკრა ხელი კარს, შემდეგ სამიოდე ნიხლიც მიაყოლა, როგორც სჩვეოდა და მიკეცა.

შუა ოთახში ნახშირით სავსე, გახურებული თუნუქის ყუთი იდგა. გარშემო თხუთმეტი-ოცი წლის ქურდბაცაცები შემოსხდომოდნენ. ვინ ფეხმორთხმით იჯდა, ვინ – გულაღმა, ვინ კი პირქვე წამოწოლილიყო. ზოგიერთს ჩასძინებო-

<sup>1</sup> ორჰან ჰანჩერლიოღლუ, ალი, „ნაკადული“, 1966.

<sup>2</sup> თოფჰანე – უბანია სტამბოლში.



და და ხვრინვაც კი ამოეშვა.

ვეება ჰოროზ<sup>1</sup> იბრაჰიმს თავისი საყვარელი თავუქ<sup>2</sup> ზულფუ გვერდით მოესვა, შავი, სველი უღვაშებით დაფარულ ტუჩებში პაპიროსი გაერჭო და აბოლებდა.

ჰოროზ იბრაჰიმმა გამოთაყვანებული მზერა ძლივს მოაშორა ზულფუს, ალის მიაშტერდა, ერთხანს უცქირა და მერე შეჰყვირა:

– ლაჩარო, კახპის შვილო...

გახურებული ნახშირიდან არეკლილი შუქი ჭერს მოჰფენოდა. ნითელ, ციმციმა სინათლეზე სქელი ბოლი ტალღა-ტალღა ლივლივებდა ჰაერში.

– ძაღლო, – დაუმატა ჰოროზ იბრაჰიმმა, – თავს უშველე, არა?

ალიმ გაღიმება სცადა. სახის ყოველი ნაკვთის განძრევაზე კანი ისე ეწვოდა, თითქოს დასერილი ჰქონოდა. პირი ძლივს გააღო და ნაილულულა:

– ღმერთმანი, არ გავქცეულვარ... მუცელმა შემანუხა და...

ჰოროზ იბრაჰიმმა ისევ დაიღრიალა:

– გაჩუმდი, ვირიშვილო, ნახე, რაღა, სამაგისო დრო!

ალიმ თავი დახარა: ტყუილის თქმა ვერ გაბედა.

წვერიანი ჰაჯიალა<sup>3</sup> მათ ილდიზის პარკის მიყრუებულ კუთხეში შეიტყუეს. ჰოროზ იბრაჰიმმა და ორმა ბაცაცამ დროზე მიუსწრეს. სწორედ აქ შეშინდა ალი. იფიქრა, კაცი არ შემოაკვდეთო და... წვერიანს რომ დაეყვირა, მუშტიდან დანაზე გადავიდოდნენ, მერე პარკის დარაჯებიც მოცვივდებოდნენ. ჯერ სამი თვე არ იყო გასული, რაც ალი ციხიდან გამოვიდა და უკან დაბრუნება აღარ უნდოდა... ალი უკან გაძვრა. ხე-

ებს ამოეფარა, შემდეგ ნანვა გულაძგერებული და დაელოდა, რა მოხდებოდა. თუ ყველაფერი კარგად დამთავრდებოდა, მაშინ ჰოროზ იბრაჰიმში ერთ ხუთიანს ალისაც არგუნებდა, შეპირებული იყო. მადლობა ღმერთს, ყველაფერი კარგად დამთავრდა. მიმალული ალი ხედავდა, როგორ ნამოდგა ფეხზე წვეროსანი, თავდაპირველად წინააღმდეგობის განევა სცადა, მაგრამ, როცა სილა აჭამეს, საფულე, ოქროს ძენკვიანი საათი და ბეჭდები თავისი ხელით ჩააბარა ჰოროზ იბრაჰიმს. ერთმა ყვინჩილამ ჭიტლაყი ამოჰკრა, მეორემ კი წვერებში მიაფურთხა – გაახსენდება და ჩივილს ვერ გაბედავსო.

ალიმ რომ დაინახა, ჰოროზ იბრაჰიმმა და მისმა ორმა ამხანაგმა სასწრაფოდ მოძუდგეს, ძლივს ნამოდგა. ჰაჯიალაც გახარებული, ასე იოლად რომ გადარჩა, მათ უკან გაიძურნა. დღის სინათლე თანდათან ფერს კარგავდა, უჩინარდებოდნენ ვეება ხეები. პარკის ბილიკებზე სტვენით დაძრწოდა ქარი.

მინაზე ალიმ პაპიროსის მოზრდილი ნამწვი იპოვა, ცეცხლი მოუკიდა და მოსწია. ბოლმა ყელი ჩაუთბო. ფეხშიშველამ თხელი ყინულით დაფარული ხრეში გადაიარა და გორაკს მიაშურა. გორაკი პარკთან ახლოს იყო. პარკის კარში გასვლას კედელზე გადაძრომა ამჯობინა. რაც უნდა იყოს, ასეთ დროს დარაჯს რომ დაენახა, არ ივარგებდა. ჰკითხავდნენ, პარკში რას აკეთებდიო ან არადა, ერთ-ორ სილას გაანწავდნენ გაყინულ ლოყებზე; ისე, თავის გასართობად. ალიმ კი კარგად იცოდა, რა მშვენიერი გასართობი იყო სუსტი კაცის გატყევა, ისიც – უმიზეზოდ.

უცბად, გორაკისკენ მიმავალი გზის

<sup>1</sup> ჰოროზ – მამალი; ჟარგონში – გამოცდილი ქურდი.

<sup>2</sup> თავუქ – ქათამი; ჟარგონში – ახალგაზრდა ქურდი.

<sup>3</sup> ჰაჯიალა – გამდიდრებული მდაბიო.



გადაკვეთაზე, წყავის ბუჩქების უკან, ერთმანეთს გადაჭდობილ ორ ლანდს მოჰკრა თვალი და შეჩერდა. უჰ, შენი... თავისთვის შეიგინა ალიმ. ერთი მათგანის ნაზი, ხრინნიანი და წვრილი ხმა ხშირად სმენია. ეს გიულლუ იყო. ასეთი ხმა, გიულლუს გარდა, არავის ექნებოდა. ალიმ ერთხელ კიდევ მოსწია პაპიროსი, გადააგდო და შიშველი ფეხით სამჯერ დაასრისა მიწას. მას სწამდა, როცა რამეს ეხებოდა, სამჯერ უნდა შეხებოდა, თორემ საქმე უკუღმა წაუვიდოდა.

– ეი, მანდ ვინ არის? – შესძახა ალიმ.

მამაკაცი, გიულლუს გვერდით რომ იწვა, წამოხტა. ალი ხეს ამოეფარა. ნეტავ არ დამეყვირაო, გაიფიქრა და შიშნარევემა სინანულმა გაჰკრა.

ალი ერთხანს გაფაციცებული ელოდა, მაგრამ, როცა დაინახა, კაცმა ჯარისკაცური ფალასკა გაისწორა და უკანმოუხედავად გამორდა იქაურობას, ლაჩარი ყოფილათ, გაივლო გულში და გაიღიმა.

გიულლუს თავი წამოეწია და შემოფოთებული იცქირებოდა იქით, საიდანაც ხმა მოესმა. აწეწილი თმა დაბადებიდან ერთი-ორჯერ თუ ექნებოდა დავარცხნილი. თმები ერთმანეთს მიკვროდა და ნახევარ სახეს უფარავდა. ცალი თვალი ჩალურჯებოდა. გიულლუს გრძელი, თუთიყუშის ნისკარტივით მოკაუჭებული ცხვირი ჰქონდა. თვითონ მომცრო ტანისა იყო. ჩამოყრილი მკერდი მუხლებამდე სწვდებოდა. ფერადი ნაჭრებით აჭრელებული ხალათის საყელო ინგლისური ქინძისთავით ჰქონდა შეკრული. ქარის დაბერვაზე საყელოდან ჭუჭყისაგან ჩაშავებული უბე მოუჩანდა ხოლმე.

ალიმ ერთი ისკუპა, მასთან გაჩნდა და მაჯაში ხელი წაავლო.

– ვინ იყო, გოგო, ის კაცი?

გიულლუ შეირხა, ხელის გათავი-

სუფლება სცადა, მაგრამ შეატყო, არაფერი გამოუვიდოდა და გაბრაზდა:

– ვინ და არავინ. შენ რა გინდა? შენ თვითონ ვინა ხარ?

ამ კითხვაზე ალი დღემდე არ დაფიქრებულა. მართლაცდა ვინ იყო, რა იყო იგი გიულლუსათვის? ამ კითხვამ ჩააფიქრა ალი. მის გონებაში ახლა სხვა კითხვებიც წამოიშალა. კი მაგრამ, გიულლუ ვილა იყო? საიდან გაჩნდა, სად ცხოვრობს, რას ჭამს ან რასა სვამს? არც გიულლუმ იცოდა, ვინ იყო ალი. სხვებსავით ისიც თოფჰანეს ქოხმახებში ცხოვრობდა. ეს იყო და ეს. არც კი ახსოვთ, როდის შეხვდნენ ერთმანეთს. ყურადღებას მათ არავინ აქცევდა. მხოლოდ იმას კმარობდნენ, ერთს რომ „კუზიანის გიულლუს“ ეძახდნენ, მეორეს კი „გიულლუს კუზიანი“ შეარქვეს. იმ დღის აქეთ ალიმ მიითვისა გიულლუ და ისე ექცეოდა, როგორც საკუთარ ხალათს ან დანას.

– კახპა, – იყვირა ალიმ, – განა არ მითქვამს, უჩემოდ არავის დაუნვე-მეთქი?

„როცა წინასწარ იცი, – ფიქრობდა ალი, – ვაჭრობას გაუმართავ. ფულს წინასწარ გამოართმევ და თავს არ მოატყუებინებ. გიულლუ კი ბრიყვის ერთია, ამ საქმეს თვითონ თავს ვერ მოაბამს. ესეც რომ არა, განა მამაკაცმა არ უნდა იცოდეს ქალის შემოსავლის ამბავი?“ გაბრაზებულმა რამდენიმე სილა უთავაზა გიულლუს. ქალს ფერმკრთალი ლანვები შეუწითლდა.

– რამდენი გამოართვი?

გიულლუ ზიზლით მიაცქერდა ალის. ცალი ხელი განითლებულ ლოყაზე მიიღო.

– არ გამომირთმევია.

– ნუ მიქარავ!

– არ გამომირთმევია-მეთქი!

– ნუ მიქარავ-მეთქი!



– თვალი დამიდგეს, თუ კაპიკი გამომერთვას.

ალიმ ისევ მუშტი შეათამაშა ჰაერში:

– მომეცი-მეთქი, გეუბნები.

უკვე კარგად ჩამოხნელებულიყო. ქარი აღარ ქროდა. სიბნელეში ვეება ხეები თითქოს კიდევ უფრო ახლოს მისულიყვნენ ერთმანეთთან. ჩაშავებულ ხეებს შორის ცა აღარ მოჩანდა. უხმო და იდუმალი ყინვა ნემსებივით ჩხვლევდა მათ ნახევარ შიშველ სხეულებს. გიულლუს ყბა აუკანკალდა.

– თავი დამანებე, – ამოიკვნესა ქალმა.

ალიმ მხრებში ხელი ჩაავლო და შეანჯღღრია. ნელანდელი შიში გაუქრა, ახლა ის უკვე მამაკაცურ ძალას გრძნობდა.

– მითხარი, – იყვირა მან, – თორემ ისე დაგნაყო...

ალის ფრჩხილები ხორცში ჩასობოდა გიულლუს.

– გამიშვი, – ამოიკვნესა გიულლუმ, – გამიშვი...

ამან სულ გააცოფა ალი, ერთხელ კიდევ მოიქნია სისხლში მოსვრილი მუშტი და პირდაპირ სახეში სთხლიშა გიულლუს. გიულლუს ტუჩებზე სისხლის ბუყუყუები გადმოუვიდა. უბეში დამალული ვერცხლის ლირა გადმოუვარდა და მიწაზე ლაპლაპით გაგორდა.

გიულლუ თავგანწირული ეძგერა ფულს, მაგრამ ალიმ იმარჯვა, დაასწრო და ფულს ფეხი დააბიჯა. ხელებით კი თმაში სწვდა ქალს და დაითრია. მაგრამ მოულოდნელად ალიმ თვალები გადმოყარა. ასე ეგონა, თითქოს სისხლისგან ვიცლებიო. გიულლუ კბილებით სწვდა წვივში, მოდუნებული ფეხიდან ფული გამოაცალა და ისევ უბეში ჩაიდო.

სულშეხუთული ალი ზედ დაეცა გიულლუს და ორვენი მიწაზე გაგორ-

დნენ. წყავის დაჭირხლულ ფოთლებში ჭიდაობა გაიმართა. დროდადრო პირისახით ეხახუნებოდნენ გაყინულ მიწას. ალის ხელები ვერცხლის ლირას ეძებდნენ და გიულლუს თბილ და რბილ უბეში ფათურობდნენ. ერთხანს ორივე ქანცგამოცლილი გაირინდა. პირიდან ორთქლი ამოსდიოდათ. ცოტა ხანს ასე იყვნენ ერთმანეთის გვერდით, შემდეგ ალიმ წელზე ხელი მოჭხვია გიულლუს და თავისკენ მიიზიდა. გაყინული სახეები ერთმანეთს მიეკრო.

ალისა და გიულლუს ათოვდა. ხეებს შორის მოქცეულ ცის ნაფლეთს სინათლე ემატებოდა. ხის ტოტებიც ნელნელა თავს აღწევდნენ სიბნელეს.

ალიმ ლირაც მიიღო და ქალიც დაიმორჩილა. იგი ახლა უსაზღვრო ძალას, სიდიადეს და კაცობას გრძნობდა. ამას გარდა, ერთ ხუთიანსაც მოელოდა ჰოროზისგან.

სწორედ ამიტომ შეალო ქოხის კარი ასე რიხიანად. ჰოროზ იბრაჰიმის დასისხლიანებული თვალები ალის ვერ შეაშინებდა. რადაც უნდა დასჯდომოდა, ხუთიანი ხელში უნდა ჩაეგდო. რას არ იზამდა კაცი ამ ხუთიანით? ფეხბურთზე წავიდოდა, კვერცხით შეკმაზული შიგნეულის სუპს და ცხვრის მოზრდილ თავს შეჭამდა; ქურთის ყავახანაში ქალაღდს ითამაშებდა, ყომარს გააგორებდა, მარჩიელთან წავიდოდა, ძველმანებით მოვაჭრეს ერთ წყვილ ფეხსაცმელს გამოსტყუებდა, დილაადრიან ცხელ ჩაის დალევიდა და ქუჩაში მოვაჭრისაგან ხახვით შეკმაზულ ორ ღვეზელს იყიდდა.

ალიმ ველარ მოითმინა, თავი ასწია და ჰოროზ იბრაჰიმს მიახალა:

– ჩემი წილის მისაღებად მოვედი.

ჭერზე გავარვარებული ნახშირის წითელი სხივი ციმციმებდა. ბოლი კიდევ უფრო სქლად ეფინებოდა ოთახს.

ჰოროზ იბრაჰიმმა ზულფუ ხელის



ერთი ნაკვრით მოიშორა და მიწაზე დააგორა. შავ უღვაშზე მიკრული პაპიროსი ცეცხლში ჩააგდო და წამოდგა.

ალიმ იგრძნო, როგორ სწვდა ორი ვეება ხელი და გოდორივით მალლა აიტაცა. შემდეგ რა მოხდა, აღარ ახსოვს. თვალეზი რომ გაახილა, გაყინულ გუბეში იწვა.

ქარბუქი ჩამდგარიყო. მთვარის სხივი დანგრეულ კედელს ელამუნებოდა და ქუჩაში იფანტებოდა. ყინავდა. დაბალი ქოხების კრამიტის სახურავებზე კატები კნავილით დასდევდნენ ერთმანეთს. ხის დარაბების მიღმა სრული სინყნარე იყო. ჩამიჩუმი არსაიდან ისმოდა, სიცოცხლის ნიშანწყალი არსად ჩანდა. ხალხს დიდი ხანია, ძილისათვის მიეცათავი. ქუჩები სიბნელეს შთაენთქა. მთვარის შუქი თუ ანათებდა აქა-იქ.

ალი შეიშმუშნა. ყინვისაგან შეწუხებულს დაჟეჟილი ზურგი არც კი გახსენებია. სიცვივისაგან გულმკერდი, მკლავები და შიშველი კანჭები ეწვოდა. ალიმ თვალეზი დახუჭა და, თითქოს სითბოს ეძებსო, მთვარით განათებული ადგილისაკენ გაჩოჩდა. თუთუნისა და თრიაქის ბოლით გაჟღენთილ ფილტვებში ცივი ჰაერი რომ ჩაისუნთქა, თავბრუ დაესხა. მუხლები უკანკალებდა. დილიდან არაფერი ეჭამა და მუცელიც უყმუოდა. ხელები ძლივს აამოძრავა, შარვლის ჯიბე მოიჩხრიკა. ჯიბეში გიულლუს ვერცხლის ლირას რომ წააწყდა, სიხარულისაგან კინალამ ჭკუაზე გადავიდა. საწყალი ისე იყო დაბეგვილი, რომ გიულლუს ლირა აღარც ახსოვდა. მაშინვე წამოდგა და კილიჩალის<sup>1</sup> აბანოსაკენ გასწია.

მოსახვევში ჩქარი ნაბიჯით მომავალ ხანში შესულ კაცს შეეფეთა. კაცს ცხრა-ათი წლის ბიჭუნა მოჰყვებოდა ხელიხელჩაკიდებული. ორივეს თბილი პალტო და ხელთათმენები ეცვა.

– მეთინ, ხომ არ შეგცივდა? – ჰკითხა კაცმა ბავშვს სწორედ იმ დროს, როცა ალიმ გვერდით ჩაუარა.

– არა, მამა! – მიუგო ბავშვმა და კიდევ უფრო ღრმად ჩაყო ცხვირი შალის მოსასხამში.

ალი ორივეს განცვიფრებული მიაჩერდა. ეს კაცი ამ ბიჭის მამა ყოფილა, ბიჭი კი – მისი შვილი... ასე თბილად აცვიათ და სიცვივეზე კი ლაპარაკობენ. ახლა ისინი სახლში მივლენ, საჭმელს შეჭამენ, გასათბობად მაყალს მიუსხდებიან, ლოგინში ჩანვებიან. რასაც მოისურვებს, ყველაფერი შეუძლია მამას სთხოვოს. ამ ბიჭს მამა ჰყავს, რა უცნაურია... ალიმ არ იცოდა, რა იყო მამა. „ხომ არ შეგცივდა?“ ალი ამ სიტყვებით გრძნობდა, მამა ისეთი კაცია, მუდამ შვილზე რომ ზრუნავსო. ნეტავ ყველაფერს უსრულებს? ნეტავ ნამცხვარს თუ უყიდის, ძირი მთვარის სხივივით ყვითელი რომ აქვს და ზედაპირი კი – თოვლივით თეთრი. ჩხუბშიც დაიცავს, ალბათ. თუ დაიჭრება, ჭრილობას შეუხვევს, ატირებულს ცრემლს მოსწმენდს. ალბათ, მთელი სიცოცხლე არ მოშორდება.

ერთხელ, ზაფხულის ერთ თბილ საღამოს, ალიმ და თავუქ ჰასანმა ერთი ბიჭი ნახეს. ბიჭი მამამისს ეძახდა.

– ნეტავ მეც მყოლოდა მამა, – უთხრა ალიმ ჰასანს.

ჰასანმა გულიანად გადაიხარხარა.

– წადი, შენც ერთი! გყოლოდა, თორემ ჰა... ისიც შენსავით ვიგინდარა იქნებოდა.

მაგრამ ალი სხვანაირად ფიქრობდა. მამა ჰყოლოდა და, რა ძალღიჯ უნდა ყოფილიყო, რა გაუთლელიც, როგორი ვიგინდარაც, მაინც ბედნიერად იგრძნობდა თავს. თანახმა იყო ცემაზეც და გინებაზეც, ხმას არ ამოიღებდა. რა უშავდა მერე, სამაგიეროდ, რასაც მოი-

<sup>1</sup> კილიჩალი – უბანია სტამბოლში.



სურვებდა, ყველაფერს მამას სთხოვდა.

თავუქ ჰასანი:

– მერე, რომ დაბერდება და ერთ დღეს ფეხებს გაჭიმავს, შენ ხომ შავებს არ ჩაიცვამ, არა?

ჩაიცვამდა, რასაკვირველია, ჩაიცვამდა. გლოვა-ტირილი, აბა, რა სირცხვილია. განა ისე კი აკლდა ტირილი, როცა შიოდა, სციოდა ან ჰოროზ იბრაჰიმი უთაქებდა? მამა ჰყოლოდა და, არა უშავდა რა, მომკვდარიყო. თვალებს თავისი ხელით დაუხუჭავდა, ცხედარს სუდარაში გაახვევდა, შემდეგ კი იტყოდა, მამა მომიკვდაო. ამის თქმაც ხომ დიდი ბედნიერება იყო!

ალიმ მეაბანოეს ღირა გაუნოდა, ათი ყურუშიც აჩუქა, ასანთსა და დანას მიმიხედუო და აბანოში შევიდა.

აბანო ხალხით იყო სავსე. ყველა თავის ჭკუაზე მოწყობილიყო. ნახევრად შიშველი ხალხი, საცა კი თავისუფალი ადგილი ენახა, იქ მოკალათებულყო. აბანოს სველი კედლები უხმოდ გამოსცემდა ხვრინვასა და ფშვინვა-ბურტყუნს, ძილში წამოძახილს და ათასგვარ ხმაურს. ზოგს პირდაპირ სხვისი სხეულიდან ჩამონადენ წყალში წაეყო ცხვირ-პირი. სიცხისაგან დამბალი ჭუჭყი წურწურით მოედინებოდა შიშველი ზურგებიდან.

ალი ფრთხილად მიალაჯებდა. ცდილობდა, ფეხი არავისათვის დაეხიჯებინა და იმ ადგილისაკენ მიიწევდა, სადაც დიდი ქვის ტახტი იყო. ნესტიანი, ცხელი ჰაერი თვალებს უწვავდა. ცარიელი ადგილი არსად ჩანდა. ალი მარჯვნივ მიბრუნდა და აუზებისაკენ გასწია.

უცბად წაიბორძიკა და კინალამ წაიქცა: ვიღაცის ათრთოლებული ხელი წვივში სწვდა. ფერმკრთალი სახიდან მოხუცის ნახევრად ღია ცალი თვალი უცქერდა. ალიმ ფეხი გაითავისუფლა, მოხუცს მხარში ჩაჰკრა და მშვიდად გა-

ნაგრძო გზა.

ამ დროს ალის ერთი ძველი ნაცნობის ხმა მოესმა. ნაცნობი რიზელი<sup>1</sup> მუშა იყო. იგი აუზში იწვა და ყვიროდა:

– კუზიანო, ეი, კუზიანო!

– რა გინდა?

– აქ მოდი, დავეტევით.

ალი ერთმანეთში გადახლართულ სხეულებს ხტუნვა-ხტუნვით გადაეწვლო და აუზისაკენ წავიდა. წვრილულვაშიანმა რიზელმა ხელები აუზის კედელს მიაყრდნო, მეზობელს ზურგით მიანვა და ალის ადგილი გაუთავისუფლა.

– სად დაიკარგე, კაცო?

ალიმ მხრები აიწურა, თითქოს სცივაო.

– არსად.

ალი რიზელის გვერდით გაიშხლართა და ზურგი ცხელ ქვას მიადო. გული სიხარულით უფანცქალებდა. აბანოს სიმხურვალისაგან თითქოს სისხლმაც დუღილი დაუნყო.

– გაყინულხარ, – უთხრა რიზელმა.

– გავიყინე.

– ასეთ სიცივეში რას დაეძებდი ქუჩა-ქუჩა?

– არაფერს.

რიზელის მკლავი მძიმედ დაანვა ალის გულზე.

– იბრაჰიმის ქოხმახში არ იყავი?

– კი.

– მერე?

ალიმ ამოიოხრა:

– გამომავდო.

რიზელმა კიდევ უფრო დააჭირა მკლავი გულზე.

– მაშ, უსაქმოდ ხარ?

– ჰო.

ერთმანეთში ირეოდა სუნთქვა, ლულლული და ხვრინვა. ეს ყველაფერი აბანოს თაღქვეშ იყრიდა თავს და იქი-

<sup>1</sup> რიზე – ქალაქია თურქეთში.



დან გუგუნით იფანტებოდა.

რიზელი ერთხანს გაჩუმდა.

– ხვალლამ მოხვალ?

– სად?

– ზეირექის აღმართზე, იქ ერთ ბა-  
ყალს დუქანი აქვს. ერთი კვირაა, ვუთ-  
ვალთვალებთ...

ალის ხმა არ ამოუღია. რიზელი  
ხელს ნეკნებზე უსვამდა. სათითაოდ  
დათვალა ალის ნეკნები და ახლა მუც-  
ლის ზელა დაუნყო.

– მშიერი ხარ, არა?

– მშიერი ვარ, – უპასუხა ალიმ.

რიზელმა ხელი ჯიბეში ჩაიყო და  
გამხმარი ბლითის ნატეხი ამოიღო.

– გამომართვი.

ალიმ სასწრაფოდ ჩაკბიჩა და  
ღეჭვა დაიწყო.

– ფული არ გქონდა?

– მქონდა ცოტა...

– რატომ არაფერი ჭამე?

ალის ისევ ააკანკალა, თითქოს შეს-  
ცივდაო.

– რა ვიცი... ხვალ დილას...

– რა?

– არაფერი, ისე.....

რიზელმა მხრები აიჩეჩა.

ალი დაორთქლილ პატარა ფან-  
ჯრებს მიაცქერდა. ღამე იყო. ხმაურისა-  
გან ყურები უნიოდა. ცხელ ქვაზე მიდე-  
ბული ზურგი უკვე გაუთბა. ბულისაგან  
თვალეები ეწვოდა.

ნეტავ სად არის ახლა გიულლუ?  
ვინ იცის, სად არის შეყუჟული, ხელები  
აღბათ ილღიაში აქვს ამოდებული, რომ  
არ გაეყინოს. მუხლები მუცელზე მიუკ-  
რავს. იქნებ ვინმე ახალი ნახა, ასკერი<sup>1</sup>,  
ქურდბაცაცა, ყავახანის პატრონი ან შე-  
გირდი და მის მკლავებში ნებივრობს?  
აღბათ, ამ წუთში ვიღაც ხელებს უფა-  
თურებს უბეში და სპირტისგან აყროლე-  
ბული ტუჩებით კოცნის.

უკანასკნელი ლუკმა ალიმ გაჭირ-  
ვებით ჩაყლაპა, კბილებზე ენა მიისვ-მო-  
ისვა, ბულისაგან შეწუხებულმა თვალეები  
მილულა და რიზელს მიეკრა.

## დიდრონი თევზები<sup>2</sup>

(ნანყვეტი რომანიდან)

„ქალაქი ესე სითამბული? რომელიც...“  
ნედიმი

უკვე თენდებოდა, როცა ვატმანმა  
საბრიმ მეორე კლასის ტრამვაი შიშლი-  
სირქეჯი<sup>3</sup> ფარეხიდან გამოიყვანა.

კედლების ძირში მოკალათებული  
სიბნელე ნელ-ნელა მტრედისფერს იღებ-  
და. ბორბლების ღრჭიალზე სასაფლაოს  
კართან მიმჯდარი სამი მუშა შეიშმუშნა.  
ტრამვაიმ წრე დაუარა და სწორედ მათ

წინ გაჩერდა. მუშებმა ზანტად ააბიჯეს  
კიბეზე. კონდუქტორი ფეხმორთხმით  
იჯდა უკანა სკამზე და ფარეხის კაშკაშა  
სინათლეს მისჩერებოდა.

– სახელმწიფო ქონებაა, – თავის-  
თვის ჩაილაპარაკა მან, – დღისითაც კი  
უნთიათ, აზრადაც არავის მოუვა, რომ  
ჩააქროს...

<sup>1</sup> ასკერი – ჯარისკაცი.

<sup>2</sup> იბეჭდება პირველად.

<sup>3</sup> შიშლი, სირქეჯი – უბნებია სტამბოლში.



ერთმა მუშამ წითელი ფუთა გახსნა, პური და ზეთისხილი ამოიღო და ჭამას შეუდგა. მეორემ სიგარეტი გაუნოდა კონდუქტორს:

– გააბოლე, ჯემილ ეფენდი.

შუბლშეკრულმა კონდუქტორმა კოლოფი შეათვალიერა:

– რა არის ეს?

– „ბირინჯი“.

– ვერ მოვწევ, ღამე მახველებს.

– კეთილშობილებში ჩაენერე თურა...

საბრიმ მშიერი თვალები მოავლო ვაგონს. შემდეგ კარი მაგრად მიაჯახუნა და მიბრუნდა. მუხრუჭებისგან გათავისუფლებული ბორბლები ლიანდაგზე გაგორდა. ქალაქის პირველი ტრამვაი მთელი ძალით გაქანდა ცარიელ ქუჩებში.

საბრი თავს ძალას ატანდა, არ ჩამეძინოსო.

– ეგ ძაღლისშვილები, ეგა, – ჩაიბურტყუნა მან, – არ დამაძინეს... ბაყალ ჰასან ეფენდის მთვრალმა სიძემ შუაღამისას ისევ ფეხზე დააყენა მთელი მეჯიდიეჟი. სანყალმა მისმა ცოლმა ცემატყეპის მთელი კვირის ულუფა ერთბაშად იგემა. პენსიონერ ყრუ ალი ბეის გარდა, მთელ უბანს ძილი დაუფრთხა. ვაი, იმ კახპას... რამდენი წელია, ამ უბედურებას იტანს. ნეტავ რამ შეაყვარა ის ძაღლი, ისა, კაცმა არ იცის.

ჰასთანეს, ბომონტის და ოსმანბეის გაჩერებები სწრაფად ჩაიქროლა. ფანგალთის გაჩერებაზე ფერიქოის უბნიდან ჩამოსულ ერთ მოხუც ქალსა და რამდენიმე მუშას გაუჩერა. წინა კარიდან ამოსულ ქალს პაპიროსის, ოფლისა და მინის სუნი შემოჰყვა. თეთრად ალაპლაპებული ლიანდაგები მოლურჯო სინათლეზე მიიკლაკნებოდა.

ფანგალთისა და ჰარბიეს ისარს რომ გასცდა, საბრიმ ისევ გააქროლა ტრამვაი. სურბაგოფის დაღმართი სულ

ფრენით ჩაიარა და თაქსიმის მოედნისაკენ მიმავალ აღმართს შეუდგა. ვაგონში მოხუცი ქალისა და კონდუქტორ ჯემილ ეფენდის გარდა, ყველა თვლებდა. ერთი მუშა ორადგილიან სკამზე განოლილიყო. მშვიდად ეძინა, როგორც ერთადგილიანი საწოლი ვაგონის მგზავრს. ჯემილ ეფენდიმ სიგარეტს მოუკიდა, კარი გამოაღო და საბრის გასძახა:

– ნუ მიერეკები, კაცო!.. მერე საყვედურს გეტყვიან, ადრე დაბრუნდაო.

საბრის ხმა არ ამოუღია. ათათურქის ძეგლის წინ მეშვიდედ დაგებული ასფალტის მონაკვეთიც გაიარეს. ემინონუმდე აღარაფერი რჩებოდა. ასფალტის ამ ნაკერებს საბრი შორეულ ნათესავებზე უფრო კარგად იცნობდა. ზეპირად იცოდა ქვაფენილის ფერი, მოყვანილობა, რომელ უბანში რომელი მენაგვე უფრო კარგად მუშაობდა. თაქსიმიდან რომ გაუხვიეს, თავისთვის წარმოთქვა:

– იფ, გენაცვა, რა სისუფთავეა. არა, მაშ, შიმპანეს უბანში იქნება ასე!

ფარმაქეაფის გაჩერებაზე ვაგონში მძინარე მუშები ძლიერმა ბიძგმა გააღვიძა. ორადგილიან სკამზე წამოწოლილი ახალგაზრდა ასევე ბრტყლად გაიშოტა იატაკზე. მოხუც ქალს ბოხჩა დაეშალა. დაბნეულმა კონდუქტორმა ჯემილ ეფენდიმ ანთებული სიგარეტი ჯიბეში ჩაიდო:

– უჰ, რა მუხრუჭია!

საბრი ძირს ჩახტა. მან ბრაზით გააყოლა თვალი კატას, ქვაფენილზე რომ მიხტოდა და სულშეხუთულმა ამოისუნთქა:

– კიდევ კარგი, არ გავსრისე...

შემდეგ უკან აბრუნდა და სახეგანცვიფრებულმა უნიათოდ აცნობა მგზავრებს, გადარჩაო.

შუშაზე ცხვირმიდებულმა მუშამ თავისთვის ჩაილაპარაკა:

– გადარჩა, მაგრამ კუდი კი დაკარგა...



პროსპექტის პირას მდგარ სახლებს ღრმად ეძინათ. მხოლოდ ერთ მათგანში, მეორე სართულზე, გაიღო ფანჯარა. ვარდისფერპერანგიანი, ბამბასავით თეთრი ქალი რაფაზე გადმოიხარა:

– კუდი მოსწყვეტია, – თავისთვის ჩაილაპარაკა მან, – სანყალი კატა.

შემდეგ თითქოს შეცივდაო, შეათრთოლა, ოთახში შებრუნდა, ფანჯარა მიხურა და ისევ მიმავალი ტრამვაის სინათლეს გააყოლა თვალი.

გაზაფხულის ცხელი მზე ამოდიოდა.

სილვა ზანტად გაიზმორა. უკვე ამდგარიყო... ისევ ლოგინში ჩანოლა აღარ უნდოდა. შემდეგ საბანში გახვეულ მძინარე მამაკაცს მიუბრუნდა. ერთხანს მის ხვრინვას მიუგდო ყური. სახეზე ზიზლის ჩრდილმა გადაუარა.

ღამე რალაც გაუთავებლად მოეჩვენა. მამაკაცის უსასრულო შემოტევების დროს ღუმდა და ცდილობდა, მხიარული სახე მიეღო. როცა მის მკლავებზე და მკერდზე მამაკაცის ტუჩები დაძრწოდა, ისე შენუხდა, ეგონა, მოვკვდებიო. „ოჰ, ერთი ეს ღამე გათავდებოდეს,“ – ფიქრობდა ის და პატარა ქალაქ სამათიაში აპირებდა დეიდასთან წასვლას დასასვენებლად. დეიდას ჰგონია, რომ ტრიკოტაჟის ფაბრიკაში მუშაობს და, სამსახურთან რომ ახლოს იყოს, ერთ კარგ ოჯახში ცხოვრობს პანსიონზე. სანყალ მოხუცებულს ძალიან უხარია, როცა მისი საყვარელი დისშვილი გამოჩნდება ხოლმე ფულებით ხელში.

სილვა სარკისკენ წავიდა. მკლავებსა და მკერდზე ლურჯი ლაქები დაითვალიერა. შემდეგ ისევ ფანჯარას მიაშურა. მოპირდაპირე სახლში სამკერვალო „ვერცხლის მაკრატელი“ იყო მოთავსებული. მუშებს ფანჯრები გაეღოთ და სახელოსნოს ანიავებდნენ. უკვე გათენებული იყო. „აღრე გამალვიძეო, კი მით-

ხრა, მაგრამ – გაიფიქრა სილვამ, – ვაითუ, გაბრაზდეს?“ სანოლს მიუახლოვდა. ეშინოდა, რაც მთელი ღამე დუმილით მოიპოვა, ამ რამდენიმე წუთში არ დაეკარგა. მამაკაცს ფრთხილად დაჰკრა მხარზე ხელი.

მამაკაცი შეიშმუშნა, თვალები გაახილა.

– ადექი, ჩემო ტკბილო, გათენდა.

შაქირ ბეიმ ძილისაგან დაოსებული თვალები იქაურობას მოავლო. აშკარად ეტყობოდა, რომ ვერც ვერაფერსა ხედავდა და არც არაფერს გრძნობდა. ჩაახველა.

– დიახ, გათენებულა... აკი, გითხარი, ადრე გამალვიძე-მეთქი, – წაიბურტყუნა მან თავისთვის და გაიზმორა, თვალები მოიფშვნიტა და დაამთქნარა. – გათენდა?

– გათენდა, მაშ!

– რომელი საათია?

– შვიდის ნახევარი.

– უჰ, რამდენი დრო გასულა.

– ვერ გავბედე გალვიძება, მაგრამ მერე ვიფიქრე...

– კარგი გიქნია, კარგი, ჩემო სულის კლიტევ.

შაქირ ბეი უცბად წამოხტა ლოგინიდან. ხელსაბანისკენ გაიქცა და საჩქაროდ პირი დაიბანა, შეიმშრალა კიდეც და ეშმაკურად შეხედა სილვას:

– ძალიან მწყინს, რომ ასე ადრე უნდა წავიდე და დაგტოვო, მაგრამ...

– მართლა?

– მართლა. რას იზამ, საქმემ ასე იცის... განა საქმე შენს გემოზე დაგაცლის არშიყობას...

– შენ მუდამ ეგრე ამბობ.

– მოდი, ერთხელ კიდეც გაკოცო.

სილვას არ უნდოდა, მაგრამ არაფერი აგრძნობინა და მიუახლოვდა. მამაკაცმა წელზე შემოჰხვია ხელი, სილვას ბაგეებს დაენაფა და ერთხანს არ მოეშ-



ვა. ბედნიერი და კმაყოფილი გაღმა სახლის ფანჯრებში არეკლილ მზეს მიაშტერდა და ერთხელაც გაიზმორა.

– ოჰ, რა კარგი იყო ეს ღამე.

თვალი ჩაუკრა. სიღვამაც გაუცინა. „მეტი აღარ შემიძლია, – გაიფიქრა მან, – ნეტავ როდის წაეთრევა?“

– შენ მე არ გიყვარვარ.

შაქირ ბეის გაეცინა. შარვლის სამაგრებს იკეთებდა და თან სიცილით კვდებოდა:

– არ მიყვარხარ. შენც თქვი, რალა. ვგიჟდები შენი გულისთვის, ჩემო პატარავ...  
– რომ გიყვარდე, ყოველთვის მოხვიდოდი.

– ხომ იცი, რომ ცოლი მყავს, ჩემო პატარა. ორ კვირაში ერთხელ თუ დავიძვრენ თავს. ისიც რა გაჭირვებით... რას არა ვჩმახავ, რომ იცოდე, შენი გულისთვის, რას არა.

– ნადი, ნადი, ტყუილად ნუ ცდილობ ჩემს დარწმუნებას.  
იგი ხარხარით მიუახლოვდა ქალს და, თავისი სიყვარული რომ ეჩვენებინა, ერთხელაც ჩაეხუტა და ისევ დაენაფა ქალის ბაგეებს. „ნეტავ არ მეთქვა, – გავლო გულში სიღვამ, – თუმცა რა მექნა? ჩაცმის დროს ცოტა გული უნდა გამეკეთებინა. წუნუნს ხომ არ მოვყვებოდი“.

მამაკაცმა კომოდზე ორმოცდაათი ლირა დატოვა და წავიდა. სიღვამ ფულს შეხედა.

– წავიდა, – ჩაილაპარაკა მან თავისთვის, – კაცი, რომელიც მუდამ ოცდაათ ლირას ტოვებდა ხოლმე, ორმოცდაათ ლირას ტოვებს. მეტი აღარ მოვა. დიახ, წავიდა და აღარ მოვა.

შაქირ ბეი სახლის ბნელი სადარბაზოდან მზიან ქუჩაზე გავიდა და ღრმად შეისუნთქა ჰაერი. იგრძნო, რომ სხეულში ყოველი ძარღვი ცალ-ცალკე გამოუ-

თავისუფლდა და სიმსუბუქე დაეუფლა. ფეხებში სასიამოვნო მოთენთილობამ და ბედნიერების მომგვრელმა ტკივილმა დაუარა. ქალთან ღამენათევს ტანსაცმელზე თავისებური სურნელი ასდიოდა. იგი ბარბაცით გაუდგა გზას გალათასარაის უბნისკენ. ამ დილას საბაჟოდან ასი ათასი ლირის საქონელი უნდა გამოეტანა, სულ ცოტა, ათი ათას ლირას მაინც გაირტყამდა. „ცოლმა რომ იცოდეს, ნახევარ საათში ათი ათას ლირას ვაკეთებ...“ – გაიფიქრა მან და გაეცინა. ნანობდა, რომ მთელი ერთი უშველებელი ღამე ორმოცდაათ ლირად გაყიდა. ქვაფენილს სიგრილე ასდიოდა. ბეიოღლუს უბანში დილას სუფთა ჰაერი იყო. ღრმად ჩაისუნთქა. „ნადი, ნადი, გენაცვალე, – განაგრძო მან ფიქრი, – ის კახპა, ისა... ბევრიც მივეცი. ოცდაათზეც თანახმა იყო... ახლა ახალი უნდა ვეძებო, მომწყინდა ეგ ქალი...“

საათს დახედა. შვიდი საათია. „ტაქსი ათ წუთში კანტორაში მიმიყვანს. ცოტა დრო კიდევ მაქვს. კაფე „თოქათლიანში“ ერთ კაკაოს დავლეევ...“ გადამწყდა. ძალიან შიოდა. გზად მიმავალი, კუთხეში მეთუთუნესთან მივიდა და ერთი კოლოფი „იენიჯე“ და გაზეთი „იენი ისტანბული“ გამოართვა.

მოხუცმა მეთუთუნემ კოლოფი და გაზეთი მიუგდო. მუშტრისათვის საქონლის უშნოდ მიგდება ძალიან სიამოვნებდა. არც სიგარეტს და არც ხურდას არასდროს ხელში არ მიაწვდიდა ადამიანს. ყოველთვის ასე მიუგდებდა ხოლმე. კუჭით ავადმყოფს მუდამ სახე ჩამოსტიროდა.

გაცივებული არასდროს არავის უნახავს. იჯდა პატარა დუქანში, რომელშიც კაცი ძლივს მობრუნდებოდა, ხმას არ იღებდა და აწყობილ მანქანასავით აწვდიდა პაპიროსს ან გაზეთს. გაყვითლებული სახე და თეთრი უღვაშები



ჰქონდა. „ჰარილაოსისაგან ისევ არ მოსულა წერილი, – ფიქრობდა იგი, – ნეტავ რა ქნა ბიჭმა? ავად არ იყოს და...“

– ერთი კოლოფი „ბაფრა“, – მოესმა მუშტრის ხმა.

ჰარილაოსი ორი წლის წინ ათენში გაგზავნა ბიძასთან. ფიქრობდა, ეს ჩემი შვილი ბერძნულ უნივერსიტეტს დაამთავრებს და საბერძნეთის მთავრობის სახელოვანი ჩინოვნიკი გახდებაო. შემოსავლის ნახევარს მუდამ შვილს უგზავნიდა, მეორე ნახევარი კი ძლივს ჰყოფნიდათ თვითონ და თავის მოხუცებულ ცოლს.

– მომეცი ერთი კოლოფი „გელინჯიქი“ და ერთი ჟურნალი „ჰაფთა“.

ის თარღაბაშის უბანში ცხოვრობდა ხის ერთ პატარა სახლში. უკანასკნელი დღეები გაჰქონდა. როცა ჰარილაოსისაგან მოდიოდა წერილები, სანუნუნოც არაფერი ჰქონდა, მაგრამ საკმარისი იყო, წერილს დაჰგვიანებოდა, რომ მაშინვე დაუვლიდა ტკივილები. თითქოს ფრჩხილებით აკანრავდა ვინმე კუჭს. ასეთ დროს ეჩვენებოდა, რომ ხის პატარა სახლი ძალიან ვიწრო იყო და შიგაღარ დაიდგომებოდა; ცოლის დამზადებული საჭმელი ისეთი უგემური იყო, რომ არ იჭმებოდა, ხოლო თერქოსის ტბის წყალი, რომელიც ონკანში მოდიოდა, მღვრიე იყო და არ დაილეოდა.

– Beyer's Mode მოვიდა?

ასეთ სულელურ შეკითხვაზე პასუხის გასაცემად თავს არ იწუხებდა. უარის ნიშნად თავს გაუქნევდა და ეგ იყო. ეჰ, ჰარილაოს, ერთი გაცოდინა, რას უძლებს მამაშენი...

– ორი კოლოფი „ბირინჯი“.

მოხუცმა ხმა იცნო. თავი ასწია. დიახ, ეს რეფიქ ბეი იყო. თხუთმეტი წელია, ყოველ დღით ორ-ორ კოლოფ სიგარეტს ყიდულობს და მისუსტებული ნაბიჯით კაფე „ნისუაზასკენ“ მიემართე-

ბა. გაზეთს არ ყიდულობს. როცა გული ძალიან შეანუხებს, ჭიქა წყალს ითხოვს. მოხუცი მეთუთუნე, მართალია, არავის არაფრად აგდებს, მაგრამ თავისი ტოლი ამ ნაცნობის მიმართ განსაკუთრებულ ყურადღებას იჩენს. ყველამ იცის, რომ მას ძალიან მწარე ცხოვრება აქვს გამოვლილი.

რეფიქ ბეი ათროლებული ხელებით ჩაიწყობდა ხოლმე ჯიბეში ორ კოლოფ სიგარეტს და გზას განაგრძობდა. დროდადრო გაჩერდებოდა და დიდხნობით ისვენებდა. ათიოდე ნაბიჯის სავალს ოცი წუთი მოანდომა, კაფე „ნისუაზაში“ შევიდა, ფანჯარასთან დაჯდა თავის ჩვეულ ადგილზე და დაღლილი მზერა ქუჩას მიაპყრო.

თხუთმეტი წელია, რეფიქ ბეი იმედს არ კარგავს და ელოდება. ქალმა თხუთმეტი წლის წინ ერთი პატარა უსიამოვნება მიზეზად მოიღო და წავიდა. მას ყვითელი თმები და აღტყინებისაგან გალურჯებული ტუჩები ჰქონდა. რეფიქ ბეიმ თავდაპირველად ყურადღება არ მიაქცია. იფიქრა, როგორც ყოველთვის, თავის დედასთან წავიდა და საღამოს დაბრუნდებოდა. მაგრამ, როცა ის არც იმ დღეს და არც მეორე დღეს აღარ გამოჩნდა, აღელვებული გაიქცა სიდედრთან და ცოლისდებთან. სად არ ეძებეს, სად არ მოიკითხეს, მაგრამ არავის უნახავს. ქალი იმისთვის წასულა, რომ არ დაბრუნებულიყო და კვალიც არავითარი არ დაუტოვებია. რეფიქ ბეის ეგონა, გაგიჟდებოდა. მთელი დღეობით არაფერს ჭამდა, არ ეძინა, იცქირებოდა, მაგრამ ვერაფერს ხედავდა, ყურს უგდებდა, მაგრამ არაფერი ესმოდა, ქუჩაში უსაქმოდ დაეხეტებოდა. სამსახურს თავი დაანება და საკუთარი ტანსაცმელივით შეჩვეულ კანტორაში აღარ შესულა. ცხოვრობდა მამისეული სახლისა და რამდენიმე დუქნის შემოსავლით, დღი-





თიღლე დაბლა ეშვებოდა. ბერდებოდა. ბოლოს იგრძნო, რომ ძალა აღარ ჰყოფნიდა ქერათმიანი და ლურჯბაგეებიანი ქალის საძებნელად და გადანყვიტა, „ნისუაზის“ ვიტრინასთან მისჯდომოდა მაგიდას და დალოდებოდა. სტამბოლი დიდი ქალაქია, მაგრამ სადაც უნდა ეცხოვრა ადამიანს, ერთხელ მაინც გაივლიდა ბეიოლლუს უბანში. მით უმეტეს, ისეთი ოქროსთმებიანი და ლურჯბაგეებიანი ქალი... რეფიქ ბეი თხუთმეტი წელია, ერთ კაფეში, ერთსა და იმავე მაგიდასთან ჯდება და ერთ ქუჩას გასცქერის. უკვე თმები გაუთეთრდა, წელში მოიხარა, ტანსაცმელი შემოაცვდა. სამაგიეროდ, გულში დაბუდებული გრძნობა ოდნავაც არ განელდება, უიმედობისათვის ადგილი არ დაუთმია. ამ ხნის განმავლობაში იმ ქუჩაზე არაერთი გაჭაღარავებული, ტუჩებჩამოვარდნილი ბებერი ქალი დაუნახავს. რეფიქ ბეის მათთვის ყურადღებაც არ მიუქცევია... ის ოქროსთმიან, ლურჯბაგეებიან ქალს სდარაჯობდა. თხუთმეტმა წელმა განვლო, მაგრამ ქალს, რომელსაც ის აქ ელოდა, არ ჩამოუვლია.

რეფიქ ბეი ქუჩას ინსტინქტით, უთვალისჩინოდ გაჰყურებდა. გამვლელები ვერ ხვდებოდნენ, რა წერტილს მისჩერებოდა ამ მოხუცის გაციებული მზერა. მართლაც და, ცოცხალს ის აღარაფერს უმზერდა. მას თვალწინ ედგა პირველი სიყვარული, ოჯახური ცხოვრება, სატრფოსთან მარტო დარჩენის პირველი ღამე... ბატისტის თეთრეულის პირველი შეხება, რომელიც მათ გახურებულ სხეულებს სიგრილეს ჰგვრიდა... პირველი კოცნა, პირველი შეერთება... ყველა ეს პირველი განცდა ახლად გამოჩეკილ პეპელასავით დაფარფატებდა მის გონებაში. პირველი განცდები, სულ პირველი განცდები...

ოდნავ დაშაქრული ყავა უკითხავად

მოუტანეს და წინ დაუდგეს. გაისმა ტელეფონის წკრიალი. ყურმილი მსახურმა ქალმა აიღო.

– Oui, Madame, ici Niceoise...

– ...

– Monsieur David n'est pas, troisieme esage; je le sais.

– ...

– C'est compris Madame.

მადამ დავიდმა ტელეფონის ყურმილი დადო და კედლის საათს შეხედა. რვის ნახევარი იყო.

– ნამცხვრის მოტანამდე, – გასძახა მან მოსამსახურე ქალს, – კაკაო აადულე. ბატონი საცაა, ადგება...

შემდეგ ფანჯარა გამოაღო და ჩაილაპარაკა:

– დღეს სიცხე იქნება. ნაშუადღევს ელიზასთან წავალ, ბავშვებსაც წავიყვან, კორტებზე ცოტა ჩოგბურთს ითამაშებენ.

სანოლი ოთახისკენ გაემართა. კარი გამოაღო. მესიო დავიდი ხვრინავდა. მადამ დავიდს გაელიმა. გვიან დაწვა სანყალი, იძინოს ცოტა... მესიო დავიდს წინა ღამეს ერთი ამერიკული ფირმის წარმომადგენელი ჰყავდა სტუმრად სასტუმრო „პარკოტელში“. მადამ დავიდმა კარი ფრთხილად მოიხურა და თავისთან დაბრუნდა. სიმღერას ღიღინებდა ერთი საყვარელი ფილმიდან, Goodbye, Amanda...

– კაკაო მზადაა, მადამ, – მოახსენა მსახურმა ქალმა.

– მართლა? მესიო ჯერ არ გამოსულა, ცხლად შეინახე... Goodbye, Amanda...

ველარ მოითმინა, მაგნიტოფონი ჩართო. ოთახს ტენორის ხმა მოეფინა: Adios, adiö, adiyuuu...

ქვედა სართულზე მცხოვრები მუნიციპალიტეტის მოსამსახურის, სადიპ ბეის, ცოლი უცბად წამოხტა ლოგინიდან:



– დასწყევლოს ღმერთმა, ჯერ არ გათენებულა და უკვე დაიწყეს. ბავშვს გააგიჟებენ. აიშე, ადი ერთი...

თხუთმეტი-თექვსმეტი წლის პატარა შინამოსამსახურე მაშინვე გაიქცა. კიბე ტყუპ-ტყუპად აირბინა. რამდენიმე წუთის შემდეგ ტენორის ხმა დადუმდა.

ფეხის წვერებზე შემდგარი ჯემილე ჰანუმი მურადის სამუშაო ოთახისაკენ გაემართა. კარი ოდნავ გამოაღო. წიგნებსა და რვეულებში ჩაფლულმა მურადმა თავი ასწია:

– რა არის, დედა?

– აჰ, შვილო, ხელს ხომ არ გიშლიან? ზემოთ რომ გადარეული ქალია, ისევ რადიო ააყვირა. აიშე გავგზავნე და გავაჩუმებინე.

მურადს გაელიმა:

– არ მიშლიან, დედიკო, ნუ წუხდები... წადი, ახლა მარტო დამტოვე...

– ღმერთმა გონება გაგიხსნას, შვილო.

ჯემილე ჰანუმმა ისევ მოიხურა კარი. აიშე ქოშინით ჩამოვიდა მაღლიდან. ის ხმამაღლა შეუდგა თხრობას:

– გვაპატიონო, მითხრა, არ ვიცოდით, – თქვა...

ჯემილემ თვალების ბრიალით შეუტია აიშეს:

– რა გაყვირებს, გოგო, პატარა ბატონი მეცადინეობს, განა რამდენჯერ გაგაფრთხილე!

„ამ მადამს, – ფიქრობდა თავისთვის ჯემილე ჰანუმი, – როგორმე მოვლა უნდა... თორემ ამ სახლში ჩემს შვილს მეცადინეობას არ დააცდიან... გვაპატიონო, უთქვამს, არ ვიცოდითო. ჩემს ქმარს ჯარიმა რომ არ გადაეხდევინებინა თავზე ხალიჩის დაფერთხვისთვის, რას გააჩერებდი... ეშინიათ ნამდვილად... უნდა ეშინოდეთ კიდეც...“

სალიჰ ბეი მკლავზე ჯოხგადაკიდებული გავიდა კარში:

– ჰანუმ, მივდივარ, – გასძახა მან ცოლს. – ცოტა დამაგვიანდება ალბათ, ნუ შეგეშინდებათ.

– ო, ბატონო, ნუ ხმაურობთ, გეთაყვა. ბავშვი მეცადინეობს.

სალიჰ ბეის პასუხი არ გაუცია. კარში ფრთხილად გავიდა. კიბეზე მძიმედ დაეშვა. „იმეცადინოს, – გაიფიქრა მან, – ბოლოს და ბოლოს, ჩემნაირი მოსამსახურე უნდა გახდეს, ხომ?.. მაღლობა ღმერთს, ბიჭმა არ იცის, სად მივა საბოლოოდ, თორემ მთელ წიგნებს დახურავდა და, ღმერთმანი, სტრიქონსაც აღარ წაიკითხავდა“.

სალიჰ ბეი, რომელიც ეროვნული დაზღვევის კანონის მიხედვით თვეში ორმოც ლირას იხდიდა ბინის ქირას, ზანტად გავიდა ქუჩაში. ერთი დღეც არ ახსოვს თავის ცხოვრებაში, რომ სიხარულით წასულიყო სამსახურში. წლების მანძილზე ყოველ დილით ფეხის თრევით მიაბიჯებდა ამ ქვაფენილზე. გულში მუდამ ახალი დღის დასაწყისის წუხილი ჰქონდა. „დარდი, დარდი, დარდი, – ამბობდა ხოლმე თავისთვის, – საღამომდე დარდს უსმინე, დარდსა და გაჭირვებაზე ილაპარაკე... ყველას თავისი დარდი აქვს, დამქირავებელს, მმართველს, მოსამსახურეს...“

ის მძიმედ მიაბიჯებდა გალათასარაისაკენ. ხშირად ალაჯამის გაჩერებამდე მისვლა ეზარებოდა და გალათასარაის ფოსტის წინ ჯდებოდა ხოლმე. დილაობით მოძრაობის მომწესრიგებლები არ იყვნენ. ტრამვაი თავის ჭკუაზე მიდმოდიოდა, ფოსტის წინ არ აჩერებდა. „შევახტები და ის იქნება, – გაიფიქრა მან, – აი, მოდის კიდეც ჰარბიე-ფათიჰი, თანაც მეორე კლასისა...“ სალიჰ ბეი გაიქცა. ის იყო, გაქანდა შესახტომად, რომ ყურებში მუხრუჭების საშინელი ღრჭიალი ჩაესმა. შიშისგან დაბნეული გვერდზე გახტა და ზედ მიასკდა ფარს, რო-



მელზეც ეწერა: „მოძრავ ტრანსპორტში ასვლა და ჩამოსვლა აკრძალულია“.

– თვალეები არა გაქვს, კაცო?

1949 წლის მოდელის კადილაკიდან თავი გამოეყო ახალგაზრდა კაცს და გაბრაზებული შემოსცქეროდა. მშვიდ ვითარებაშიც კი თავგზააბნეულ სალიპ ბეის სულ მთლად დაებნა გონება. „არა, ბრმა არა ვარ, შენ კი რა, ბრმა ხარ? წინ ვერ გაიხედავ? რა უბედურებას ეძებ ამ დილაადრიან, შვილო? აქ საჯირითო ხომ არ გგონია. მე შენ გიჩვენებ, როგორ უნდა მანქანის ჭენება. იცი, მე ვინა ვარ? მუნიციპალიტეტის უფროსი... მეექვსე უბნის უფროსთან შევხვდებით“. ეს სიტყვები ელვის სისწრაფით იბადებოდა და ქრებოდა მის თავში. გაბრუებულმა ერთი მათგანი ამოიჩემა და წარამარა იმეორებდა:

– აქ საჯირითო ხომ არ გგონია?

– თუ ჩამოვედი, გაგაგებინებ, საჯირითოა თუ საბურთაო.

ტრამვაი იმიტომ იყო გაჩერებული, რომ უკან ხმაური გაისმა. სალიპ ბეი გამოერკვა. შიშისა და ბრაზისგან კანკალს აეტანა. ბაქანზე შეხტა და გარეთ გაიხედა.

– მეექვსე უბნის უფროსთან გაიგებ, ვინცა ვარ...

მანქანაში მჯდომმა ახალგაზრდამ გაზს უმატა. ტრამვაის რომ გაუსწორდა, მოიხედა:

– ჩემგან მოკითხვა გადაეცი, – მიაძახა მან სალიპ ბეის გასაბრაზებლად.

– ჩეთინ, ბიჭო, კინალამ არ გასრისე საწყალი... – ზანტად ჩაილაპარაკა მანქანაში უკან მჯდომმა აიღინმა.

– ნეტავ გამეჭყლიტა.

აიღინის მკლავზე მისვენებულმა მთვლემარე ბერნამ თვალეები გაახილა.

– რა ამბავია, გავაუთოეთ ვინმე?

– არა, მაგრამ... არც არაფერი დააკლდა.

– ცოდოა.

ჩეთინმა გადაიხარხარა.

– რა არის ცოდო... ქვეყანას ერთი ბებერი მოაკლდებოდა.

ჩეთინი იმ ახალგაზრდათაგანი იყო, რომელთაც მიაჩნდათ, რომ ახალგაზრდებმა დაუყოვნებლივ უნდა მოსპონ ყველა მოხუცი. მანქანამ ინგლისური სასახლის პირდაპირ გაუხვია და სახაშესთან გაჩერდა. შუალამემდე ბუიუქდერეს უბანში იყვნენ და „ბეიაზფარქში“ სვამდნენ. შემდეგ „ლოდიში“ გაათენეს. უძილობისა და სასმელისგან გამოთავყანებული იყვნენ. შინ ასეთი გატრეტილის მიყვანას აიღინმა არჩია, თავისი საცოლე ბერნა ხაშის საჭმელად წაეყვანა და გამოეფხიზლებინა.

– ადე, – ჩასძახა მან ბერნას, – მართლაც, რა მაზალო ყოფილხარ, ორმა ჭიქამ კისერი მოგტეხა.

ბერნა მთქნარებით წამოდგა. ჩეთინი უკვე მეხაშესთან იყო შესული... თავისი ამხანაგი ერთობ რომანტიკოსად მიაჩნდა, მისსა და ბერნას სიყვარულს დასცინოდა ხოლმე. თვითონ საკმარისად რეალისტი ახალგაზრდა გახლდათ. სკოლაში შვიდი წლის მეტი ვერ გაძლო. მონმობა საშუალო სკოლის დაუმთავრებლად იგდო ხელთ. მთელი მისი მიზანი იყო, ორი ტაქსი ჰყოლოდა სამუშაოდ გაშვებული. ნებისყოფაც ჰქონდა. მანამ მოითმენდა, სანამ მოხუცს არ აიძულებდა, სარფიანი საქმისათვის მოეკიდა ხელი და თავისი ცოტაოდენი ფულის ნაწილი ტაქსის საქმეში დაებანდებინა. რამდენჯერ უცდია დაერწმუნებინა, რომ სწავლა არაფერს იძლევა. რასაც მოსამსახურე თვეში იღებს, იმდენს ტაქსის შოფერი ორ დღეში ღუნავს... მაგრამ მოხუცის მორჯულება არც ისე ადვილი იყო. სკოლის გამო ძალიან ემდუროდა. ის არც სხვა საყვედურებს ერიდებოდა. მამა რომ საყვედურებს მოჰყვებოდა, ჩე-



თინიც მაშინვე ეტყოდა, განა შენ თვითონ სწავლით იშოვე ფულებიო. მართლაცდა, მოხუცს დაწყებითი სკოლაც არ დაუმთავრებია, მაგრამ მცირეოდენი მილიონები მაინც ჰქონდა. მანაც იცოდა, რომ ფულის შოვნასა და სწავლას შორის არავითარი კავშირი არ იყო. ისე კი, გულით უნდოდა, რომ ნასწავლი შვილი ჰყოლოდა.

ჩეთინი მამის ასეთ განცდებს არაფრად დაგიდევდათ. მოხუცი, მართალია, ტაქსის საქმეში საჭირო სახსრებს არ აძლევდა, მაგრამ ჯიბის ფულს არ აკლებდა. ამ მხრივ არავითარი გაჭირვება არ ჰქონდა. ბარიდან ბარში, სამიკიტნოდან სამიკიტნოში დადიოდა და თავის გემოზე ცხოვრობდა. მოხუცის საქმე უკვე წასული იყო. ცას ხომ არ გამოეკერებოდა. ერთ დღეს ისიც წავიდოდა ამ ქვეყნიდან. მაშინ კი ჩეთინი ორ ტაქსის კი არა, ოცს აამუშავებდა.

აიღინი მკლავში ეწეოდა ბერნას და ცდილობდა, დუქნის გაქონილ კარს არ გახახუნებოდა. სახაშის პატრონს, რეჯეფ ქორქმაზს, ცალი ხელი პიჯაკის სახელოში გაეყარა და მეორეს ეძებდა გამწარებული. ამ დილას სასაკლაოზე უნდა წასულიყო. მებითუმესთან ანგარიშის გასასწორებლად საფულეში ორი პრიალა ასიანი ედო. „დალოცვილი ფული არასდროს არ დაძველდება, – ფიქრობდა იგი, – ბაზარზე რამდენი ახალი ფული ტრიალებს“.

– ამ ბატონებს მიხედვით, – გასძახა მან ერთ თავის შეგირდს.

ქუჩაშიც კი მარმარილოს ქვაბით ჩადგმული შიგანი და შამფურზე წამოგებულ ცხვრის თავები უტრიალებდა გონებაში. თუნუქის სათუთუნიდან სიგარეტი ამოიღო და ქუჩაში გავიდა.

სტამბოლის ქუჩებში გაზაფხულის ცხელი დილა თუხთუხებდა.

რეჯები ინგლისის საკონსულოს სქელ კედელს გაჰყვა ხახუნით და თავქვე დაეშვა. ჯიბეში ასანთს ეძებდა. შეიგინა კიდეც. „მოსამსახურეები ყოველთვე ახალმოჭრილ პრიალა ფულს ეზიდებიან ბაზარზე. ეს არის ახალი ფულის სიუხვის მიზეზი“. რეჯები მისკენ მომავალ ახალგაზრდას გადაელობა.

– თუ შეიძლება...

ადვოკატმა ჯემილმა თავისი სიგარეტი გაუნოდა. რეჯებმა ქონიანი თითები ჩაავლო სიგარეტს, რამდენჯერმე ღრმად მოქაჩა და სიგარეტს მოუკიდა.

– გმადლობ.

ადვოკატ ჯემილს ხმა არ ამოუღია. ცოტა გაიარა და გადააგდო. ბეიოლლუს უბნის სასამართლოში საქმე ჰქონდა გასარჩევი. „მოსამართლე თერთმეტის თხუთმეტ წუთზე ადრე არ მოვა. მანამდე სად გავატარო დრო, – ფიქრობდა ის. – ამინდიც რა კარგია... ინონიუს ბულვარისკენ წავალ“. სასამართლოდან გამოსვლისთანავე „საჭაშნიკისკენ“ უნდა გაქცეულიყო, სუკი ეჭამა და ლუდი დაეყოლებინა. ამის შემდეგ უკვე შეიძლებოდა დესპინეს წაყვანა და ბუიუქდერეში წასვლა. სალამოს კანტორაში უნდა ყოფილიყო.

„შენც ერთი... – იფიქრა მან, – ერთ დღეს ავდგები და არ წავალ. არავინ მელოდება...“ ორჰან ველის<sup>1</sup> სტრიქონები გაახსენდა: „ასეთ ამინდში გადავდექი სამსახურიდან ევკაფების<sup>2</sup> სამმართველოში“. ბუიუქდერეს სიამოვნებაზე უარის თქმა და ნაშუადღევს კინოში შესვლაც მშვენივრად შეიძლებოდა. კინოები ახლა ორ-ორ ფილმს უჩვენებენ. ერთ კომედიას, მეორეს – განგსტერულს...

<sup>1</sup> ორჰან ველი – ცნობილი თურქი პოეტი (1914-1950).

<sup>2</sup> ევკაფი – მეჩეთების, სკოლების ან საქველმოქმედო დაწესებულებებისათვის ნაანდერძევი თუ ნაბოძები უძრავი ქონების სამმართველო.



ცივი ლუდით ოდნავ გაბრუებული, სავარძელში ჩაჯდებოდა და ფილმის მღელვარე დინებას მიეცემოდა. ასე კანტორაშიც დროზე მივიდოდა. „ასეთ ამინდში გადავდექი სამსახურიდან... ოჰ, რა კარგია ცხოვრება...“ მას თვალწინ აუთრთოლდა დესპინეს წითელი ბაგეები. ნახევრად შიშველი დაკლაკნილი სხეულის წარმოდგენაც კი რა დიდი სიამოვნებაა. „კანტორა. ერთი, შენც... ერთხელაც არ წავალ. ასეთ ამინდში დამვიწყებია შინ მარილის და პურის მიტანა“. ბუიუქდერეს აგარაკის გასაღები ჯიბეში ედო. ზამთარში ბეიოლლუში რომ გადმოდიოდნენ, დედამისმა ნივთები გულდასმით მოაგროვა, ხალიჩები ჩამოხსნა, ფანჯრებზე ქალაღები ააკრა, თუმცა ერთმანეთზე დახვავებულ ავეჯს შორის სიყვარულს სულ სხვა გემო ჰქონდა. ბაღში ყვავილებმა კვირტი გამოიღეს, მზე გავარვარებული ანთია ზღვის თავზე. პატარა ტალღები ნაზად ეალერსება ნაპირის ხავსიან ქვებს. დესპინე შიშველი დგას, ქალაღდაკრული ფანჯრებიდან შემოსული წითელი სხივებით განათებული. მისი ვარდისფერი სხეული ხარბად ისრუტავს მზის სხივებს, რომლებიც ხან მხრებზე ეცემა, ხან კისერზე, ხან კი ბაგეებზე. ქირეჩის კონცხიდან გამავალი გემის საყვირის ხმა სიღრმიდან მოსულ იავნანას ჰგავს. ახლა ყველაფერი მოქცეულია სიყვარულის გალაქტიკაში, რომელიც ერთიმეორისკენ მიზიდული ნაწილაკებისგან შედგება. „მე ამ შესანიშნავმა ამინდმა დამლუპა“.

– ჯემილ, ჯემილ!

ადვოკატმა ჯემილმა თავი ასწია. მოშორებით მანქანა იდგა. ფაჰირს ავტომანქანის კარი გამოეღო და ეძახდა:

– საით?

– არსაით. შენ?

– ფილმის გადაღებაზე მივდივარ.

ჯემილს გაეღიმა. ბოლოს და ბოლოს, რეჟისორმა ფაჰირმა მონახა ფულიანი კაცი, რომელიც ხარჯს გაიღებდა მისი მრავალი წლის საოცნებო მხატვრული ფილმის გადასაღებად. საწყალი კაცის მიერ ომის დროს ერბოს სპეკულაციით ნაშოვნ ფულს ის ახლა კინოკამერაში ხარჯავდა.

– შენც ხომ არ წამოხვიდოდი?

– ვერ წამოვალ.

– რატომ? ნახე, რა კარგი ამინდია.

– სასამართლო მაქვს.

– კარგი აბა, თორემ დამაგვიანდა, ფიცარნაგი დიდი ხანია, მზადაა.

ჯემილს ისევ გაეღიმა. ფაჰირს კარგად იცნობდა. არ ახსოვს, რომ სიცოცხლეში ერთხელ მაინც დროზე მისულიყო საქმეზე. მან ხელი დაუქნია სწრაფად მიმავალ მანქანას.

მანქანა ბართან გაჩერდა. ამ ბარს „აილე ბაჰჩესი“ ერქვა. იგი თავისუფლების გორაკისაკენ მიმავალ გზაზე მდებარეობს და ვინმე ბარბას ეკუთვნის. ფაჰირი მაქანიდან გადმოვიდა. მსახიობები ამ დროს მესამე ხელ ნარდს აგორებდნენ. ოპერატორი ხის ძირას იწვა და ცას ათვალიერებდა. სტუდიის ერთი მუშა მის დანახვაზე ადგილიდან წამოხტა და პატრონის გულის მოსაგებად აქეთ-იქით კითხვა დაიწყო, ახლომახლო ტელეფონი სად არისო. ფაჰირმა თვალი შეავლო ქალის როლის მომავალ შემსრულებელს, ჰარიქას. „რა ფეხები აქვს,“ – გაივლო მან გულში და ხმამაღლა შესძახა:

– აბა, ვინცებო!

ბარის უკან მდებარე მდელიოს ბურსის ვილაიეთის სოფელი უნდა წარმოესახა. ფაჰირს მიაჩნდა, რომ მდელიო ყველგან მწვანეა.

ოპერატორმა კამერა დადგა. მსახიობებმა მზის რეფლექტორები მდელიოზე გადაიტანეს. მათ რამდენიმე კაციც მი-



ემველა, რომლებიც აქ დილის ჰაერის გადასაყლაპად მოსულიყვნენ. ჰარიქამ ხელახლა შეიღება ტუჩები. ახალგაზრდა მამაკაცის როლის შემსრულებელმა ჰაჯივით ჰუსეინმა კბილებჩამტვრეული სავარცხლით უკანასკნელად გადაივარცხნა თმა. ასისტენტმა თავის რვეულში ჩაიხედა:

– ას სამოცდამეთვრამეტე სცენა, შორი პლანი.

ფაჰირმა ფიცარნაგზე თავ-თავის ადგილზე მდგომ ჰარიქას და ჰაჯივითს ელვასავით მზერა ესროლა, რა ფეხები აქვსო, გაივლო გულში და:

– კარგია! ახლა მოისმინეთ, რა უნდა გავაკეთოთ. ჰარიქა ხეებიდან გამოვარდება და ჰუსეინისკენ გაიქცევა. მის დანახვაზე ჰუსეინი სახტად დარჩება, შემდეგ სიხარულის შეძახილი აღმოხდება და ჰარიქას გადაეხვევა... გასაგებია?

– დიახ.

– აბა, დავინყოთ. მზადა ვართ?

– მზადა ვართ.

– კარგია...

კამერა საკერავ მანქანასავით არახრახდა. ჰარიქა და ჰუსეინი მთელი სულითა და გულით შეუდგნენ ას სამოცდამეთვრამეტე სცენის გათამაშებას. ისინი მთელი ძალით ჩაეკვრნენ ერთმანეთს, მაგრამ ფაჰირს თამაში არ მოეწონა. სცენა გაიმეორეს. ერთხელ კიდევ. კიდევ ერთხელ... როცა ჰაჯივითის ძლიერმა მკლავებმა ჰარიქას ძვლებს ჭრაჭრაჭრუჭი დაანყებინა, ფაჰირმა კამერა გააჩერა.

– არ მინდა, – წამოიძახა მან, – ეს სცენა ამოიღეთ სცენარიდან.

ჰარიქამ და ჰუსეინმა ნაღვლიანი მზერა მიაპყრეს ფაჰირს.

ამ დროს ხის ძირას დილის ძილს მიცემულმა იტალიელმა კონსულტანტმა, სეკონდო სერამ, გაახილა თვალი:

– რა უნდა შენ? – ჰკითხა მან დამ-

ტვრეული თურქულით იქვე მდგომ ბოშა ქალ ნაიმეს.

– მოდი, გიმარჩიელო, მუხუდოს მოვაბნევ, შენს ბედ-ილბალს ამოვიკითხავ, ჩემო ქერათმიანო ეფენდი.

– შენ მარჩიელია?

– მარჩიელია. გინდა – მუხუდოზე, გინდა – სარკეზე...

– მარჩიელია და მერე რას ამბობს?

– ახლანდელს, წარსულს, მომავალს გეტყვი. შენ ამ თავსაფარში ოცდახუთიანი ჩააგდე, თვალებზე გეტყობა, შენი ყისმათი ქერაა...

– არ უნდა მე ქერა.

– მაშინ შავგვრემანი იყოს.

– არ უნდა მე შავგვრემანი.

– წითურზე თუ თანახმა ხარ, ჩამიგდე ეგ ოცდახუთიანი.

– არ მინდა მე წითელთმიანი. ფული იქნება, ფული, შენ ის მითხარი.

– მაჩვენე ხელისგული, ვნახო... ოჰ, ოჰ, ოჰ. ფული, ფული, თან რა ფული... მალე დიდი ფული გექნება...

– მალე?

– სამ წელიწადში. შეიძლება სამ დღეში, სამ თვეშიც... ერთი ამ ხაზს შეხედე, ღმერთმა ავი თვალისაგან დაგიფაროს. ეს რა გრძელი ხაზია...

– რა ხაზია?

– სიცოცხლის ხაზი, სიცოცხლის. დიდხანს ფეხს არ მოიცვლი ამ ქვეყნიდან.

– რა ფეხი?

– უბრალოდ, დიდხანს იცოცხლებ... აბა, ერთი გადმომიგდე ოცდახუთიანი.

იტალიელი გაიღრჩა. შემცივნებულ ფეხებზე ხელი მოისვა და წამოდგა. ჯიბიდან ათყურუშიანი ამოიღო და ჩაცუცქულ ნაიმეს გადაუგდო. შემდეგ მიბრუნდა და მსახიობებისკენ გაემართა, რომლებიც ას სამოცდამეთვრამეტე სცენას მეექვსედ იმეორებდნენ.

– მესიო ფაჰირ, – დაიძახა მან, –



ერთი აზრი მომივიდა. ეს ხეები არ მოგეწონა მე. უნდა, რომ ფილმი ბურსაში გადაიღოს...

ჰარიქამ და ჰაჯივათმა ნაღვლიანად შეხედეს სეკონდო სერას.

„ეს ტიპი ბურსაში უფრო ადვილად იძინებს ხეების ძირას“, – გაიფიქრა ოპერატორმა თავისთვის.

ნაიმემ მუხუდოები აკრიფა.

– ამ მსახიობებთან ხეირი არ არის, – ნაილულულა მარჩიელმა, – ყველა გაფხეკილია... ნავიდე ერთი, იმ არაბი მეჭმედის კაფეში შევიხედო. ღმერთმა აცოცხლოს. იქნებ უკვე მოვიდნენ შეყვარებული წყვილები....



ერდალ ათაბეგი  
(1930)

ფეხზე ღმომის საბადლო<sup>1</sup>  
(თავი წიგნიდან „ადამიანური სიტბო“)

შიში, სირცხვილი, დამცირება, მარტოობა....

თავისი ცხოვრების მანძილზე ადამიანი ერიდება ყოველივე ამას. ცხოვრებაში ამისგან თავის დაღწევა ძალიან ძნელია, ზოგჯერ შიში აგვეტორღიალება, ზოგჯერ სირცხვილის შემანუხებელი სუნთქვა ან დამცირების ნოტიო ჭუჭყი, ხან კი მარტოობის შიშველი სიმწარე მოგეახლება. არც ისეთი შემთხვევებია ცოტა, როცა ყველაფერი ერთად დაგვატყდება თავს.

ციხეშიც ეს ყველაფერი ერთად იყრის თავს.

სწორედ ციხეში ბუდობს სირცხვილი, დამცირება, მარტოობა.

ამას მუდამ ჰყვებოდნენ ციხის შესახებ. ამას მუდამ წერდნენ, ამას გვასწავლიდნენ. ასეთი იყო ციხის ცხოვრება. მონაყოლი, დაწერილი თუ ნასწავლი ადამიანის სულში „ციხისეულ შიშს“ წერგავდა და კვებავდა ამ შიშს.

მე ციხისეული შიში, სირცხვილი, დამცირება და მარტოობა ციხეშივე დავთრგუნე. ეს იმიტომ მოხდა, რომ სხვა გზა არ არსებობს.

ციხე ყველაზე დიდი ბოროტებაა, რომელსაც კი ადამიანი ადამიანის წინააღმდეგ მიმართავს.

რა დანაშაულიც უნდა ჰქონდეს ჩადენილი, ადამიანის მოწყვეტა სახლისგან, საქმიანობისგან, თავისი საყვარელი ადამიანებისგან, გარემოსგან, თავისი ჩვევებისგან, ჩვეული ყოფისგან და

სხვაგან მისი დამწყვეტე ყველაზე დიდი სიავია იმ სიავეთა შორის, რომელიც კი შეიძლება მოხდეს. ამ საქციელს რა მიზანიც უნდა ჰქონდეს, საზოგადოებაში ამ გზით ადამიანის დაბრუნებაც კი, ადამიანის გამოსწორებაც კი რომ იგულისხმებოდეს, არსებითად მაინც ნიშნავს, რომ ადამიანი მოსწყვიტეს საზოგადოებას, პიროვნება მოსწყვიტეს სიცოცხლეს.

მე საერთო ჯამში ოცდათვრამეტი წელი ვიჯექი ციხეში.

ეს, ზოგის აზრით, ძალიან ბევრია, ზოგის აზრით კი – ძალიან ცოტა.

ციხეში ჯდომის სიცოცხლე ხანგრძლივობით არ იზომება. შეიძლება ისეთი წუთები გადაიტანო, რომ ციხეში საუკუნეგატარებულს დაემსგავსო. ისეთი წუთებიც შეიძლება განიცადო, რომ ციხე არაფრად მიიჩნიო. ეს ადამიანმა თვითონაც კი არ იცის კარგად.

ცხოველებზე დავფიქრდი! ნეტავ თუ არსებობს ისეთი ცხოველი, რომელმაც თავისი სისხლ-ხორცი ციხეში ჩასვა? ვერ აღმოვაჩინე. არსებობს ცხოველი, რომელიც თავისიანს ეტოქება, არსებობს ცხოველი, რომელიც თავისიანს სიცოცხლეს მოუსწრაფებს ან შეჭამს. მაგრამ ციხეში მოძმის ჩამსმელი ცხოველი არ მეგულება. დატუსალება ადამიანის ეშმაკეული თვისებებიდან მოდის, მისი მანკიერი მხარეა.

ციხეში ჩასმა ადამიანის მიერ ადამიანის მოსპობის სურვილის ნაყოფია.

შიში, სირცხვილი, დამცირება,

<sup>1</sup> მწერლის გაზეთი, 12-18 სექტემბერი, 2002.



მარტოობა მომაკვდინებელია ადამიანისთვის.

მე რომ მკითხოთ, ადამიანებს სწორედ ასე კლავენ.

აბა, მიმოიხედეთ ჩვენ ირგვლივ. განა ვერ ხედავთ ამ გზით დახოცილ ადამიანებს? განა ასე არ გაჩნდა მდუმარე ადამიანი, ფიქრს გადაჩვეული ხალხი, თავისი გრძნობებით დამფრთხალი პირები, ცხოვრების სხვა ყაიდას მონატრებულები?

ეს ხალხი არც ციხეში მჯდარა, არც არავის უბეგვია, არც დაუხოცავს. ეს ხალხი შიშმა, სირცხვილმა, დამცირებამ, მარტოობამ დააფრთხო. ამ შიშმა დახოცა. ასეთი სიკვდილის შემდეგ ისინი ადამიანებად მოევიწყნენ ქვეყანას. „სიკვდილის შემდგომი სიცოცხლის“ ერთი სახეობა, ალბათ, ეს არის.

ამ ხალხის დათრგუნვის გზა არის მათთან პირისპირ შეხვედრა, მათი არსებობისათვის ხელის შეწყობა. მათი შიშის, შერცხვენის, დამცირების, მარტოობის შესწავლა.

ყოველივე ამის დამარცხების გზაა მათთვის თვალეზი ჩახედვა.

ამ ხალხის დამარცხების გზაა შიშით, სირცხვილით, დამცირებით, მარტოობით მათი გადათელვა.

უნდა შევიგნოთ, რომ შიშით შეპყრობილს არ უნდა გეშინოდეს, შერცხვენილს არ უნდა გრცხვენოდეს, დამცირებულს თავი არ უნდა გემცირებოდეს, მარტოხელას თავი არ უნდა გემარტოხელებოდეს. უნდა გამრავლდე.

ყოველივე ამას საპყრობილე ასწავლის ადამიანს.

როცა რკინის კარებს მოგიხურავენ, როცა ჯაჭვის ჟღარუნი გაგრძნობინებს, რომ შენ მარტოდმარტო რჩები...

როცა საკუთარი თავის დანახვასაც ერიდები, მაშინ რჩები მარტოდმარ-

ტო.

ახლა, ამ დროს, ფეხზე დგომის უამი რეკს.

ახლა, ამ წუთში, არც წარსული არსებობს, აღარც მომავალი, არც სამართლიანობა, არც უსამართლობა, არც სიმართლე, აღარც შეცდომა.

ახლა ფეხზე დგომის უამია, ფეხზე დგომაა საჭირო.

ფეხზე დგომაა საჭირო, ფეხზე დგომაა საჭირო, ფეხზე დგომაა საჭირო. ფეხზე დგომა. ასეთ უამს, ათეული წლის განმავლობაში, ასეული წლის განმავლობაში საჭიროა ფეხზე დგომა.

და იდგებით კიდევ ფეხზე.

ფეხზე დამდგარი პირველი პრიმატის, ფეხზე დამდგარი, ვინ იცის, რამდენი ათასი წლის წინანდელი თქვენი წინაპრის გაოგნებული სიხარული აღავსებს თქვენს სულს. თქვენ ფეხზე დგახართ. თქვენ ფეხზე დგახართ.

და მუდამ ფეხზე იდგებით.

და ამის შემდეგ უკვე ფეხზე დგომის საფასურს გადაიხდით.

ფეხზე დგომის საბადლო ძალიან მძიმეა. შიში უნდა დაძლიოთ, სირცხვილი უნდა დაძლიოთ. სავალი გრძელია, ქვა-ლორლიანია, ეკლიანია. ქანცს გაცლით, სულს წაგიღებთ, გაგტანჯავთ.

მაგრამ ამას არავითარი მნიშვნელობა აღარა აქვს. უნდა წინ იაროთ და იაროთ. ფეხზე რომ დადექით, ეგ არაფერია. ფეხზე დგომის საბადლო უნდა გადაიხადოთ.

გამბედაობა, ნდობა, ღირსება, გამრავლება ამ გზის ბოლოს კი არ გელოდებათ, ზედ ამ გზაზე ძევს.

შიშში ცხოვრებით გამბედაობა უნდა ისწავლოთ; სირცხვილში ცხოვრებით – ნდობა; დამცირებაში – ღირსება; მარტოხელობაში – გამრავლება.

შემდეგ გამბედაობას, ნდობას,



ღირსებას, გამრავლებას დიდი მნიშვნელობა აღარა აქვს.

მნიშვნელობას ამის შემდეგ ადამიანობა იძენს.

სიცოცხლის განმავლობაში ბევრი ამათგანი შემოგებნევათ. ზოგჯერ გამბედაობის ნაკლებობას იგრძნობთ, ზოგ-

ჯერ ნდობის შერყევას, ხან ღირსების შელახვას, ხანაც – მარტოობას.

მაგრამ უკვე „ადამიანი ხართ“, ყველაფერს დაძლეეთ. გაგების, ცოდნის, გააზრების, შეგრძნების მეშვეობით გადალახავთ.

„ადამიანი“ აკი თქვენში ზის.



ალი აქბაში  
(1942)

### ტყის ზმანებანი<sup>1</sup>

ახალგაზრდა მეტყევე-ინჟინერი, თავზე ჩაფხუტით, ტყეში მძიმედ დააბიჯებდა და ბებერ ხეებს არჩევდა. ინჟინრის მიერ შერჩეულ ხეზე ჯერ ჩია კაცი ავიდოდა, წელზე შემოკრულ ქამარს შემოახვევდა, შემდეგ კი ელექტროხერხით შეიარაღებული ხისმჭრელი მინაზე გააგორებდა.

ჩიტებს ახლა უკვე ძველებურად აღარ აფრთხობდა ხეებზე ცულების ჩახაჩუხი. გაისმოდა ზრიალის ხმა და მუშების შეძახილზე, წავიდაო, ასწლოვანი ხეები იქ ეცემოდა ქრიალითა და ზათქით, საითაც ხისმჭრელები თოკით ეწეოდნენ ხოლმე. ტყეს ფისის სუნით გაჟღენთილი მტვრის ბული ეფინებოდა. ცის ლაჟვარდის ცქერას და ფრინველთა ჟღერტულ-გალობას მიჩვეული ვეება ხე ერთ წუთში აღარ იყო.

ისე კი, ხე რომ დაეცემოდა, ახალგაზრდა ინჟინერი მაშინვე ზურგს შეაქცევდა იქაურობას; ოღონდ ძნელი გამოსაცნობი იყო, ცხვირსახოცით ის ოფლს ინმენდდა ამ დროს თუ ცრემლებს. ეს ყმანვილი, როგორცა ჩანს, ცოტა პოეტური ბუნების კაცი უნდა ყოფილიყო... ამ ხეების ქრას ხომ თვითონ ხელმძღვანელობდა და ნაქცეული ხის ცქერა კი აღარ შეეძლო?..

უფრო მოგვიანებით, შუა ტყეში, ერთ პატარა მინდორზე, სადაც ციყვები ნებივრობდნენ ხოლმე, კიდურებდაჭრილი ეს ხეები ერთი ზომის მორებად და კუნძებად იხერხებოდა, ჯიშისა და ხარისხის კვალობაზე ცალ-ცალკე ეწყობოდა... ნაძვი, ღვია, მუხა, რცხილა, ფიჭვი.

ამ ხეების სვე-ბედი ულვაშებიანი მეტყევის თითის მოძრაობაზე იყო დამოკიდებული. ან სამშენებლო მასალად გადაალაგებდნენ, ან საწვავად. და აი, მაშინ კი აღარ ასცდებოდათ ცეცხლის ალში დანვა და ნაცარტუტად ქცევა.

ხეები გულის ბაგაბუგით ელოდნენ თავის განაჩენს. განა კი ადვილი იყო?.. ხე რომ ხე ხარ, ამდენი წელია, ტყეში ცხოვრობ, შენს გემოზე წყალი გაქვს და ჰაერი, მეზობლები გახვევია, რამდენ ჩიტს ბუდეც უკეთებია შენს ტოტებზე; თავი ღრუბლებში გაქვს და ცის სილაჟვარდეს შესცქერი, მშვიდ ღამეში ვარსკვლავებს ესაუბრები; მერე კი მოულოდნელად მოგადგება ვიღაც, მკერდზე ხერხს მოგაბჯენს და მინაზე აღმოჩნდები გართხმული... საშენ მასალად თუ ივარგე, კიდევ რა გიშავს, რალაცაში მაინც გამოდგები... შენგან მაგიდას, სკამს, კარადას ან სხვა რამეს მაინც გამოჭედავენ, კიდევ ასწლეულს გაუძლებ. მაგრამ თუ საწვავად გაგამწესეს? აი, მაშინ იკითხე შენი ამბავი.

ზორბა ტანის ტყისმჭრელები მოზრდილ კუნძებს ილღიაში ამოიჩრიდნენ და გვერდზე მოისროდნენ. ზოგს – შეშად, ზოგს – საშენ მასალად. ამ დროს ერთი კუნძის რიგიც დადგა. შორიდან არ ეტყობოდა, რაში ივარგებდა. სამშენებლო მასალად არ გამოდგებოდა, რადგან მოკლე იყო ძალიან. გარეგნობა კი ისეთი ლამაზი ჰქონდა, რომ დასაწვავად არ ემეტებოდათ. მუშები შეყოვნდნენ. კუნძი ხელში ეჭირათ და აღარ იცოდნენ, საით წაელოთ. ამ დროს ულვაშა მეტყე-

<sup>1</sup> მწერლის გაზეთი, 5-11 სექტემბერი, 2002.



ვემ ხელი შეშად განწირული კუნძების-  
კენ გაიშვირა და ტყისმჭრელები ყოყმა-  
ნიდან გამოიყვანა. გაისმა ლანანი და  
კუნძმა შეშების გროვაში ამოყო თავი.

– ვაიმე, – წამოსცდა ლამაზ კუნძს,  
– ვაიმე, მორჩა ჩემი საქმე. შენ დაგვე-  
სოს თვალები, მამასახლისო, შეშად მი-  
მეტებ, არა? აგრე რამ გაგრეცხა სინდი-  
სისგან, – ამოიკვნესა კუნძმა.

ამ დროს ხმა ამოიღო ინჟინერმა,  
რომელიც მორზე იჯდა ჩუმად და ხის-  
მჭრელებს გასცქეროდა:

– ბიჭებო, აბა, ერთი ეგ კუნძი აქეთ  
გადმოდეთ.

მუშებმა ეს უცნაური კუნძი საშე-  
შედ გადადებული გროვიდან აიღეს და  
გვერდზე დადეს. მეტყევეს კრინტი არ  
დაუძრავს, თორემ გულში ძალიან გაბ-  
რაზდა ინჟინერზე. ამ ახალ გამომ-  
ცხვარს ნეტავ რა ჭკუა მოეკითხება... ეს  
უჯიშო კუნძი შეშის გარდა, აბა, სხვა  
რაში გამოდგებაო.

ამ კუნძს კი, რომელსაც წარამარა  
ადგილს უცვლიდნენ, ვერ გაეგო, რა  
ხდებოდა მის თავს, შეშობას კი დააღწია  
თავი, მაგრამ საშენ მასალად ჯერ არ  
იყო გამწესებული. რა ცუდია, როცა  
არც იქით ვარგინარ, არც – აქეთ, შეშა  
რომ ყოფილიყო, ვილაცას ხომ მაინც  
ასიამოვნებდა თავისი სითბოთი. ახლა  
კი?! არც ჯოჯოხეთში მოხვდა, არც –  
სამოთხეში. გიყებისა არ იყოს, განსან-  
მენდელშია გაჩხერილი.

თვითონ კუნძისთვის რომ გეკით-  
ხათ, უნდოდა, რომ პატარა ზანდუკი  
ყოფილიყო, ზემოდან სამოთხის სურა-  
თებით მოჩუქურთმებული, სამზითვო. ამ  
სურათებით მარაშელი<sup>1</sup> ოქქეში ერთ კვი-  
რაში დაამშვენებდა მას. ხეკაკუნა კოდა-  
ლასავით ჯიუტად აკაკუნებდა თავის ია-

რალ-ხელსაწყობს, დღე და ღამეს გაას-  
წორებდა და ერთ კვირაში მოაჩუქურ-  
თებდა ზანდუკს. აქეთ-იქიდან თავქო-  
ჩორა, მარაოსავით კუდგაშლილ ორ  
ფარშევანგს მოუსვამდა, შუაში ვარდის  
გაფურჩენილ ბუჩქს ჩაუსვამდა თავისი  
ფართოდ გაშლილი ტოტებით. იქნებ  
მდინარეც ჩაეხატა სადმე, რომ სახლს  
სიგრილე და სიამოვნება მოჰფენოდა...  
ვინ იცის? მერე კი ბერდიზიდან, ალიშა-  
რიდან<sup>2</sup> ან მაღალი იალალებიდან მზითე-  
ვის გასამართად ქალაქს ჩამოსული ლო-  
ყანითელი, კოპლებიან კაბაში გამოწყო-  
ბილი, ცისფერმოსასხამიანი თურქმენი  
გოგონა თვალს დაადგამდა ამ ნახატებს  
და იტყოდა, – ან ეს მიყიდეთ, ანდა სხვა  
არა მინდა რაო; უზანდუკოდ, აბა, რა  
მზითევი იქნება. სარკე და ზანდუკი.

მნიშვნელობა არა ჰქონდა, ვინ იქ-  
ნებოდა ეს: აიშე, ფათიმა, გულლუ თუ  
ზეინაბი. ვინც გინდა ის ყოფილიყო, ის  
აუცილებლად ასლისა და შირინის<sup>3</sup> მოდ-  
გმისა იქნებოდა. ნაილებდა ამ ზანდუკს  
და ჩარდახის ყველაზე თვალსაჩინო  
კუთხეში დადგამდა. შიგ ხომ, ვინ იცის,  
რას არ ჩაალაგებდა. მოჩითულს და და-  
ქარგულს, ვერცხლის სამაჯურებს, აქა-  
ტის ყელსაბამებს, ჯარიდან მოწერილ  
წერილებს, დანიშნულის თმის კონას,  
სირმით გადაკრულს. ბოლოს, ყოველივე  
ამას შორის ჩაიდებოდა ქარვასავით ჩაყ-  
ვითლებული კომში, რომ ზანდუკის თა-  
ვის ახდაზე იქიდან ნაზი სურნელი  
ამოფრქვეულიყო. ამ ზანდუკის გაღება  
მარტო პატრონს შეეძლო. სხვები ხელს  
ვერ ახლებდნენ. ამ ნივთებთან ერთად  
იმ ზანდუკში ქალწულის გულისნადებიც  
ინახებოდა. ამის გამო ის ეუვნის უღა-  
რუნს გამოსცემდა ხოლმე, როცა აღებ-  
დნენ. ჩუმად ვერავინ გააღებდა. ზანდუ-

<sup>1</sup> მარაში – პროვინცია თურქეთის ცენტრალური ნაწილის სამხრეთში.

<sup>2</sup> ბერდიზი, ალიშარი – მაღალმთიანი სოფლების სახელებია ამ მხარეში.

<sup>3</sup> თურქული სასიყვარულო ეპოსის გმირი ქალები.



კის გასაღები პატრონს მუდამ უბეში ედო.

ახალგაზრდა ინჟინრის სიტყვებმა – ბიჭო, აილე ეგ კუნძი და ჩემი პიკაპის ძარაში ჩააგდო – ფიქრებიდან გამოარკვია კუნძი და ოცნებაც შუაზე გაუნყდა.

მალე ბინდიც ჩამოწვებოდა. შინ დაბრუნების დრო იყო. ტყე ლაჟვარდისფერმა სიგრილემ მოიცვა. პიკაპი ოღროჩოღრო გზაზე მიიწედა წინ. მეტყვევებელარ მოითმინა და ინჟინერს მიუბრუნდა:

– კი, მაგრამ, ბატონო, ვერ გამიგია, ეს კუნძი რატომ წამოიღე, მაგისგან ხომ არაფერი გამოვა.

ინჟინერს წირი არ შეუცვლია, შუბლზე ჩამოშლილი ქოჩორი გაისწორა:

– აბა, რას ამბობ, მაგისგან არაფერი გამოვაო? გამოვა, მაგისგან საზი<sup>1</sup> გამოვა, საზი, – უპასუხა მან და მანქანის გუგუნს სიმღერა ააყოლა:


*ფიჭვნარიდან თეთრი ბოლი*

*ცისკენ მიიკლაკნება,  
არხეინი კაცის გული დარდით არ  
იტანჯება.*


გუნებანამხდარი კუნძი ამ სიმღერამ ისე გაახალისა, რომ, სმენამოკლებულიც კი, ლამის თვითონაც აჰყოლოდა ამ ჰანგს.

<sup>1</sup> საზი – აღმოსავლური სიმებიანი საკრავი ჩონგურის ტიპისა.


















დიდი ზოგჯერ სუფი უნდა ჰქონდეს იქვე, რომელიც უბრალო იუნქში, ხოლო ჩამოცილები გამხმარი ცოცხლი  
 დანახავი იმ სოფლან ზოგხიას, რომელიც ჩვეულებრივი თვალთვლი მიუზღომიქია. მიუზღომიქია  
 იქამდის, სანამ მხაფერი სუფი არ მიეხება. თურმი სუფიანისი ირთი მიწისი, ირთი გამხმარი  
 ირთის მოციქება, რომ ირთიქ მიკვანის, ახად, განსაყოფიებუქ სიციციხეს დამუბრუნეს.  
 ბედნიერი, ქმნიანიცად, ადამიანი, რომელიც იქ მდიდარი სუფი აქს. მისთვი, როგორც  
 ვადასთვი, დამუბრუნებდა მიუყვიქებს ბუნება. სოფლან ჯანამის სამუშვიანთა გამოთვიან არა  
 მანციო ითვიციურ განცდას აქმნავს, არამედ ვათვიქებს და იქ თვიქი იანგა ხანს მოყვიქა თან.

ვოქციხა ცილიანობი



რედაქციისგან .....	5
<b>აზერბაიჯანული ლიტერატურა</b>	
ენვერ მამედსანლი, წითელი კოკრები .....	11
მთავარ გამზირზე (ციკლიდან „თავრიზული მოთხრობები“)	16
<b>თურქული ლიტერატურა</b>	
ომერ სეიფედინი, სასწაული.....	21
ქრთამი.....	22
რეშათ ნური გიუნთეძინი, ნარჩიტა (ნაწყვეტი რომანიდან).....	25
საბაჰათინ ალი, სატვირთო მანქანა.....	37
ურიკები ხუთ ყურუშად .....	40
ბატები .....	42
შუშის კოშკი .....	45
ორჰან ქემალი, შიმშილი .....	50
სუათ დერვიში, ქურდი .....	53
ფოსფორიანი ჯევრე (ნაწყვეტები რომანიდან).....	56
ბექირ სითქი ქუნთი, ბეჭედი .....	63
ჯევდეთ ქულრეთ სოლოქი, ჩვენი ქურჩა.....	67
ორჰან ჰანერლიოღლუ, ალი .....	71
დიდრონი თევზები (ნაწყვეტი რომანიდან).....	77
ერდალ ათაბები, ფეხზე დგომის საბადლო.....	89
(თავი წიგნიდან „ადამიანური სიტბო“)	
ალი აქბაში, ტყის ზმანებანი .....	92



ნ 32/43

ნიმუში

რედაქტორი: 593464565; E-mail: mzivditi@yahoo.com  
სწავლული მდივანი: 599160619; E-mail: nanio02@yahoo.com

ტირაჟი 40 (ორმოცი) ცალი

გამომცემლობა „უნივერსალი“

თბილისი, 0186, ა. პოლიბაოვსკაიას №4. ☎: 5(99) 33 52 02, 5(99) 17 22 30  
E-mail: universal505@ymail.com; gamomcemlobauniversali@gmail.com





